

Ne
266

RB172,180

LIBRARY
of the
UNIVERSITY
of
TORONTO



STILLMAN DRAKE

Not in CF

W. C. WELLS

THE

WELLS

WELLS

WELLS

WELLS

WELLS

WELLS

WELLS

WELLS

WELLS

WELLS

WELLS

WELLS

WELLS

RE C V E I L DE LETTRES

DES SIEVRS MORIN, DE LA ROCHE,

DE NEVRE' ET GASSEND:

EN SVITE DE L'APOLOGIE DV SIEVR

GASSEND, touchant la question

De motu impresso à motore translato.

Où par occasion il est traité de
L'ASTROLOGIE IVDICIAIRE.



A PARIS,

Chez AUSTIN COVRBE', Imprimeur & Libraire ordinaire
de M^r le Duc d'Orleans, au Palais, à la Palme.

M. D C. L.



A PARIS
Chez Agathe Goussier, Libraire & Propriétaire
de la Bibliothèque de la Ville de Paris
N. 10, rue de la Harpe, au-dessous de la Tour de la Harpe.



AV LECTEUR.



ENCORE que *M^r Morin* dans le *Libelle* qu'il a fait imprimer depuis quelques iours, pour *Responſe à une Lettre de M^r Gaſſendi*, ait pris ſoin d'en rapporter les paſſages qui luy ont ſemblé les plus importants; neantmoins la plus part de ceux qui liſent ſon diſcours en reſmoignent peu de ſatisfaction, ſans doute pour n'auoir pas le texte entier de cette Lettre. C'eſt ce qui nous a obligé à la rendre publique, bien que les *Amis de M^r Gaſſendi* y euſſent beaucoup de repugnance, & ne peuſſent ſouffrir patiemment de voir commettre ſon nom, eſtimé par toute l'*Europe*, avec celui de *M^r Morin*, de qui la réputation n'eſt pas ſi bien eſtablie comme il ſe le perſuade. Auſſi eſt-il certain que *M^r Gaſſendi* n'a point eſcrit ſa Lettre à deſſein qu'elle fut imprimée, luy qui n'a iamais rien mis au iour qu'en *Latin*: Son intention eſtoit ſeulement qu'elle fuſt veüe de *M^r Morin* & de quelqu'autre perſonne qui en receut une copie par ſon ordre. Et certainement nous n'euffions iamais pris la liberté de la mettre ſoubs la preſſe, ſi nous n'y euſſions eſté forcez par la publication que *M^r Morin* a faite de ſa *Reſponſe*. Et parce qu'en ſuite il ſ'eſt attaché à *M^r de Neuré* & de *Barancy*, d'une façon que les gens d'honneur

A V L E C T E U R.

n'approuveront peut-estre pas, nous auons encore adjoûté les Lettres de ces Messieurs dont Mr Morin se plaint; & mesmes quelques-unes des siennes, bien que déjà imprimées; pour ce que nous croyons qu'elles auront plus de grace toutes en un corps, que sur des feuilles volantes, comme elles ont couru iusques à présent; outre que celles de Mr Morin n'estoient plus déjà faciles à trouuer. Car par une fatalité qui n'est pas ordinaire aux bons Liures, les siens demeurent rares en peu de temps, non seulement dans les boutiques des Libraires, mais encore dans les Bibliothèques les mieux fournies. Nous auons aussi esperé que nostre Recueil contribueroit quelque chose à l'esclaircissement de ce dernier petit ouurage de Mr Morin, que plusieurs ont trouué un peu embarrassé & confus; En sorte mesme que pour sa plus grande intelligence, & pour soulager dauantage le Lecteur, nous auons esté conseillez de deduire l'histoire du different qui a donné sujet à toutes ces Lettres, qui est telle.

Monsieur Gassendi ayant esté tousiours tres-curieux de chercher à iustifier par les experiences la verité des speculations que la Philosophie luy propose, & se trouuant à Marseille avec Monseigneur le Comte d'Alais en l'an 1641. fit voir sur une galere qui sortit exprez en mer par l'ordre de ce Prince, plus illustre par l'amour & la connoissance qu'il a des bonnes choses, que par la grandeur de sa naissance, qu'une pierre la schée du plus haut du mast, tandis que la galere vogue avec toute la force & la vistesse possible, ne tombe point ailleurs qu'elle ne feroit, si la mesme galere estoit arrestée & immobile; si bien que soit qu'elle aille, ou qu'elle n'aille pas, la pierre tombe tousiours le long du mast à son pié, & de mesme costé. Cette

A V L E C T E U R.

experience faite en présence de Monseigneur le Comte d'Alais, & d'un grand nombre de personnes qui y assisterent, sembla tenir quelque chose du paradoxe à beaucoup qui ne l'auoient point veüe; ce qui fut cause que Mons^r Gassendi composa un Traité, De motu impresso à motore translato, que nous vîsmes de luy la mesme année en forme de Lettre escrite à M^r du Puy. M^r Morin qui auoit fait imprimer quelque temps auparauant son ouurage intitulé, Famosi Problematidis de Terræ motu hætenus optata, nunc tandem demonstrata solutio; creut que M^r Gassendi n'auoit eu autre dessein que d'escire contre son Liure, pource que dans cette Lettre à M^r du Puy, il destruisoit vne des plus fortes raisons que l'on a tousiours opposées au mouuement de la Terre, & que M^r Morin employoit pour fondement d'une de ses principales demonstrations. Ce desplaisir joint à l'ambition qu'il a de se signaler en attaquant les hommes de reputation, le porta à faire cét autre Liuret auquel il donna pour tiltre, Alæ Telluris fractæ, où il ne se contente pas d'impugner à sa mode les raisons de M^r Gassendi; mais il s'oublie iusques à le taxer d'heresie, en luy desconseillant le voyage de Rome, comme n'y faisant pas seur pour luy. Alors M^r Gassendi suiuit l'exemple de Iesus-Christ, lequel n'ayant pas ouuert la bouche durant tous les outrages qu'il auoit soufferts iusques-là, monstra quelque ressentiment de celuy que le satellite insolent luy fit, en luy reprochant qu'il offensoit le Pontife. Ainsi M^r Gassendi voyant que M^r Morin luy faisoit un semblable reproche, pensa qu'il ne se deuoit plus taire, & fit son Apologie. Elle luy fut demandée par les Imprimeurs de Hollande, auxquels il en enuoya vne copie, & vne autre en mesme temps en Prouence

A V L E C T E U R.

à feu M^r le Prieur de la Valette, l'un des plus sçavans & plus vertueux hommes de nostre siecle, à qui il en avoit adressé le discours. M^r Morin en ayant eu le vent employa ses amis, & obtint de M^r Gassendi qu'il retireroit le manuscrit de Leyden, & en empescheroit l'impression autant qu'il luy seroit possible; à quoy il a tres-fidèlement satisfait, n'ayant pû prévoir que l'on fist imprimer celuy qui estoit entre les mains de M^r le Prieur de la Valette, à qui il avoit déclaré qu'il s'estoit engagé à cette suppression; si bien que s'il en est arrivé autrement, ç'a esté contre l'intention de M^r Gassendi, & par le seul fait de M^r Morin: En voicy la verité.

Environ le temps que M^r le Prieur de la Valette receut le manuscrit qui luy estoit destiné, M^r de Neuré passa en Prouence, où estoit alors Intendant de Justice M^r de Champigny, dans la maison duquel il avoit pris employ, par l'entremise de M^r Gassendi son tres-particulier Amy, qui par ses recommandations donna aussi lieu à l'estroite familiarité, qui a tousiours esté depuis entre M^r de la Valette & M^r de Neuré. Ces deux derniers leurent ensemble cette Apologie, & resolurent de la supprimer, puisque l'Authéur l'avoit promis. On en demeura donc là; & les choses ne seroient pas passées plus avant, si M^r Morin ne les eust obligés à changer d'avis.

En l'année 1646. M^r de Chauigny fit un voyage en Prouence; M^r Morin qui se mit de sa suite, estant à Aix les visita tous deux, & leur fit mille discours des aduantages qu'il pretendoit avoir sur M^r Gassendi, disant qu'il l'avoit réduit par ses raisons, à n'oser faire paroistre aucune responce; & n'espargnant pas mesme M^r Boulliaud, estimé par M^r le Prieur de la Valette pour le premier Astronome de nostre sie-

A V L E C T E U R.

cle, & chery de M^r Neuré depuis leurs premieres études. Il leur laissa mesme quelque feüille de Latin qu'il auoit publiée contre luy. La discretion de ces Messieurs, qui ne voulurent pas mal-traiter un homme qui les visitoit, les obligea à dissimuler ce qu'ils pensoient, voyant qu'il se cabroit à la moindre repartie; de façon, que pour ne le point fascher, ils le laisserent sortir dans l'opinion de les auoir persuadez. Mais venant à considerer apres ensemble le tort que cela pouuoit faire à M^r Gassendi, ils se resolurent à faire imprimer à son insceu l'Apologie qui estoit entre leurs mains. M^r de Neuré se chargea de l'enuoyer à Monsieur de Barancy à Lyon, & de l'exhorter à prendre soin de l'Edition de cette piece, qui ne parut pourtant que long-temps depuis, & apres que M^r Gassendi se fust retiré en Prouence; tant on eut peur de luy desplaire. Et de fait aussi-tost qu'il en eut appris la publication, il en tesmoigna son desplaisir à M^r Morin par vne Lettre pleine d'excuses & de protestations, de n'auoir eu aucune part à cette impression. Le moins raisonnable homme du monde l'auroit creu, l'en auroit remercié, & n'auroit pas passé plus outre. Mais on a reconnu que les deferences ne seruent qu'à rendre M^r Morin plus fier. Au lieu de monstrier qu'il estoit satisfait, il publie vne tres-iniurieuse Lettre, qu'il adresse à M^r Gautier Conseiller au Parlement de Prouence, Neuen du deffunct Prieur, dans laquelle il s'efforce tout de nouueau de noircir la reputation de M^r Gassendi. Cette Lettre eut aussi-tost sa responce par vn Amy du Conseiller, qui ne s'est point nommé autrement que la Roche; mais M^r Morin qui ne veut iamais auoir le dernier, ne manqua pas nonobstant les remonstrances de ses Amis, de faire vne seconde Lettre, continuant de plus en plus à offen-

A V L E C T E U R :

ser *M^r Gassendi*, quelques civilitez qu'il en eut receuës ; adjoustant encore à ce mauuais traitement celuy de luy enuoyer des paquets pleins de ces escrits iniurieux, dans lesquels il affecte principalement de dire, que s'il s'abstient de respondre à son *Apologie*, c'est pource qu'il luy a donné parole d'en user ainsi ; & c'est ce qui a touché *M^r Gassendi*, lequel ne voulant pas laisser *M^r Morin* plus long-temps dans l'imagination qu'il se sente son obligé de cette parole, s'est resolu de desrober quelques heures à ses plus serieuses estudes, pour escrire la Lettre à laquelle *M^r Morin* a fait sa Response, imprimée depuis trois sepmaines.

Les Lecteurs equitables iugeront s'il a eu raison d'y employer le mespris & les iniures que l'on remarque en chaque periode ; & ceux qui ont quelque connoissance des choses du monde, demeureront sans doute estonnez de voir *M^r Morin* entreprendre de condamner *Monsieur Gassendi* d'ignorance.

E R R A T A.

PAge 68. ligne 28. au lieu d'ἐπερ' in, lisez, ἐπ' in. Ibidem, au lieu de vn, lisez, son.
 Page 74. au lieu de surpris, lisez, surprise. Page 78. au lieu de Mademoiselle, lisez, Monsieur. Pag. 80. lin. 24. ἡ πολλὰ ἐπιμύα, &c. lisez tout le passage ainsi ἡ πολλὰ ἐπιμύα αὐτοῖς ἢ μὴ αὐτοῖς φανερόν ποτε ὦσα, c'est au 12. verset du 3. ch. de S. Marc. P. 81. lin. 2. au lieu de ἐμπερὶ αὐτοῦ, lisez, ἐμπερινοτιῶνος. Marc 1. 43. Ibid. lin. 3. au lieu de λέγει, lisez, λέγει. Ibidem, lin. 20. au lieu de voyes, lisez, voicy. P. 84. lin. 6. au lieu d'αἵσθις, lisez, aistris, Pag. 88. au lieu d'opprobres, lisez, opprobre, lin. 31. Pag. 91. au lieu de pain, lisez, parr, lin. 12. Pag. 93. au lieu de n'entendent, lisez, n'y entendent.

RECVEIL



RECVEIL DE LETTRES
DES SIEVRS MORIN, DE LA
ROCHE, DE NEVRAI ET GASSEND:

En suite de l'Apologie du Sieur
GASSEND, touchant la question

De motu impresso à motore translato.

L E T T R E

*De Iean Baptiste Morin Docteur en Medecine, &
Professeur du Roy aux Mathematiques à Paris ;*

*A Monsieur M. Gaultier, Conseiller au Parlement
d'Aix en Prouence.*



ONSIEVR,

Je ne doute point que le sujet de cette Lettre vous
soit connu, puisque Monsieur Gassend est à Aix, qui vous

A

Paura dit. Mais dautant que toutes les circonstances de l'affaire ne sont peut-estre pas venuës à vostre connoissance, & qu'on m'a donné grand sujet de me plaindre, sinon de vous, au moins de feu Monsieur le Prieur de la Valette vostre oncle, le plus ancien & meilleur de mes amis, auquel ie n'ay iamais donné sujet de me deshonnorer : J'ay creu estre obligé de vous escrire la presente, qui contient succinctement l'histoire du faict, & le sujet de ma plainte ; & seruira de responce aux Esprits malins qui se sont voulu couvrir de l'ombre de feu Monsieur le Prieur vostre oncle, pour me traiter iniurieusement.

Il faut donc sçauoir que l'année 1642. Monsieur Gassend fit imprimer à Paris deux Epistres, *De motu impresso à motore translato*, le but desquelles ne paroist autre à ceux qui s'y connoissent, qu'à fortifier l'opinion du mouuement de la Terre, contre lequel j'auois escrit par trois fois. Et voyant que M. Gassend en ses Epistres ne m'auoit traité en amy fort ancien qui le visitois souuent, ie fis imprimer l'an 1643. contre cette opinion vn quatriesme trauail, intitulé *Ala Telluris fracta*, duquel M. Gassend se picqua par excez, & à tel point qu'il paroist par vne sienne Apologie imprimée cette année 1649. Des lors le nœud de l'amitié fut rompu, & demeurasmes enuiron vn an en cét estat, chacun de nous croyant sa passion estre fondée en bonne raison. Mais enfin Monsieur le Baron de Tourues, Seigneur de Prouence des plus vertueux, plus prudens, & plus affectionnez aux belles sciences, & à ceux qui en font profession, m'ayant fait l'honneur de me venir voir, comme ayant ouy parler de moy ; apres quelques entretiens il me dit, qu'il auoit appris qu'il y auoit quelque différent entre Monsieur Gassend & moy, & qu'il ne pouuoit souffrir que fussions en mauuaise intelligence, ayans esté amis dès l'escole en

Prouence, & estans à present collegues de mesme profession à Paris. Voyant la bonté de ce Seigneur, ie luy dis que ie n'auois pas commencé à donner à Monsieur Gassend subiet de mescontentement; & que nostre ancienne amitié auoit pouillé ses racines si auant dans mon cœur, que ie ne sentoys aucune repugnance à la renouveler, & luy tesmoigner que j'estois son seruiteur. Ayant cette parole de moy, il s'en alla & reuint au bout de huit iours, m'apportant assurance de mesme disposition en l'esprit de Monsieur Gassend: au logis duquel ie me voulus rendre avec Monsieur le Baron, qui nous fit & vid embrasser de bonne sorte; & depuis ce temps-là ie n'ay reconnu en Monsieur Gassend que signes de bonne amitié, & ie le prends à tesmoin de quelle façon i'ay cultiué cette amitié renouvelée. Or en la renoüant Monsieur Gassend me tesmoigna son ingenüité, en ce qu'il me dit en presence de Monsieur le Baron, qu'il auoit escrit contre moy vne Apologie, & icelle enuoyée en Hollande pour la faire imprimer; mais qu'il la retireroit, & en empescheroit l'impression s'il pouuoit; & ie luy promis reciproquement qu'au cas qu'elle s'imprimast, ie n'y ferois aucune responce.

Au bout d'un an ie fus aduertty par Monsieur Tronson Secretaire du Cabinet, fils de feu Monsieur Tronson iadis aussi Secretaire du Cabinet, Intendant des Finances, & Conseiller d'Estat; si renommé pour ses vertus & merites, & pour les signalez seruices par luy rendus au feu Roy & à l'Estat: qu'estant à Lyon il auoit appris qu'un nommé Barancy Aduocat & Correcteur d'Impression, faisoit imprimer contre moy l'Apologie de Monsieur Gassend, où l'estois fort mal traité. I'en donnay aduis à Monsieur Gassend, qui me dit que ce seroit donc l'original de son Apologie qu'il auoit enuoyé l'an 1644. à Monsieur le Prieur de la Valette, auquel elle estoit adres-

sée, & lequel on auroit tiré de ses mains pour le faire imprimer à son insceu : mais que Barancy estant son amy, il luyalloit escrire pour luy defendre telle impression ; & en effe&t dès ce temps-là iusques à present elle n'a point paru Mais l'Automne dernier passé, Monsieur Gassend estant party d'icy pour s'en aller en Prouence sa patrie, apres nos mutuels complimens & protestations d'amitié ; Monsieur Luillier Maistre des Comptes, son bon & ancien amy, me donna de sa part vne Lettre au mois de May dernier passé, dont voicy la teneur.

MONSIEUR,

Je ne scaurois vous exprimer le sentiment de desplaisir que i'ay eu vous faisant ces lignes, pour l'insupportable peine que fait à mon esprit l'occasion que i'ay de les faire. Il y a deux ou trois ans qu'ayant pris la peine de me dire qu'un de vos amis vous auoit rapporté, qu'en passant par Lyon quelques-uns luy auoient dit qu'ils imprimoient vn liure de moy contre vous ; Je me doutay que l'on eust tiré des mains de feu Monsieur le Prieur de la Valette, l'original de la Responce que i'auois faite à vostre liure, & que l'on eust entrepris à mon insceu de l'imprimer : (car pour la copie qui en auoit esté enuoyée en Hollande, i'auois eu moyen de la retirer, & de la ietter dans le feu) dont ie demanday auec vn peu d'émotion, à ces Messieurs de Lyon ce que s'en estoit : Ils me respondirent qu'ils auoient veritablement recouuert ladite piece, & que leur dessein auoit esté de l'imprimer ; mais que puis qu'ils voyoient que i'y auois tant de repugnance, & que ie leur defendois si fort, ils ne le feroient point. M'estant reposé sur cela en telle sorte, qu'en passant par Lyon, ny ie ne m'aduisay point de leur en dire mot, ny eux aussi ne m'en dirent chose quelconque ; i'auois tousiours tenu la chose comme entierement

enseuclie. Je fus neantmoins bien surpris, quand il y a quelques iours, ils m'en enuoyerent vne copie, & m'escriuirent qu'ils en auoient enuoyé d'autres à nos amis de Paris, & ailleurs. Quand on m'auroit donné vn coup de poignard, ie n'en aurois pas senty vne douleur plus viue, pour auoir esté precedemment rauy, que cette chaleur de mes premiers mouuemens se trouuast terminée en vn simple-griffonnement, & que la chose ne fust point publiée. Dieu sçait les reproches que i'en ay faits à ces Messieurs, & le mescontentement que ie leur ay tesmoigné d'en auoir. Ils m'ont respondu que la piece estoit effectivement imprimée depuis plus de deux années; & qu'il falloit que ie leur pardonnasse l'impatience qui les auoit pris de la tenir serrée plus long-temps. Leur ayant demandé pourquoy à tout le moins ils ne m'en auoient decelé quelque chose en mon passage par Lyon? Ils ne m'ont respondu autre chose, sinon qu'ils craignoient que ie les obligeasse à vne suppression plus longue; & que c'estoit beaucoup que la patience ne leur fust point eschappée dès le moment que ie fus party d'aupres d'eux. C'est donc là, Monsieur, l'occasion de mon desplaisir, qui à la verité m'est d'autant plus insupportable, que la chose paroist chocquer le renoüement de nostre amitié, là où en effect, ie n'y ay contribué chose quelconque. Et si ce n'estoit le tesmoignage de ma propre conscience, ie m'en estimerois malheureux. Je n'ose presque vous prier de m'adjouster foy, quand ie vous proteste de n'en auoir rien du tout sçeu: pource que dans le desplaisir que vous aurez receu de cette nouuelle, il aura esté mal-ai-é que vous n'ayez eu quelque contraire impression: mais si faut-il qu'à tout le moins ie vous assure avec toute la créance que ie puis meriter, & vous iure mesme à foy d'homme d'honneur, que la chose a esté faite & tenuë avec tant de secret à mon esgard, que hors ce que vous m'en dites lors qu'elle se faisoit, ie n'en ay appris chose du monde iusques à ce qu'elle a esté publiée. Je voudrois seulement que vous peussiez lire dans mon cœur se que c'en est, pource qu'encore qu'il vous

demeurast quelque desplaisir à l'esgard de la chose, il ne vous demeureroit neantmoins aucun scrupule à l'esgard de ma volonté, qui demeure tousiours tres-constante à vous estimer, honorer, aymer & servir. Et pleust à Dieu qu'en tout cecy il se peust trouver quelque expedient pour vous satisfaire; pource que ie le ferois de tres-bon cœur, & ne me contenterois point de desauoir simplement, comme ie suis prest de le faire, & en priné, & publiquement, le procedé de ces Messieurs, pour auoir publié l'Apologie au preiudice des prieres, & si ie l'ose dire, des defenses tres-expresses que ie leur en auois faites, & de la parole qu'ils m'en auoient donnée. En vn mot, il n'y a rien que ie ne voulusse auoir fait ou donné, pour empescher, s'il se pouoit, que la chose fust arriuée, & pour vous donner toute sorte de satisfaction; comme à vne personne à qui ie souhaite toute sorte de contentement & de bonne fortune: En m'estimant malheureux, pource que la piece que ces Messieurs ont publiée contre mon intention, est de moy: mais tres-malheureux, si vous n'estes point disposé à croire qu'il n'y a point pour tout eu de mon fait en leur procedé, & n'estes point persuadé que ie sois, comme toutefois ie le suis veritablement, & de tout mon cœur,

M O N S I E U R,

*De Marseille, où ie suis par occasion,
ce XI. May M. DC. XLIX.*

Vostre tres-humble, tres-obeissant, & tres-affectionné seruiteur, GASSEND.

Il ne me faut point demander si ie fus surpris à la lecture de cette lettre, le doux style de laquelle me fit coniecturer que celuy de la piece imprimée deuoit estre bien aigre. Ie fus donc trouuer Monsieur Luillier en son lo-

gis, pour sçauoir de luy le nom de ces gens de Lyon qui m'auoient ioué cette piece, & le prier s'il auoit le liure de me le prester pour voir ce que c'estoit, auant que de faire responce à la lettre de Monsieur Gassend. Il me nomma Neuré, precepteur des enfans de Monsieur de Champigny, Intendant de la Iustice à Lyon; & Barancy cy-dessus dit, qui ne sont point Lyonnais, mais d'autres pays plus seconds en malins esprits; hommes que ie n'ay jamais offensé d'effect, de parole, ny de pensée; & me presta le liure, où ayant en peu d'heures parcouru l'Epistre de Neuré à Barancy, & l'Apologie de Monsieur Gassend, qui est vne Epistre à feu Monsieur le Prieur de la Valette: Et voyant d'autre costé la lettre de Monsieur Gassend, ie me consideray comme posé entre le marteau & l'enclume, bien entrepris à me refondre de ce que i'auois à faire. Neantmoins apres auoir rendu le liure, & consulté quelques miens amis, ie fis responce à Monsieur Gassend que ie croyois le contenu de sa lettre; & que l'accomplissement de la promesse qu'il m'auoit faite en presence de Monsieur le Baron de Tourues, ayant esté empesché par la perfidie & trahison de ses deux plus affidés amis, ie ne laisserois toutefois d'accomplir la mienne; & luy donnois derechef ma parole de ne respondre à son Apologie, bien que j'eusse assez de quoy y respondre pour defendre & sauuer mon honneur: mais que ie me ferois raison de Neuré.

A quatre iours de là vn homme d'honneur & probité vint de Lyon, où il auoit veu Neuré & Barancy, & parlé avec eux, qui mesmes luy donnerent le liure, & me dit qu'asseurement ils auoient publié le liure avec le consentement de Monsieur Gassend, qui peu auparauant estoit passé par Lyon, où il auoit fait quelque séjour s'en allant en Prouence. Nouuelles qui troublerent de nouveau le calme de mon esprit, & rengregerent mon cha-

grin : dans lequel estant surpris par vn gentilhomme de mes meilleurs amis , & des plus vertueux , fort sçauant en toutes les belles sciences , mais particulièrement en l'Astronomie & Astrologie ; ie luy en racontay le subiet , & luy donnay à lire la lettre de Monsieur Gassend , puis luy monstray le liure. Il me pria de luy laisser le tout pour deux ou trois iours , afin de le bien considerer pour m'en dire son sentiment : ce que ie fis.

M'estant reuenu voir apres les trois iours , il me dit , Qu'il estoit bien difficile à croire que Monsieur Gassend n'eust point esté consentant de la publication du liure , & qu'il en eust ignoré l'impression ; & qu'il croyoit facilement les nouuelles qui m'en auoient esté rapportées , veu son passage & sejour à Lyon , où il n'aura passé iour sans estre visité de Neuré & Barancy , qui auoient le soin de faire imprimer sa Philosophie d'Epicure , & aussi de son Imprimeur : Ioint qu'on luy a dit que depuis deux ans , l'impression de cette Apologie estoit sceüe de tous les esprits curieux de Lyon. Que le grand soin qu'a eu Neuré en sa Preface ou Epistre à Barancy d'induire certuy- cy à se charger publiquement de perfidie & trahison , pour descharger Monsieur Gassend d'intelligence , estoit vn ieu fait à plaisir , trop euidentement confirmé par l'aduis de l'Imprimeur au Lecteur , où les protestations de l'Imprimeur que le tout a esté fait à l'insceu de Monsieur Gassend , & par la violence de ses amis , sont trop affectées pour bien couvrir cette mesche , qui auoit encore besoin de la lettre de M. Gassend pour me mettre hors de soupçon. Que m'ayant ja autrefois mal traité à plats couverts , il me traittoit encore à present de mesme , avec plus de précaution , pource que la virulence de son Apologie estoit fort grande.

Que ie me ressouuinisse de ce qu'il m'auoit dit il y a trois ou quatre ans , lors que ie luy donnay la figure natale de

le de M. Gassend, dressée sur les Tables Rudolphines par son bon amy Monsieur de Valois, Tresorier general de France en Dauphiné, pour l'an 1592. le 22. Ianuier à 6. heures 42' du matin, ayant au milieu du Ciel le 13 degré 54' du Scorpion, & en l'Horoscope le 17 degré 20' du Capricorne, sous la latitude de 43 degrez; A sçauoir que Mercure & le Soleil conioints en la premiere maison dans le Verseau, signifioient en effect vn bel esprit, propre à toutes les sciences auxquelles il s'appliqueroit, & qui se rendroit celebre dans le monde: mais que Saturne seigneur de l'Horoscope de Mercure & du Soleil estant fort mal affecté en la 6 maison, à sçauoir exilé, retrograde, & battu du quadrat de Mars, seigneur du milieu du Ciel par application mutuelle; & la Lune dame de Saturne estant au quadrat de Mercure: cela marquoit beaucoup de maligne influence de Saturne & de Mars en tel esprit propre à dissimuler, facile à irriter, & prompt à se laisser emporter aux chaleurs de ses premiers mouuemens, comme il le reconnoist luy-mesme par sa lettre. Qu'à present i'en voyois les effects contre moy, comme Monsieur Descartes, gentilhomme de sçauoir & grande reputation, les auoit aussi esprouué pour bien peu de subyet. Qu'au reste dans toute l'Apologie de M. Gassend il n'y auoit rien dont il puisse tirer auantage contre moy, que la croyance que i'ay eüe du branlement de la Terre, apres l'experience du Gentilhomme Dauphinois qui en donna la premiere nouuelle, la mienne, & celle de plusieurs curieux de Paris, dont il fait vn gros plat, & vne bonne partie de son Apologie. Mais que Monsieur Gassend auoit tort de me reprendre, & brocarder si rudement sur ce subyet: Tant parce que l'année 1644 ie m'en suis retracté & repris moy-mesme, & fus le premier qui descouuris la tromperie de l'experience: comme appert par la Defense de mon Astronomie reformée con-

tre Fromimins Professeur aux Mathematiques du Roy de Dannemark, en la page 30. Que parce que M. Gassend luy-mesme y fut trompé comme les autres; & s'il n'a creu ce tremblement, pour le moins il l'a tenu problematique, & l'a traité comme tel, iugeant la chose digne d'estre publiée, & en a fait vn discours de six pages à la fin de son epistre à Monsieur Naudé, imprimée à Paris chez Monsieur Cramoisy l'an 1643. Et que pour le surplus du contenu en l'Apologie, il m'estoit bien aisé d'y respondre avec auantage: Mais parce qu'elle estoit farcie d'iniures & brocards, d'alterations de mes textes, ou de leur sens, & de fausses suppositions que M. Gassend fait souuent pour se donner beau jeu à me decrier, ie la deuois traiter comme j'ay traité celle du P. Dularis Recollect, contre ma Theorie & Pratique des Longitudes, lequel ne s'en est pas vanté du depuis; & que i y estois d'autant plus obligé pour mon honneur, que Monsieur Gassend estoit bien d'autre reputation parmy les sçauans, que le Pere Dularis. Que le faisant, on ne me pourroit blasmer iustement pour ma promesse faite à M. Gassend, puis qu'il ne m'auoit pas tenu la sienne, ou eu le soin qu'il deuoit pour l'observation d'icelle; & que ses amis mesmes l'auoient aussi trompé en leur promesse, supposant son innocence.

Ayant laissé dire à ce Gentilhomme mien amy tout ce qu'il auoit sur le cœur, ie luy repartis: Que toutes les raisons qu'il auoit alleguées pour me faire soupçonner M. Gassend d'infidelité, n'estoient que des conjectures qui ne concludoient rien de certain & euident. Mais que l'Epistre de Neuré à Barancy, l'attestation de l'Imprimeur qu'il a esté par eux violenté, & la lettre de M. Gassend qui desaduouie le procedé de ces gens au preiudice de ses prieres tres instantes, & defenes tres expresse, voire de la parole qu'ils luy auoient donnée, prouuent si

euidemment la malice & perfidie de ces deux hommes, que ce seroit pecher contre la raison de quitter preuues si claires, pour s'arrester à des simples coniectures. Que ie ne pouuois croire que Monsieur Gassend se fust voulu reconcilier avec moy, pour puis apres faire imprimer telle Apologie. Car qu'auoit il affaire de mon amitié pour cela ? Et que ne l'auoit-il plustost mise en lumiere, pour puis apres les coups fourrez se reconcilier ? Ou qu'ay-je fait depuis ce temps-là contre l'amitié renouée ? Qu'en vn mot M. Gassend m'ayant par sa lettre iuré à foy d'homme d'honneur que la chose auoit esté faite & publiée à son insceu, ie dois, & veux le croire, & en suite ne faire aucune responce à son Apologie, comme par deux fois ie luy en ay donné ma parole, laquelle iusques icy ie n'ay encore faussé à homme du monde, estant mesmes marry qu'elle luy fera peu d'honneur.

Que Monsieur Gassend auoit eus ses desseins dans les sciences, & moy les miens ; que son grand dessein apres lequel il a trauaillé si long-temps, auoit esté de mettre au iour sa Philosophie d'Epicure, dont il a desia publié la vie, & l'a voulu faire passer pour vn exemplaire de vertu : Et que moy i'auois eu deux desseins qui n'estoient pas petits, à sçauoir de reformer l'Astronomie, laquelle Ptolomée, Copernic, ny Tycho Brahé auoient fondé sur des faux principes ; & de reformer encores l'Astrologie, laquelle iusques à present auoit esté si decriée par ses ennemis qui l'ignoroient, & ce avec quelque apparence de raison ; veu que outre les absurditez & sottises dont elle estoit farcie dans les liures qui en traittoient, elle n'auoit ny face, ny forme de science, bien qu'elle soit la plus noble & diuine des sciences naturelles. Que pour le premier, ie me resiouyssois de voir que M. Gassend, tenu pour sçauant Astronome, n'auoit rien eu à dire contre mon ASTRONOMIA RESTITUTA,

en toute son Apologie, où il ne m'a pas esparagné en tout ce dont son esprit s'est peu aduifer. Que pour le second, qui est mon *ASTROLOGIA GALLICA*, non encore mise en lumiere, mais acheuée en vingt. six liures; ie laisse à iuger, non aux Astrologues, mais aux sages en general, si Monsieur Gassend est pardonnable de la nier, s'en mocquer, & la tenir pour des bourdes & des chymeres en son Apologie, puis qu'il ne l'a encore veüe, & n'a iamais dressé, ny iugé aucune figure celeste? Mais si n'en estant capable, il veut prendre Aduocat pour plaider cette cause *in Senatu Astrologorum*; Et qu'oultre ce qui est dit cy-dessus de son esprit, de sa reputation & de ses mœurs, on vienne à considerer vn Iupiter dans le Sagitaire dans la 11. maison, qui l'a rendu si heureux en amis de qualité, Iusticiers, Ecclesiastiques, Gouverneurs des Prouinces, & semblables, qu'il a passé la meilleure part de sa vie en telles maisons, plustost en qualité d'amy que de seruiteur domestique: Et que la direction du milieu du Ciel au quadrat de Mars bien affecté en la 2. au sextil du Soleil & de Mercure, & de plus, seigneur du milieu du Ciel, l'auoit fait Professeur du Roy au Mathematiques: mais que la mesme année s'estant trop efforcé à parler en ses premieres leçons, ayant l'estomac & les poulmons foibles à cause de Saturne seigneur de l'Horoscope tres-mal affecté dans la 6 maison *in Cancro*: Et s'accomplissant la direction de l'Horoscope au quadrat de Saturne; Il seroit tombé en vne maladie de poitrine & de poulmons, dont il auroit languy pres de deux ans, avec grand peril de la vie, sans en estre encore guery: Il n'y a aucun doute qu'il se verra condamné à se reconnoistre subiet à l'influence des astres, & à leur faire hommage de son bel esprit, de son sçauoir, de sa renommée, de ses amis, & choses semblables. Et que par provision sa figure natale sera iointe à celles de Picus Miran-

dulanus, & Sixtus ab Hemminga, pour seruir vn iour de trophée à l'Astrologie. Et quant au mouuement de la Terre, selon Galilée & Copernic, qui a esté le principal subiet de nostre controuerse, il est tres-certain que qui que ce soit ne le peut soustenir, à moins que de nier l'Astrologie, comme fait Monsieur Gassend, ainsi que ie demonstre de propre & veritable demonstration, *in ASTROLOGIA GALLICA*, laquelle tres-euidemment destruit cette opinion, supposant la vertu des Dodecatemories si euidente en la susdite figure.

Mais laissons Monsieur Gassend, auquel ie veux demeurer bon amy, & tres-affectionné seruiteur s'il m'en iuge digne; & venons à ces Messieurs de Lyon, qui ne sont point de Lyon, ny ne tiennent rien du Lyon, mais tout à fait du Renard, du Loup, & de l'Aspic.

Ie dis doncques, Monsieur, que si Neuré & Barancy n'eussent fait que simplement imprimer & publier l'Apologie de M. Gassend contre ses prieres & defenses, & contre leur parole donnée, ils n'auroient en cela que témoigné vne grande malignité enuers moy, qui ne les connoissois pas seulement de nom, & vne grande perfidie enuers M. Gassend, laquelle fait bien voir, *quàm parui faciant Virum*; lequel Neuré en sa Preface appelle si souuent, *Maximum*: mais d'y auoir adjousté cette Preface, en laquelle Neuré ne s'est pas contenté par mespris, iniures atroces, menteries & impostures de vomir son fiel contre moy & mon honneur, pour se faire connoistre & estimer par les ignorans; ains de surplus a introduit feu Monsieur le Prieur de la Valette vostre oncle, & le plus ancien & meilleur de mes amis, homme aagé de quatre-vingts ans, le plus doux, le plus respectueux, & le plus vertueux des hommes que i'aye connu, tout paralytique & impotent, qui mesmes ne pouoit parler qu'avec bien de la peine; & luy fait iouer le

personnage non d'un homme de tel aage, probité & modération, mais d'un ieune fol & enragé, luy faisant reciter huit pages de mespris, infamies, & impostures contre moy ; & encores dit à la fin, *Quibus addere longè plura facile possem, omnia si complecti memoriâ licuisset tam præclare stomachantis verba senis* ; n'est-ce pas estre agité d'un esprit diabolique ? A ce compte ce n'est pas un combat d'un contre un, mais de quatre contre un, dont y en a trois qui ne peuuent prouuer auoir iamais esté offensez de moy, qui est certes vne bien grande lascheté ; mais ny leur nombre, ny leurs armes ne sont capables de m'estonner.

Or la fourberie & l'imprudence de Neuré paroissent euidentement à trauers l'auëuglement de sa passion, en ce qu'il fait vomir le plus noir de son venin sur moy par feu Monsieur le Prieur vostre oncle, long-temps apres sa mort, & fait parler un mort qui n'est plus en estat de le démentir, comme il ne manqueroit à le faire par escrit public s'il viuoit encore ; & ne fait pas monter cette ame comme vne furie du fonds de l'Enfer, mais la fait descendre du Ciel, où ie croy qu'elle soit bien-heureuse, & en sa pureté supreme, pour se venir salir dans l'ordure d'une infame détraction ; qui est certes vne espece d'impieté non encore veüe en ce temps, où (*proh dolor atque nefas !*) l'on en pratique de toutes les sortes parmi les fols & libertins esprits. Et que ce que ie dis soit vray, il est bien facile de le prouuer. Premièrement, par le style des huit pages d'inectiues qu'il fait proferer à feu Monsieur le Prieur, lequel i'ay tousiours fort honoré dans mes ouurages, & partant n'a iamais eu sujet de me traiter de la sorte : lequel style ne ressent ny l'aage, ny la probité, ny la vertu d'un tel vieillard, comme diront tous ceux qui l'ont conneu particulièrement : mais ressent tout à fait la ieunesse, la fougue, l'enuie, & la mali-

gnité de Neuré ; & entre le style de ce que dit Neuré, & de ce qu'il fait dire à feu Monsieur le Prieur, il n'y a autre difference sinon qu'il luy fait dire le pire, & avec plus de fougue. Voyez l'imprudence ! Secondement par vous-mesme, Monsieur, puis que Monsieur vostre oncle n'est plus en ce monde pour en tesmoigner. Car il vous souviendra, s'il vous plaist, que luy ayant sceu par lettres de M. Gassend l'an 1646. que ie passerois à Aix avec Monseigneur le Comte de Chauigny, second Ministre de l'Estat de France, qui m'auoit fait l'honneur de me conuier à estre de son voyage à Antibes ; il vous pria & coniura de prendre garde que ie ne passasse point, sans luy donner le contentement de ma visite en vne maison des champs où il estoit retiré, & languissant ; pour le grand desir qu'il auoit de me reuoir encore vne fois, puis que l'occasion s'en presentoit, apres vne connoissance & bonne amitié entre nous deux de plus de quarante années. Estans arriuez à Aix, vous ne me fistes pas seulement l'honneur de m'en prier ; Surquoy ie vous respondis que ie n'auois garde de passer sans me donner l'honneur de le voir, puis que ie le scauois encore en vie, & que i'en estois si proche : mais outre ce me fistes l'honneur de m'y faire accompagner par Monsieur vostre fils. Il peut tesmoigner qu'en nostre rencontre les larmes de ioye vindrent aux yeux du venerable Prieur, qui me iura qu'il croyoit que la ioye qu'il receuoit de cette visite, le feroit viure encore dix ans. Mais ma ioye fut grandement troublée par la douleur & affliction que ie sentis, le voyant en si pitoyable estat, qui ne luy promettoit plus gueres de vie. Il me fit fort bonne chere, & sa foiblesse avec la difficulté qu'il auoit de parler, furent cause que nous n'eusmes pas grand discours, & sur tout des Mathematiques. Seulement il me parla des fautes qu'il auoit remarquées en l'Astronomie Philolaïque d'Ismaël

Buillaud Prestre Poicteuin, & luy ayant fait voir les ordures & vilaines iniures dont ce Prestre m'auoit traicté à tort touchant l'équation du temps, que le bon Prieur n'auoit encore veu dans ce liure; il me dit que s'il eust sceu que cela estoit dans le liure, il ne l'eust iamais acheté. Et que si Buillaud à son retour de Venise le visitoit, il luy en feroit la reprimende qu'il meriteroit. Or qui est l'homme de bon sens qui puisse ajuster telles paroles & telle reception, avec la furieuse inuectiue des huit pages, soit deuant, soit apres la reception? Troisièmement, il se prouue par la Preface mesme de Neuré, qui fait dire ces huit pages à Monsieur vostre oncle, non deuant nostre entreueuë, en quoy elles seroient plus excusables; mais apres, en quoy elles ne le seroient du tout point, comme il se void en ces paroles qu'il se fait adresser par Monsieur le Prieur: *Talia & pluralongè ineptiora iactantem ipse illum audisti; cum hac transiens unum sequeretur potentum, &c.* Ce qui ne pouuant estre creu par aucun homme sage, & beaucoup moins par vous Monsieur son nepueu, qui me fistes tant d'honneur & de demonstration de bienveillance: Il est donc certain que par insigne imposture & imprudence Neuré luy fait dire telles paroles apres sa mort, qui arriua l'an 1647. De sorte que Monsieur le Prieur de la Valette est hors de ce combat. Or Monsieur Gassend & moy sommes d'accord. Je n'ay donc plus à faire qu'à Neuré & Barancy, que j'auray bien-tost expediez, & dont l'imprudance paroist encore en ee, que par telle impression ils ont exposé Monsieur Gassend leur amy, sans aucune necessité, ny vtilité, soit de luy, soit du public, au blasme qu'il receura par ceux de Paris qui nous ont veu en si bonne intelligence depuis nostre reconciliation; & ont publié quelle est sa sincerité & douceur de naturel, dont luy-mesme se vante, & qui luy est attribuée par ceux qui voyans son Apologie,

gie, le connoistront mieux à fonds : voire l'ont exposé à de nouvelles fatigues & picoteries, si l'humeur me prenoit de luy respondre, n'estant pas nouice à me defendre, ny mon espée ne tenant pas au fourreau comme l'on sçait bien.

Orie veux respondre à deux poincts de la Preface de Neuré. Le premier, que par mon importunité j'auois extorqué de M. le Prieur de la Valette, & de M. Gassend leur approbation de mon inuention des Longitudes. *Quis non miretur, dit-il, improbam ipsius sedulitatem in emendicandis, aut veriùs extorquendis tantorum virorum suffragiis? quid non egit vt extunderet quas flagitabat adulatione plenas epistolas? quanto subinde fastu impetratas vulgauit?* Paroles tirées de la seconde page de l'Apologie, où Monsieur Gassend dit à Monsieur le Prieur : *Meministi certè cùm ille suffragium nostrum expeteret, vt pro euulgata sua illa Longitudinum inuentione mercedem quampiam consequeretur, quanto sudore annuerimus, &c.* Et plus bas : *Meministi etiam cùm ille editis quibusdam litterarum nostrarum fragmentis, vberiores deposceret, &c.* Mais paroles contraires à la verité. Car mon inuention des Longitudes estant mise en lumiere, j'en enuoyay le liure aux plus renommez Astronomes de l'Europe, avec lettres expositiues de l'iniustice qui m'auoit esté faite par la seconde sentence de mes Commissaires, entierelement opposée à la premiere; & par lesquelles ie les priois simplement de m'en escrire leur iugement en toute verité & iustice mathématique. Et n'est possible de prouuer le contraire par mes lettres escrites à M. le Prieur, & à M. Gassend, non comme à mes amis, mais comme à personnes capables de l'affaire: Et n'est pas vray que ie leur en aye escrit pour la seconde fois, pour auoir d'eux plus amples approbations. Les astres ne m'ont point donné vn naturel à flatter, ou mendier : l'ay Aries en

mon Ascendant, & Mars seigneur d'iceluy au Trine de tous les autres planetes conioints, ce qui me fait trop genereux pour en venir là; & ne croy pas qu'il y ayt au monde vn homme plus ennemy de la flatterie, fourberie, menterie & imposture que ie suis, ny qui aye plus d'aersion à faire le mendiant, ou l'importun. Mais puis que tant de gens m'ont rapporté que M. Gassend se plaignoit tousiours de ce que j'auois fait imprimer son approbation de mes Longitudes, & qu'en son cœur il auoit tousiours gardé cela contre moy; Je luy demanderois volontiers si luy & feu M. le Prieur m'auoient donné leur approbation de mon inuention selon leur sentiment, ou contre leur sentiment? S'ils disent contre, ils confesseront leur iniustice, voire leur imprudence, ayans affaire à vn homme qu'ils s'imaginoient affamé d'honneur & de gloire, & qui ne manqueroit d'en faire vanité, & s'en preualoir pour obtenir sa recompense, & tromper feu Monsieur l E. Card. de Richelieu. Et de plus ils accuseront d'ignorance Galilée, Monsieur de Valois, Hortensius, & Longomontanus, qui ont approuué l'inuention; voire leur honneur les obligeoit à s'en retracter, & refuter mon inuention: ce qu'ils n'ont osé faire. S'ils disent selon leur sentiment, c'est à dire, selon la verité, comme il est bien plus croyable; quelle faueur ay-je receu d'eux, qui estoient mes anciens & intimes amys, que ie n'aye aussi receu de ces autres sçauans Astronomes, dont vne partie ne m'estoit cogneuë que de nom, & n'estoit mesme de ma Religion? Mais il me suffit de sçauoir que feu Monsieur le Prieur vostre oncle ne s'en est iamais plaint à moy, ny par lettres, ny de viue voix, quand j'eus l'honneur de le visiter l'an 1646.

Le second point de la Preface de Neuré est, quand il dit que Monsieur Gassend vaincu par les prieres de

cant d'amis qui me protegeoient , & plaignoient le malheur qui m'estoit imminent par son Apologie enuoyée en Hollande pour estre imprimée , la retira pour la brusler. Ce qui est encore vne pure fausseté : car M. Gassend n'en fut iamais prié de ma part ; ny n'ay point recherché son amitié , apres que j'ay veu qu'il ne m'auoit traicté en amy : il n'y a eu que Monsieur le Baron de Tourues Seigneur Prouençal , que ie n'auois pas l'honneur de cognoistre auparauant , lequel me parla de reconciliation lors que j'y pensois le moins , & qui la fit par sa prudence & bonté ; & Monsieur Gassend de son seul mouuement promit d'empescher l'impression de l'Apologie : comme tous deux peuuent encore tesmoigner à la confusion de Neuré. Et par ces deux poincts on peut iuger de la sincerité , tant de l'Apologie que de la Preface, qui sont secondes en semblables suppositions.

Pour tout le reste du contenu en la Preface, où Neuré estalle si artistement sa mercerie de fleurs de Rhetorique , & paroles en l'air qu'il employe à me deschirer, cela est indigne de ma responce , & de mon temps. S'il estoit homme de science , qui m'eust objecté quelque belle difficulté , peut-estre n'aurois-je pas desdaigné de la luy resoudre : mais sa Preface n'estant qu'un caquet pedantesque d'iniures , ie le renuoye aux harangues des Halles de Paris , pour exercer son humeur. Et puis que toute cette affliction m'arriue extraordinairement , ie la veux receuoir chrestienement , & avec le Patron de ma Paroisse prier DIEV pour Neuré & Barancy , *Ne statuat illis hoc peccatum*. L'enuie ne leur fera que trop rude supplice ; & leur affliction me seruira de bonne mortification.

Et quant à vous , Monsieur , qui voyez le des-honneur que ces gens font à la memoire & aux Manes de

feu Monsieur le Prieur vostre oncle, vous en ferez com-
me il vous plaira. Pour moy j'ay fait ce que sa vertu, son
ancienne amitié enuers moy, & sa bonne reception à
nostre derniere entre veuë, ensemble l'honneur & la
bien-veillance qu'il vous pleust me tesmoigner alors,
m'obligeoient à faire & laisser à la posterité pour sa iu-
stification. Et au reste ie vous supplie tres-humblement
me conseruer l'honneur de vos bonnes graces, & de
croire que ie rechercheray tous les iours de ma vie l'oc-
casion de vous tesmoigner effectiuement que ie suis,

MONSIEVR,

De Paris ce 23. Iuin 1649.

Vostre tres-humble, tres-obeyssant, &
tres-affectionné seruiteur,
I. B. MORIN, Professeur du Roy
aux Mathematiques à Paris.



RESPONSE D'VN AMY
DE MONSIEVR GAVTIER
Conseiller au Parlement de Prouence,

*A la Lettre de Iean Baptiste Morin, Medecin,
Professeur en Astrologie.*



MONSIEVR,

Le déplorable estat, où nos desordres ont reduit cette mal-heureuse Ville, tient Monsieur Gautier tellement occupé, qu'à peine a-t'il le temps de songer à ses plus vrgentes affaires. C'est pourquoy vous ne deuez pas trouuer estrange s'il se dispense de respondre pour le present à la lettre que vous luy auez escriite le 23. du passé. Mais afin que vous n'en soyiez pas en peine, j'ay bien voulu, comme son seruiteur & vostre amy particulier, vous faire ses excuses, & vous rapporter toujours parauance, ce qu'il ne manqueroit pas de vous rescrire luy-mesme, s'il estoit de loisir, & qui pourra mesme suffire pour vous faire attendre patiemment sa response.

Je vous diray donc premierement, que si le sujet de vostre lettre luy doit estre seulement connu, à vostre dire, parce que Monsieur Gassendy est à Aix, vous deuez croire qu'il n'en sçait rien, puis que cette personne en

est dehors il y a desja long-temps. Mais cela n'empesche pas qu'il ne l'ait appris d'ailleurs, outre ce que vous le luy exposez fort au long dans le recit que vous en faites; par lequel vous travaillez à luy faire comprendre qu'on vous veut mettre mal avec feu son Oncle Monsieur le Prieur de la Valette : mais ie ne croy pas qu'on en vienne à bout, pour peu que vous soyez raisonnable; & au pis aller, sa memoire est, Dieu mercy, en telle veneration, qu'on ne sçauroit désormais rien entreprendre contre luy qui puisse donner la moindre atteinte à sa reputation, & quand par mal-heur l'enuie de vous faire valoir à ses despens, vous donneroit ce mauuais dessein, la consideration de ce qu'il a esté, & de ce que vous estes dans l'opinion des gens d'esprit, guerira toûjours aisément ses Amis de toute apprehension; si bien que de ce costé-là les voila hors d'interest.

Maintenant pour le regard de ces autres Messieurs, dont vous vous plaignez, ie ne sçay pas pourquoy vous vous adressez à Monsieur Gautier; car ne s'estant pas adonné aux sciences pour lesquelles vous estes en different, sa profession ne le requerant point aussi, il n'en sçauroit estre Iuge competant quant au fond ou principal; Et pour l'accessoire ie ne voy pas que vous deuez beaucoup plaider, puis qu'il consiste à si peu de chose; ne s'agissant à vostre conte, que de ce qu'on a fait imprimer quelques liures contre vos opinions sans vostre congé, & qu'on fasse parler ce bon Vieillard dans l'un d'iceux à vostre defauantage. Si vous en auez escrit plustost pour apprendre les sentimens de vos Amis, que pour crier contre vos parties, ie croy que vous receurez les miens en bonne part sur la protestation que ie fais de ne vous rien dire que la verité; apres laquelle il me semble que vous deuez mettre vostre esprit en repos, & laisser là tous ces procez dont les escritures vous couste-

ront toujours beaucoup plus à imprimer, que ne scauroit valoir toute la satisfaction que vous en deuiez iamaïs pretendre, sans le hazard que vous courrez d'estre entierement condamné, non tant pour auoir affaire à forte partie, que pour n'estre possible pas bien fondé. Il me semble mesme que vous en pourriez bien comprendre quelque chose si vous auiez la force d'examiner avec moy, sans emotion, les circonstances de vos griefs.

Le premier, dites vous est, qu'à vostre insceu Monsieur Gassendy fit imprimer l'année 1642. à Paris deux Epistres de *Motu impresso à Motore translato*, pour fortifier l'opinion du mouuement de la Terre, contre lequel vous auiez écrit; sur quoy vous vous seriez escrié, au perfide, au desloyal, au traistre, & auriez fait à mesme-temps vn libelle diffamatoire contre la reputation de ce grand homme avec tant d'animosité que vous ne l'auiez pas seulement voulu faire passer pour vn violateur des loix de l'amitié, & pour vn ignorant; mais encores, si vous eussiez pû, pour vn nouateur, vn broüillon & vn heretique. Que vous en semble? n'est-ce pas là vn estrange procedé; scauez-vous bien qu'en bonne iustice ces calomnieuses inuectiues mises en public sont^a condamnées à estre exterminées avec^b l'autheur s'il ne prouue son dire, ou s'il ne se fait declarer fol pour iouyr du benefice de la loy, qui veut que^c *furiosus iniuriam facere nequeat*. Et cependant c'est vous encore qui estes le demandeur en reparation d'iniures, & le plaignif en querelle du tort que vous pretendez vous auoir esté fait par cet Autheur, en écriuant, dites-vous, pour le soutien d'une opinion que vous auiez combatuë. Prenez garde: en bonne foy estes-vous raisonnable? Et cette plainte n'est-elle pas ridicule? Tout de bon pensez-vous auoir droit, & pouuoir persuader mesmes aux sots

^a Leg. *constitutionibus*. ff. de *iniuriis* § *fam. libellis*.
^b L. *si quis*. C. de *famosis libellis*.
^c L. *illud*. ff. *cod.*

qui vous prestent l'oreille, que c'est vn crime d'estre pour vne opinion lors que vous escriuez contre ? Et quand il se trouueroit des gens assez bestes pour admettre cette vision, Monsieur Gassendy en est-il coupable ? Quoy, il a songé à vous quand il a escrit ? A qui pensez-vous faire croire cela ? Estes-vous si peu inuentif dans la demangeaison d'escrire, que vous n'ayez pû trouuer le sujet d'un chetif liuret qu'en faisant vne si grossiere querelle d'Alemand ? Sçachez que Monsieur Gautier à qui vous vous adressez, a pû cent fois ouyr dire à feu son Oncle, que tout ce que vous auiez escrit contre le mouuement de la Terre estoit la plus impertinente chose qui iamais sortit d'esprit humain. Partant pourra-t'il croire, ou qui que ce soit, que le plus grand & le plus iudicieux Philosophe de nos iours, se soit voulu proposer la refutation de tant d'inepties manifestes à tout le monde ? Cependant vous croyez en vous en plaignant pouuoir persuader que vous auez droit d'escrire contre luy, comme attaqué ; & que par ce moyen vous vous donnerez grande reputation comme si vous luy auiez pû faire teste. Mais croyez-moy, ne vous abusez pas d'auantage, & ostez-vous de l'esprit de pouuoir iamais faire comprendre que vous soyez homme pour luy. Vous seriez estonné à mourir, si vous entendiez les iugemens qu'on en fait, n'y ayant petit ny grand qui n'aduouë & n'assure constamment, qu'il y a aussi peu de comparaison entre ses productions & les vostres, qu'entre les rayons du Soleil & les exhalaisons d'un fumier. Et neantmoins vous voulez mettre en paralelle, ie ne sçay quels desseins cornus que vous ne pouuez mesme auorter, avec les merueilleux ouurages qu'il enfante tous les iours. Voyez ie vous prie quelle difference ; le trauail de ce rare homme ne tend à autre fin qu'à bannir des sciences les sottes erreurs, en descourant

& en-

& enseignant, comme il fait, les belles veritez; & le vostre qu'à maintenir l'ignorance, & faire valoir les fourbes, en commentant sur vn art plein de fausseté & d'imposture. Sa doctrine est fondée, ou sur les solides autoritez des plus grands Philosophes qui ayent vescu, ou sur les sensibles connoissances des plus rauissantes experiences qui se pratiquent: celle de vostre dessein a pour garant le rebut de tous les siecles, elle a tousiours esté reiettée des plus grands hommes, & condamnée des loix comme vne punissable supercherie inuentée par des filoux & des charlatans. Enfin, son dessein tend à destruire les abus, & le vostre à les restablir, les fortifier & les entretenir contre le loüable sentiment de toute l'antiquité, les feueres decrets des loix & les rigoureuses censures de l'Eglise. Ne prenez-vous point garde que vous escriuez à vn Iuge à qui le Code ordonne d'enuoyer au gibet toutes sortes d'imposteurs & de

deuins. ^d *Sileat omnibus, dit-il, perpetuò diuinandi curiositas: etenim supplicio capitis, &c.* ayant dit auparauant. ^e *Ars Mathematica est damnabilis & interdicta*, au tiltre, ^e *de Maleficis & Mathematicis*, dernier terme qui s'entend tousiours des Astrologues, comme l'explique nettement le Decret en les bannissant du Christianisme. ^f *Planetarios quos Mathematicos vocant Christiana & vera pietas expellit & damnat.* Et vn peu apres quand il en décrit l'office, il dit que ^g *requirere stellarum cursus, & euentus ex his futurorum rimari*, c'est vne abominable superstition de l'idolatrie Egyptienne, qu'il desfend puis apres tres-expressément aux Chrestiens. ^h *Non licet Christianis obseruare & colere Lunæ aut stellarum cursus aut inanem signorum fallaciam.* Et plus haut apres auoir generalement detesté toutes les especes de deuinerie. ⁱ *Neque illi, dit-il, ab hoc genere perniciosæ superstitionis segregandi sunt qui olim Genethliaci propter natalium con-*

^d L. Nemo aruspice.
^e G. de maleficis & mathematicis.
^e L. Nullus aruspex.
^e G. end.
^f Caus. 26.
^g q. 2. can. 8.
^g & fusius quest. seq.
^g can. 1.
^g Can. 9.
^h Ibid. q. 5.
^{can. 3.}
ⁱ Ibid. q. 2.
^{can. 6.}

siderationes dierum, nunc autem vulgò Mathematici vocantur: nam & ipsi quamuis veram stellarum positionem, cum quisque nascitur, consequerentur, tamen &c. Mais si vous n'en voulez croire, ny droict Ciuil, ny droict Canon, au moins ne pouuez-vous pas refuser de vous en rapporter aux Constitutions Apostoliques; & vous qui voulez qu'une censure d'une Congregation de Cardinaux puisse declarer vne opinion heretique, & en faire vn article de foy, sans doute vous donnerez bien plus de creance à vne Bulle d'un Pape qui du consentement de toute l'Eglise condamne hautement cette malheureuse Astrologie que vous pretendez reestabli, prononçant anatheme contre tous ceux qui s'en meslent. Considérez vn peu comme elle en parle: apres auoir beaucoup fui miné contre l'insolence des hommes qui pretendent pouuoir deuiner les choses futures, & les ayant traittez d'idolâtres, d'abominables, d'execrables. *Tales, dit-elle, in primis sunt Astrologi, olim Mathematici Genethiathentes, diuinæque dispositionis ordinationem suo tempore reuelandam præuenire audacissimè satagentes, hominum natiuitates seu genituras ex motu siderum & astrorum cursu metiuntur, ac indicant futura siue etiam præsentia & præterita occulta, atque ex puerorum ortu & natali die, siue quauis alia temporum & momentorum vanissima obseruatione, & notatione de vniuscuiusque hominis statu, conditione, vitæ cursu, honoribus, diuitiis, sobole, salute, morte, itineribus, certaminibus, inimiciis, carceribus, cadibus, variis discriminibus, aliisque prosperis & aduersis casibus, & euentibus, præcognoscere, iudicare & affirmare temerè præsumunt, non sine magno periculo erroris & infidelitatis. Cum S. Augustinus, &c. Hi igitur leuissimi & temerarij homines in miserandam animarum suarum ruinam, graue fidelium scandalum, & Christianæ fidei detrimentum futuros rerum euentus, & quacunque prosperè*

Sixte V.
an. 1586.

vel aduersè obuentura sunt ac actus humanos; ea denique quæ ex libera hominum voluntate proficiſcuntur astris ſideribusque adſcribunt, eiſque eam facultatem vim ſeu virtutem & efficaciam tribuunt ſignificandi futura, & ad præcognita ita inclinandi, vt ſic omnino nec aliter euentura ſint, atque ob eam cauſam de iis rebus omnibus iudicia facere, prognostica, prædictiones, & præcognitiones, ſibi aſſumere, & palam venditare non dubitant, quibus non pauci rudes & imperiti, aliique nimis creduli, & imprudentes tantam fidem præſtant, vt ex huiusmodi iudiciorum & prædictionum præſcripto, aliquid certò eſſe credant aut ſperent, quorum ſanè & mendacium magiſtrorum temeritas, & infelicium diſcipulorum credulitas magnopere deploranda eſt, qui vel diuinis litteris admoniti, &c. Hac perpetuò valitura conſtitutione, Apoſtolica authoritate ſtatuiſmus & mandamus vt tam contra Astrologos Mathematicos & alios quoscuque dicta Iudiciaria Astrologia artem exercentes, &c. aut facientes iudicia & natiuitates hominum quibus de futuris contingentibus ſucceſſibus, fortuitiſque caſibus, aut actionibus ex humana voluntate pendentibus aliquid euenturum affirmare audent, etiamſi id ſe non certò affirmare aſſerant, aut proteſtentur; quam contra alios vtriuſque ſexus, &c. tam Epiſcopi, Prelati, Superiores, &c. quam Inquiſitores diligentiùs inquirent & procedant, atque in eos ſeucrius canonicis pænis & aliis animaduertant.

Tout cela n'eſt que trop ſuffiſant à vn Chreſtien pour luy faire auoir horreur de voſtre deſſein. Mais ſi vous en voulez encore vne conſtitution plus recente; voyez celle du feu Pape qui condamne au dernier ſupplice tous ces impoſteurs d'Aſtrologues qui veulent faire des Prognostics ſur les natiuitez des Grands : & n'en deplaîſe à ceux qui vous en donnent recompenſe, n'eſt-ce pas vne honte que vous faſſiez aujourd'huy gloire dans vn eſtat Chreſtien reglé par de bonnes loix, de vouloir reſtaur-

Urbanus
VIII. an.
1636.

rer, exercer, prescher, & enseigner vne si estrange superstition condamnée par toutes les loix diuines & humaines, & anathematifiée par tant de censures Ecclesiastiques, & que vous osiez encore à la confusion de ce Royaume, donner le tiltre d'*Astrologia Gallica*, à vne si extrauagante & pernicieuse resuerie, dont la fourbe ne seroit pas mesme assez bien notée par le nom d'*Astromantia Chaldaica*.

Mais apres toutes ces veritez pouuez-vous bien auoir assez de front pour comparer au moins ces vetilles (que vous appelez vostre grand dessein) avec les miraculeux trauaux du fameux Gassendus? il ne fait rien que tout aussi tost les Imprimeurs ne luy arrachent des mains, & que toute l'Europe n'enleue encore plus viste aux Imprimeurs. Je vous prie où en estes-vous de vos liurers, l'impression desquels vous cause tant de frais, comme vous vous plaignez? trouuez-vous Relieur qui vous les vueille achepter seulement à la rame? & les auis que vous donnez, que c'est vous qui en tenez boutique, attirent-ils forces marchands? ne voyez-vous pas bien qu'aucun n'en fait estat que vous seulement, & qu'en les prisant vous n'en hausserez point le prix? Ne sçauuez-vous pas qu'à bon vin. comme on dit, il n'est point besoin de bouchon, & que vous ne ferez point venir les chalans avec ces beaux escriteaux, ny en louiant si fort vos denrées, qui vous pesent bien, à ce que vous donnez à connoistre, & dont vous avez grand enuie de vous deffaire.

Horat.

-----largius aquo

Laudat venales qui vult extrudere merces.

Et pour les autres encores à venir, ce grand dessein, cette *Astrologia Gallica*, dont vous faites tant de bruit, & que vous vantez depuis si long-temps, quand sera-t'elle donc acheuée? quand en accoucherez-vous? hastez-

vous desormais tant qu'il vous plaira, vous ne sçauriez plus vous deffendre du Prouerbe, *citius Elephanti parient*, & il y a long-temps qu'on vous le peut dire.

Reuenez donc vn peu à vous s'il vous plaist, confidez d'vn costé le peu de compte qu'on tient de vos cheatiues rapsodies, la peine que vous auez à les fagoter; la depense que vous y faites; le decry qu'elles vous causent; del'autre la reputation où sont les beaux ouurages de Monsieur Gassendy; la facilité avec laquelle il les donne; l'auidité des Libraires à les recevoir; la gloire qui luy en reuient; & de là inferez que vos comparaisons sont ridicules; & apres en auoir reconnu l'impertinence auoüez-la franchement, & dites avec le Pastre,

Stultus ego paruis componere magna volebam.

Cecy soit dit pour ne pas oublier la tripe de Latin, qu'on entre-larde seulement vn peu pour vous tenir en goust. Mais raillerie à part, croyez-m'en, songez à quelqu'autre emulation: C'est vn trop haut sujet pour vous; & comme vous ne sçauriez iamais atteindre la plus basse des perfections de cét illustre, laissez esclater sa gloire, & ne l'enuiez point: aussi bien n'y sçauriez-vous rien gagner. Vous vous ferez beaucoup connoistre; mais il y auroit bien plus d'honneur à demeurer moins connu, qu'à se descrier de la sorte par vne si odieuse presumption. En amy derechef croyez moy, laissez-le là.

Sans doute vous me direz que vous le faites aussi, & que ce n'est plus à luy à qui vous en voulez. Mais que veut donc dire cette infame prosopopée, avec laquelle vous amplifiez vostre lettre pour luy prescher iniures, & le courir d'opprobres, si vostre artifice estoit assez fort? A quoy bon ce grand commentaire sur sa natiuité; cét extrauagant fatras de tant de piquantes visions sur son

humeur & sa fortune ? N'est-il pas vray que vostre dessein a esté de luy faire plus de tort en ce rencontre qu'en tout ce que vous auez iamais entrepris contre luy ? Cróyez-vous pourtant en estre venu à bout ? En fin toutes vos armes deffensives & offensives aboutissent à des horoscopes, c'est avec cela que vous vous deffendez contre la gueuserie , & avec cela que vous attaquez vos rivaux : c'est avec quoy vous exaltez ceux qui vous donnent ou qui vous flattent , & avec quoy vous poussez ceux qui vous dédaignent ou qui vous heurtent. Pensez-vous pourtant qu'on ne voye pas bieu l'imbecillité de cette arme ? & qu'on ne sçache pas que cette fadaise est comme le son des cloches, à qui les fols font dire ce qu'ils veulent ? Monsieur Gautier a pû cent fois ouyr dire à feu son Oncle (ce bon Prieur qui en sçauoit bien plus que tout tant que vous estes) qu'il n'y auoit figure natale de quelque façon qu'elle fust dressée , sur laquelle il ne fust aisé de dire exactement *se-eundum artem* tout le bien & tout le mal dont on se sçauroit auiser. Si vous n'eussiez rien eu contre Monsieur Gassendy, la sienne eust esté toute pleine de miracles, de vertus, & des plus fauorables aspects du monde , vous n'y auriez pas trouué le moindre petit inconuenient. Mais parce que vous pretendez qu'il vous a choqué, elle est toute remplie de malignitez : belle vengeance ! Si encore vous vous fussiez hazardé à predire quelque chose sur cette figure ; mais vous ne parlez que des choses passées, ou de celles que vous supposez estre arriuées : Est-ce tout ce que vous sçauiez faire ? Vrayement voila qui est beau. Je ne veux pourtant pas vous refuser la loüange que vous meritez en ce rencontre. Vous faites le trait d'un habile homme, & commencez à faire paroistre vostre prudence, qui a tant de fois fait naufrage. Vous vous estes eschaudé à faire de

fausses propheties : c'est estre adroit maintenant que de ne vouloir rien dire que ce que vous auez desia veu. Mais ce qui est encore fort suspect, estes-vous bien assurez d'auoir le veritable theme celeste de cette natiuité : vous seriez bien attrapé si on vous jouoit à plaisir, & si par diuertissement on vous faisoit s'ier sur vne figure apôtée ; j'en ay bien peur, & qu'un jour on ne vous en fasse la huée ; prenez-y garde. Et aprer tout, croyez mon conseil : ne vous trauaillez plus, ny à louer, ny à blasmer ce grand homme ; ou si vous luy voulez faire quelque reproche, accusez-le d'auoir tousiours esté trop doux & trop courtois en vostre endroit, de vous auoir perdu par sa trop grande bonté, & que faute de reprimer de bonne heure vostre orgueil, en le punissant d'un seuer mepris, il a esté cause que vous vous en estes si fort enflé & tellement bouffi, qu'enfin il faut que vous creuiez. Ne voyez vous pas que vous estes encore plus fier apres les ciuiles excuses & trop soubmises protestations qu'il vous fait, de n'auoir jamais participé au dessein de faire imprimer cette piece que vous pensiez auoir fait supprimer ? Il voit à present par vostre derniere faillie qu'il n'adoucirra jamais vostre naturel farouche ; ne vous attendez plus aussi à de pareils traitemens, s'il en croit ses Amis & la raison. Faites cependant tout ce que vous voudrez, Le plus fort de vos traits n'arriuera jamais iusques à ses pieds. Vous auez fait comme vous voyez vostre dernier effort, & vous ferez bien-heureux si vous en pouuez demeurer là.

Après cela, ie ne sçay si vous auez de meilleurs succez avec ces Messieurs que vous entreprenez : songez-y bien auant que de vous y embarquer plus outre. Ie croy qu'en fait d'iniures vous le pourriez emporter, n'estant pas gens à s'en picquer : mais où il s'agira de science, vous pourriez bien auoir du dessous. Assurement vous

vous trompez en les prenāt pour des nouices qui ayent besoin de vostre secours dans les resolutions des belles questions. Mais c'est à eux à vous le faire sentir, quand ils se voudrōt donner la peine de vous répondre. Ie vous diray seulement, que peu de gens trouueront que vous ayez raison de vous emporter si furieusement contre eux ; car apres tout, qu'ont-ils fait dont ils ne puissent estre louiez : Vous auiez publié vn libelle infame contre leur Amy, avec des insultes les plus insupportables du monde, contre vne opinion receüe des meilleurs & plus doctes esprits du temps. Vous offensez-vous qu'on vous responde, & vous déhez-vous tellement de vostre droit, que vous ayez peur qu'on le combatte ? Il ne falloit pas commencer vn procez, pour apres solliciter vos parties de ne pas poursuire. Vos escritures estoient faites & produites : pourquoy vous faschez-vous qu'ils produisent les leurs ? sçauiez-vous bien qu'ils en ont eu mille benedictions, & que pour vous, ou deux ou trois de vos chalans qui le trouuez mauuais, il y a dix mille personnes d'honneur qui en sont rauies, & leur en demeurent obligées ; & qu'on a tousiours estrangemēt blâmé Monsieur de Barancy de tant reculer, qu'il que parole qu'on l'accuse d'auoir donnée. Celuy qui chassoit les demons, illuminoit les aueugles, & guerissoit les infirmes, deffendoit tres-instamment qu'on reuelast ses miracles. Mais quand il eschappoit au zele de quelqu'un de les diuulguer, nous ne voyons pas qu'ils en ayent esté blasmez, & vous criez au feu, vous, contre des gens bien intentionnez, qui n'ont pū ny deu retenir plus long-temps vne piece propre à bannir les erreurs que vous voulez establir, à esclairer les tenebres que vous taschez de former, & à guerir les foibleesses que vous ne cessez d'inspirer. O que vous eussiez fait sagement en dissimulant vostre douleur ! On vous re-
proche

proche d'auoir remué ciel & terre pour empescher l'impression de cette Apologie. N'en donnez vous pas maintenant des preuues conuaincantes, vous en formalisant si fort ? Vous n'auriez pas sujet de vous tant fascher d'une chose que vous n'apprehendiez pas : & plus vous en tesmoignez de cholere, plus vous faites paroistre la peur que vous en auiez. Sçauiez vous qu'il y a ? vous auez mal enfourné, comme vous voyez, avec Monsieur Gassendy, faites en profit, ne vous embarrassez point avec ces autres Messieurs. Vous ne les expedierez point si tost que vous dites. Ce sont gens d'honneur qui ont peut estre bien autant de force que de cœur. Assurément vous ne gagnerez rien avec eux. Vous vous imaginez estre beaucoup illustre, & qu'eux sont fort obscurs : mais vous vous pourriez bien possible tromper de tous costez ; car on entend parler de vous, & d'eux aussi, & certainement vous n'estes point dans l'estime du monde ce que vous pensez : & peut estre qu'eux y sont tout ce que vous ne pensez pas. N'en interrogez pas vostre passion, ny ceux qui la peuuent espouser, & vous pourrez voir qu'ils ne meritoient point vn si mauuais traitement.

Mais ie voy bien que tout cecy n'est point ce que vous desirez de Monsieur Gautier. Vous voudriez sans doute vn desauou des raisons que Monsieur de Neuré fait dire à Monsieur le Prieur de la Valette son Oncle, dans la Lettre qu'il escriuit à Monsieur de Baran y pres d'un an auant le decez du bon homme, & incontinent apres vostre voyage de Prouence qui fit resoudre à ces deux Messieurs, l'impression de la piece qu'ils auoient entre les mains, apres vous auoir veu & entendu, l'un & l'autre, faire de si grands trophées de vos imaginaires victoires, tant sur Monsieur Gassendy, que sur Monsieur Boulliaud. Ils n'y songeoient presque plus ; mais

ayant ouy toutes vos fanfares, veritablement la patience leur eschappa. Monsieur de Neuré fut chargé d'escire à Monsieur de Barancy, & de luy enuoyer tout ce qu'on voit maintenant imprimé, & le bon Vieillard fut rayuy de voir ses sentimens si fidelement couchez dans la lettre que vous voulez qu'on improuve. Mais quelle apparence ? Car encore que la memoire manquaist à Monsieur Gautier, & qu'il ne se souuinst plus de cette histoire, il ne peut pourtant pas desauoier apres la mort de son Oncle ce qu'il luy a possible entendu dire trente fois durant sa vie. Il sçait quel mespris il faisoit de toutes vos panchartes, & avec combien d'indignation il parloit de vostre doctrine, laquelle il protestoit n'estre pleine que d'erreurs, de visions, & de foiblesse. J'en prens Dieu à tesmoin, deuant qu. cette bien-heureuse ame repose maintenant. Et cela estant, que pouuez-vous attendre de Monsieur Gautier ! quelque compliment, par lequel il vous protestera qu'il a tres-grand déplaisir qu'on vous afflige de la sorte, en vous rapportant de si fascheux sentimens de Monsieur son Oncle, lesquels il n'auroit pourtant pas raison de vouloir démentir. Il sçait que Monsieur de Neuré est trop homme d'honneur, pour rien auancer contre la verité, & que le bon homme l'estimoit & cherissoit trop cordialement, pour luy auoir iamais rien celé de ses pensées ; lesquelles il luy a pû communiquer fort à loisir, dans les agreables conferences qu'il auoit avec luy touchant leurs sciences. Toute nostre Ville sçait le plaisir que ce bon Vieillard prenoit dans sa conuersation, ne parlant jamais de cet Amy qu'il ne dit que c'estoit luy qui prolongeoit sa vie en charmant les incommoditez de sa vieillesse avec la douceur de ses entretiens. On peut donc bien s'en rapporter à luy des sentimens de ce bon homme, n'y ayant personne à qui il les ayt pû con-

fier plus franchement. Ce que Monsieur Gautier sçachant tres-bien, il n'est pas croyable qu'il le voulust dédire de quoy que ce soit, sur tout dans vne affaire où il n'a aucun interest particulier, & dans vne relation si modeste, si iudicieuse, & si conforme aux opinions du bon Prieur? Car pour estre à vostre desauantage, ce n'est pas à dire qu'elle ne soit veritable: Et pour estre couchée en termes solides, fermes, & vigoureux, elle n'est point pour cela au delà de sa portée, qui alloit bien plus loin, ny au deçà de sa prudence, qui ne luy a jamais fait trahir la verité. Qu'il y ait aussi rien de trop fort pour l'imbecillité de son âge; c'est ce que vous avez tort d'asseurer: Car quelque chose que vous en veuillez dire, il ne s'est jamais veu de iugement plus sain ny mieux assis; sa vieillesse ne luy ayant donné aucune foiblesse de ce costé-là; bien au contraire on l'a veu avec admiration raisonner & philosopher iusques au dernier soupir de sa vie. Vous avez mesme grand tort de le vouloir faire parler en homme esgaré, & d'en prendre Monsieur Gautier à tescmoin, c'est vouloir effectivement commettre la faute dont vous pensez charger Monsieur de Neuré, en faisant parler son Oncle tout à rebours de ses sentimens. Quoy? vous auiez pû tirer de luy vne parole au desauantage de Monsieur Boulliaud? O ie vous prie tirez cela de vos papiers: C'est vn homme dont il a tousiours trop adoré, si ie le dois ainsi dire, le merite, pour en parler autrement qu'avec des transports d'eloges. Et s'il est sorty du monde avec quelque regret, Monsieur son Neveu peut attester que c'est pour n'auoir pas eu la consolation d'embrasser ce personnage auant sa mort, ayant vescu si fort charmé de sa doctrine. Et vous vous trompez bien fort de dire qu'il n'eust pas pris garde à ce qui estoit contre vous dans son liure; à la lecture duquel il estoit trop aspre, trop assidu,

& trop attentif pour en auoir perdu vn seul mot. Je vous assure qu'il auoit fort bien remarqué comme vous y estiez tres-iustement noté; sans qu'il ait pû rien rabattre de cette creance, quelque peine que vous pristes à luy en descrier l'auteur. Monsieur Gautier se souuient mesme bien que vous luy donnaistes vne Gazette d'iniures contre cét honneste homme, qui luy fit bien mal au cœur, voyant particulièrement que vous luy reprochiez à tous bouts de champ la qualité de Prestre, comme quelque grosse note d'infamie. Ce que vous faites encore dans la derniere que vous adressez à mondit Sieur, avec beaucoup de scandale; Cette façon d'iniurier ne pouuant partir sans blaspheme d'un Chrestien; mais bien de quelque Turc, Bohemien ou Chaldeen; ou plustost encore de quelque esprit libertin: en quoy, *proh dolor atque nefas!* nostre mal-heureux siecle n'est que trop abondant, aussi bien qu'en faiseurs d'horoscopes & diseurs de bonne auenture, qui veulent que nous fassions hommages de talens que Dieu nous donne aux astres & à leurs chimeriques influences; Qui croient que les vertus des hommes & leurs vices, leurs perfections ou leurs defauts, leur bonne ou mauuaise renommée, leur prosperité ou leur infortune dependent absolument d'une imperceptible disposition de ces corps mobiles, dont vous dites vous mesmes que le cours est encore incertain, ne cessant de pester contre les erreurs des tables Astronomiques. Et vous qui faites des liures avec le titre d'*Astronomia restituta*, où vous dites qu'on n'a rien trouué à redire, vous pleurez encore tous les iours pour qu'on vous donne des tables iustes, autrement que tout le secret de vos Longitudes ne sera qu'une chanson. Je n'en parle qu'apres vous, & apres ce que i'en ay quelquefois ouy dire à ces Messieurs, qui vous en pourront quelque iour parler bien autrement,

& pleust à Dieu que feu Monsieur le Prieur de la Valette en eust voulu prendre la peine. Vous verriez bien en quelle horreur il auoit cette Astrologie que vous professez, la detestant comme vne maudite imposture, & asseurant que tous ceux qui s'en meslent serieusement sont, ou insensé, ou foibles, ou ignorants, ou affronteurs : & Monsieur de Neuré a certainement raison, quand il le fait parler de la sorte, n'y ayant que vous qui le puisse accuser de luy auoir fait dire chose qui soit indigne de sa probité, de sa condition, ny de son grand âge, lequel nonobstant tout ce que vous en dites, ne l'a point empesché de discourir profondement iusques au iour de sa mort, ayant eu tousiours l'esprit admirablement ferme, & la force de dire ses sentimens avec toute la vigueur, la solidité, & la netteté qu'on scauroit desirer dans vn Philosophe bien sain.

Ce que ie vous repete afin que vous cessiez de croire que le discours de cette Epistre soit si peu conuenable à sa personne & à sa vieillesse, n'y ayant rien dans les huit pages que vous auez si bien contées, qu'il n'aduouïast encore de fort bon cœur, s'il viuoit. Et quel que pedanterie que vous y supposiez, il est au moins certain que vous n'auiez pas raison d'en renuoyer l'auteur aux harangeres des Halles, qui n'entendent pas la langue dans laquelle il a escrit; ou y bien celle dont vous vous seruez pour y respondre, employant vn stile qui leur est tres-familier, duquel ie ne crois pas que ces Messieurs voulussent iamais vser pour vous instruire en refutant vos erreurs, n'estant pas fort propre ny guere bien seant à la deffense des belles opinions qu'ils soustenoient, dont le vulgaire, parmy lequel vous triomphez, n'est pas capable. Mais quelques trophées que vous puissiez éleuer à sa veüe, ils ont dequoy se satisfaire, tandis que les veri-

tables ſçauans prennent leurs raifons, & ſe moquent de vos boutades.

Ie vous en parle aſſeurément comme de choſe tres-connuë: mais voſtre mal-heur a porté qu'il ſ'eſt toujours rencontré peu de monde, qui euſt la charité ou le courage de vous en découurir franchement la verité; & que vous auez eu autour de vous cent foibles eſprits qui n'ont iamais ceſſé de vous abuſer, & auengler en vous flatant; Ce qui vous a toujours donné vne telle opinion de voſtre perſonne, que tous les autres hommes ne paſſent en voſtre eſprit que pour des idiots, auxquels vous croyez inceſſamment pouuoir impunément toujours impoſer. Mais enfin vous voyez à vos deſpens combien vous eſtes loin de compte, & que ſi à l'aueuir vous ne viuez avec de plus modeſtes ſentimens de vous meſme, vous ſerez continuellement expoſé au hazard de trouuer qui vous redreſſe, & bien ſouuent plus rudement que vous ne voudriez pas. Songez donc à temperer vn peu cette mauuiſe humeur, qui vous porte à quereller tout le monde, & à chercher touſiours quel-qu'un pour mordre. Il ne tiendra qu'à vous d'auoir pour amis, en viuant paiſiblement, ceux que vouſaſchez d'attirer ſur vos bras, avec vos inuectiues. Ils n'en veulent qu'à vos opinions, ſongez à vous en deffaire, ou à les deffendre modeſtement; & ſi apres les auoir ſi iniurieuſement traittez, vous pouuez tenir voſtre parole de vouloir viure deſormais en Chreſtien, vous en pouuez attendre toutes les ciuilitéz poſſibles: mais ſi vous pourſuiuez auſſi à vous eſchapper touſiours contr'eux de la forte, ie ne voy pas que Monsieur Gaultier, ny qui que ce ſoit, vous puiſſe mettre a couuert de leur iuſte reſſentiment. C'eſt aſſeurément ce qu'il vous pourra proteſter quand il aura le loilir ou la volonté de vous

escrire, & ie crois qu'il ne manquera pas de vous asseurer que tout ce qui est dans la presente, ne peut venir que d'une personne tres-amie, de feu Monsieur son Oncle, & tres-curieuse de vous tesmoigner l'enuie qu'elle a d'estre.

MONSIEVR,

d'Aix en Prouence, le
6. de Iuillet 1649.

Vostre tres-humble & tres-affectionné
seruiteur,

LA ROCHE.



R E S P O N S E D V S I E V R

Iean Baptiste Morin, Docteur en
Medecine, & Professeur du Roy
aux Mathematiques à Paris;

*A la Lettre d'un faux Amy de Monsieur
Gaultier, Conseiller au Parlement
de Prouence.*



'EST contre le sentiment de la pluspart
des gens doctes & de qualité qui me co-
gnoissent, & m'honorent de leur amitié,
que ie respons à vne meschante lettre
nouuellement imprimée contre moy,
sous le faux nom d'un nommé la Roche. Roche de
neige, qui sera fonduë aux premiers rayons de cét écrit:
& qui ne sert que de masque à ceux, qui m'ayans ja trop
offensé, me traitent encor sous ce nom par trop inique-
ment. Mais Masque, vous auez par trop parlé, *Loque-
la tua man festum te facit*. Il y a dans cette lettre trop de
Loix, de Digeste, du Code & du Canon, & trop d'in-
telligence de la chicane, & du trafic & commerce des
liures: pour ne pas iuger d'abord, que cette lettre est
de la foible ceruelle d'un Aduocat, ou d'un Libraire, ou
d'un mélange des deux.

Ie ne m'attaque donc point à ce la Roche, que ie n'ay
jamais cogneu, quoy que faussement & traistreuse-
ment il se qualifie mon amy particulier, puis qu'en
cette

cette lettre il n'a autre dessein, & ne s'efforce qu'à me ruiner d'honneur, & m'accabler d'opprobres & de mespris. L'adresse cét escrit à Barancy, Aduocat & Libraire ou Imprimeur à Lyon : Et à Neuré Precepteur des enfans de Monsieur de Champigny, qui n'osent se déclarer ; & qui comme bons amis accouplez de rage ennimée contre moy, se le partageront à l'amiable, au *pro rata* de leurs merites, si bon leur semble ; ou se querelleront l'un l'autre de m'auoir attaqué si mal à propos, sans auoir reconnu ma portée. Et à dire le vray, l'aduantage qu'ils me donnent par cette lettre à les matter, me chatouille tellement, que nonobstant les remonstrances de mes amis, que leur lettre n'est qu'une sottise, indigne de mon temps à la regarder ; Je ne me sçaurois abstenir du plaisir que j'ay à les faire cognoistre au monde pour ce qu'ils font dans les attaques qu'ils me font ; tant ie suis assure de la verité de ma deuise, que, *Magna est veritas, & praeualet. Esdra lib. 4. c. 3.* Car en effet il n'y a en toute leur lettre aucune periode, qui ne soit ou ignorance, ou mensonge, ou imposture, ou fourberie. Je ne veux point perdre mon temps à les toutes examiner & refuter ; j'estime en mon âge mes heures plus cheres que leurs années : Mais succinctement ie dis ce qui s'ensuit ; apres auoir veu vn exemplaire d'icelle lettre, surpris en vn paquet, que Neuré enuoyoit à Monsieur Duchesne Ecclesiastique, mien amy.

Ie dis donc en premier lieu, que l'auteur d'icelle lettre se qualifiant amy de Monsieur Gaultier, Conseiller au Parlement de Prouence ; Et me faisant les excuses dudit sieur sur la lettre que ie luy ay adressée ; & me rapportant par aduance ce que luy-mesme m'escriroit, s'il auoit le loisir ; Parle sans adueu ny procuration : Et qu'auant peu de temps il se verra honteusement desaduoué par iceluy sieur Conseiller, de toutes les impertinences

& fausserez de sa lettre ; qui choquent l'honneur d'ice-
luy Seigneur, & de feu Monsieur le Prieur de la Valette
son oncle.

De plus, l'auteur de la terre imite au frontispice d'i-
celle, les rongneurs & faux mōnoyeurs. Il a veu ma qua-
lité de Docteur en Medecine, & Professeur du Roy aux
Mathematiques à Paris : Or il me rongne ma qualité de
Docteur, qui est le premier degré d'honneur que i'ay ac-
quis par mes estudes & ne m'appelle que Medecin ; bien
que tous ceux qu'on appelle Medecins, ou qui en pren-
nent le titre, ne soient pas Docteurs, mais bien souuent
des Charlatans. Il me rongne encor ma qualité de Pro-
fesseur du Roy à Paris : Car tout Professeur en quelque
art ou science que ce soit, n'est pas Professeur du Roy,
& sur tout au College Royal de Paris. Mais de plus il
falsifie ma qualité. Car le Roy n'a point de Professeur en
Astrologie : Et ie ne suis point Professeur en Astrologie ;
puis que ie ne l'ay encor iamais voulu enseigner à qui
que ce soit, & pour quelque prix que ce soit, comme on
sçait à Paris, & comme en peut tesmoigner Monsieur
de Monconnys, fort intelligent en l'Astrologie vulgai-
re, & des plus gétils esprits de Lyon, qui autrefois estant
à Paris, a fait tous ses efforts pour apprendre de moy la
vraye Astrologie : Et on n'appelle pas vn Libraire ou
vn Sauetier Professeur en ces mestiers, s'ils ne les ensei-
gnent publiquement. Ne voila pas bien des sottises en
quatre mots, *Medecin, Professeur en Astrologie* ? S'il l'a fait
par ignorance, ou par malicieuse enuie, à dessein de me
raualer, ie m'en rapporte, & ne me soucie point de le
sçauoir : Mon honneur dépend de mes ouurages, & non
de ce que les enuieux escriuent contre moy. Or la lettre
contient plusieurs poincts : Mais ie ne veux respondre
qu'aux principaux ; qui destruits, entreinent la ruine des
autres.

Il commence donc à me remettre en teste Monsieur Gassend, touchant nos controuerses du mouuement de la Terre, contre lequel l'ay écrit: Et dit qu'en mon liure intitulé, *Ale Telluris fracta* ; Je me suis escrié contre Monsieur Gassend, *au perfide, au desloyal, au traistre*, & l'ay voulu faire passer pour heretique ; qui sont pures men-teries, qui ne se trouueront point au texte de mon liure: mais bien en ma lettre écrite à Monsieur le Conseiller Gautier, parlant de Neuré & Barancy.

Il dit encor, *que j'ay remué Ciel & Terre pour empescher l'impression de l'Apologie de Monsieur Gassend contre moy: comme il appert en ce qu'à present ie m'en formalise si fort.* Ce qui est aussi vne pure fausseté, bien conuaincuë par ma lettre à Monsieur le Conseiller Gautier; & en qu'estant ores imprimée, ie tiens ma promesse de n'y point respondre: Ne iugeant pas mesme qu'elle merite res-ponse ; veu que pour en recognoistre les defauts, il ne faut que la confronter avec mes écrits contre le mou- uement de la Terre.

Mais passant plus outre il dit, *qu'il y a aussi peu de com- paraison entre les productions de Monsieur Gassend & les miennes, qu'entre les rayons du Soleil & les exhalaisons d'un fumier.* Il s'efforce de hausser par ses fleurs de Rhetori- que toute la doctrine de Monsieur Gassend, & principa- lement sa Philosophie, iusques à vingt-quatre Karats; & de mettre toute la mienne au billon, & sur tout mon *Astrologia Gallica*, qui n'est pas encore en lumiere, & où il n'entend rien. Je crains que Barancy & Neuré ne soient pas aduoüez de Monsieur Gassend de l'esleuer si haut: de peur que s'il vient à tomber, quand les plus sages met- tront ses œuvres à la coupelle, il n'en puisse iamais rele- uer. Mais Barancy parle comme intéressé; & peut estre seulement à dessein de debiter sa marchandise, puis que Monsieur Gassend luy a donné à imprimer sa Philosophie

d'Epicure; nom infame & puant dans toute l'Antiquité, & qui l'est encor, & sera par tous les siecles des siecles, principalement entre les Chrestiens; nonobstant tous les efforts qu'a fait Monsieur Gassend à le farder de la teinture d'un saint, dans les huit liures qu'il a mis en lumiere, *De vita & moribus Epicuri*, lesquels luy font plus de deshonneur que d'honneur, parmy les bons, sages & pieux Esprits qui sont dans Paris: Et sçay personne des plus capables, qui s'appreste desia à rendre ridicule la Physique d'Epicure. Que si Barancy & Neuré estoient aduoïez à me vilipender de la sorte, ie sçay bien que ie ferois: Car ie connois mieux le fonds de Monsieur Gassend, qu'il ne connoist le mien; & ne m'estime en rien son inferieur; quoy qu'ils me disent que ie ne sçauois iamais atteindre la plus basse des perfections de cet Illustre. J'ay veu toutes ses productions, & il n'a pas veu toutes les miennes, & n'est pas mesme capable de iuger de toutes, ignorant mon Astrologie: Qui n'est pas vn habit de fripperie, rapieceré de quantité de vieilles & differentes opinions sans rien refondre, à la mode Pyrrhonienne, qui ne se vante d'autre chose sinon qu'elle ne sçait rien: Mais c'est vn habit neuf, garny de belles & veritables resolutions, capables d'instruire, & contenter les esprits; & vn trauail non dérobé.

Au reste, ie n'empesche point que Barancy & Neuré pour les miraculeux trauaux (c'est leur mot) qu'ils attribuent au grand & fameux Gassendus, ne luy dressent des Autels, ou luy fassent vne statuë du mont Athos; car ce n'est pas à moy à l'empescher, & ie ne luy enuieray iamais tel honneur.

T'en dis le mesme pour Buillaud, duquel ils disent en la page dixième de leur Epistre, que feu Monsieur le Prieur de la Valette auoit tousiours trop adoré le merite,

pour en parler autrement qu'avec des transports d'éloges, &c. Paroles non seulement d'impies, qui profanent de la sorte le mot d'adorer, mais tres-fausſes; en ayant ouy de mes propres oreilles parler tout au contraire à iceluy Prieur, quand i'eus l'honneur de le reuoir l'an 1646. & dire les meſmes choſes que i'ay rapporté en mon Epiſtre à Monsieur le Conſeiller Gaultier : Et paroles en outre qui font bien voir clairement, ou que ces gens ne connoiſſent pas Buillaud; ou qu'ils ne ſont pas capables de iuger des eſprits illuſtres. Mais qu'ils liſent mon *Tychæ-Bræheus in Philolaum*; & ils y verront (s'ils en ſont capables) l'ignorance de Buillaud en Logique, Phyſique & Geometrie, touchant ſa ridicule & fauſſe demonſtration Geometrique du mouuement de la terre. Qu'ils liſent ce que i'ay fait imprimer contre luy en mon *Aſtronomia reſtituta*, touchant l'Equation du temps; & ils y verront encore ſon ignorance & ſes vices, ſcandaleux à vn qui eſt eſſeüé à la ſaincte & ſublime dignité de la Preſtriſe; pieces auſquelles Buillaud n'a iamais oſé reſpondre. Et quand ils liront ce que i'ay eſcrit contre luy en mon *Aſtologia Gallica*, touchant la nature de la lumiere; ils verront encore plus clairement que leur Aigle n'eſt qu'un Chat huant. En verité, ie m'eſtonne que ces gens qui veulent faire les Cenſeurs des Eſprits qu'ils ne connoiſſent pas & des eſcrits où il paroift qu'ils n'entendent rien, puiſſent paſſer à Lyon, (comme on me dit) pour des prodiges de ſcience: veu que ie ne croy pas les eſprits de Lyon ſi faciles à eſtre ſeduits; & ſi cela eſtoit, ie dirois franchement qu'il y auroit plus de l'art du Diable, que de l'art de Raymond Lulle.

Maintenant il eſt queſtion de me mettre en deſſeſe à bon eſcient. Car Barancy & Neuré ſous le faux nom d'une Roche de Neige, vont braquer le Canon, le Co-

de, le Digeste, les Loix des Empereurs & les Bulles des Papes, pour foudroyer contre moy, & mon *ASTROLOGIA GALLICA*, qui leur est encore inuisible, si ce n'est en fausse idée de leur esprit de praué. Ils font donc vne descharge de toutes leurs pieces, & prennent Monsieur le Conseiller Gaultier pour Iuge, afin de m'enuoyer au gibet; pour auoir estudié & trauaillé l'espace de trente ans, à reformer l'Astrologie Iudiciaire, qui en auoit si grand besoin, Cardan y ayant fort mal reüssi. Mais ce sont de grands ignorans qui m'objectent des autoritez qu'ils n'entendent pas, faute d'en auoir leu les explications & solutions tant de fois données dans les bons Auteurs qui traitent cette matiere.

Ie les renuoye donc pour le present à ces Auteurs, sans m'amuser icy à leur expliquer ce qu'ils ne peuvent ignorer qu'à leur grande confusion, puis qu'ils veulent passer pour Maistres en la chicane. Et sur tout ie les renuoye à deux pieces. La premiere, c'est la deffense de l'Astrologie, fort ample & docte, mise par Iunctin Docteur en Theologie, au commencement de son *Speculum Astrologia*: où il resout plus de 30. objections tirées de l'Ecriture sainte, des loix ciuiles, des Peres del'Eglise, & de la Philosophie, contre l'Astrologie iudiciaire. La seconde, sera l'excellent discours sur l'Astrologie du Reuerend Pere Charles de Condren, Docteur de la Sorbonne, second Superieur General del'Oratoire de I E S V S: fait par le commandement de feu Monseigneur le Cardinal de Richelieu: lequel connoissant le P. de Condren, pour le plus bel Esprit & le plus sçauant de son siecle en toutes sortes de sciences naturelles, & qui particulierement sçauoit fort bien l'Astrologie iudiciaire, de laquelle il prenoit grand plaisir à conferer avec moy, pendant l'espace de douze ans que i'ay eu l'honneur (moy indigne) d'estre en son estroite ami.

té: m'encourageant tousiours à vn si grand trauail, & qui de plus estoit le plus éminent Theologien de son temps & d'vne sainteté admirable: Il voulut estre par luy éclaircy, si l'Astrologie iudiciaire estoit licite. Il commença donc ce discours, mais preuenü de mort; ne le püst acheuer. Neantmoins ce qu'il en a escrit, fut iugé de tel poids qu'on n'a voulu manquer à le faire imprimer parmy le reste des escrits qu'on a pû recouurer de ce grand personnage. On y voit qu'il approuue l'Astrologie iudiciaire, distingue la vraye & naturelle d'auec la fausse & superstitieuse, ensemble la bonne science d'auec le mauuais vsage: au lieu que mes calomnieurs ne parlent que de l'Astrologie en confusion: Ils y verront les solutions des objections; voire de la Bulle de Sixte V. encore bien plus claires que dans l'unctin, comme il auoit plus de lumiere tant naturelle que surnaturelle. Et selon les scandaleux discours de Barancy & Neuré, il eut fallu enuoyer au gibet vn si grand & si saint Homme, qui approuuoit entierement mes conceptions & labours en cette science. Ay-je donc eu à craindre quelque scrupule avec vn tel Directeur?

Je diray bien plus, feu Monseigneur le Cardinal de Berule, premier General de l'Oratoire, & brillante lumiere de son temps en doctrine & sainteté, me commanda de la part de la Reyne Mere Marie de Medicis, effrayée par quelques ignorans Astrologues, que le feu Roy deuoit mourir de maladie l'année qu'il fut en Saouye, d'en dire mon sentiment. Et sur les Themes celestes de sa Naissance & Reuolution d'icelle année, ayant respondu qu'en effect il seroit bien malade, mais qu'il n'en mourroit point, comme il arriua; parce que la Reuolution n'estoit point mortelle, & conforme à la direction de l'Horoscope au corps de Mars: i'eus pour recompense ma Charge de Professeur du Roy, par l'au-

thoriré de la Reyne Mere, laquelle fit laſeher priſe à vn de ſes principaux Officiers qui l'auoit ja demandé pour vn autre.

Le Cardinal de Richelieu me fit commander par le feu Eueſque de ſainct Malo, de faire mon iugement ſur ſa Natiuité, & pluſieurs autresfois il s'eſt ſeruy de moy en l'Aſtrologie, iuſques-là meſme, qu'il ne voulut point aller à Parpignan, où il contracta la maladie dont il eſt mort, ſans me faire demander mon ſentiment par vn Grand qui vit encor; auquel ie dis qu'il ſeroit perilleuſement malade en ce voyage.

C'eſt choſe commune à Paris, & encore plus à Rome, que le Pape Urbain VIII. duquel mes calomniateurs m'objectent la Bulle, eſtoit vn ſçauant Aſtrologue, qui touteſois de ſon autorité a pû condamner l'abus de l'Aſtrologie, ſur les Natiuitez des Grands, lequel eſt fort frequent à Rome: comme le Roy peut deſſendre en ſon Royaume l'vſage del'arquebuze & la chaffe, à cauſe de l'abus & du peril: Mais le Pape ne peut pas condamner la veritable Aſtrologie, ny ſon bon vſage: Autrement il condamneroit les Conciles, qui l'ont permis pour l'Agriculture la Nauigation & la Medecine. Comme il ſe voit en la Regle 9. de l'Index du Concile de Trente. Or il eſt impoſſible de marier avec aſſurance & fruit deſiré, la Medecine avec l'Aſtrologie, ſans voir les Themes celeſtes des Natiuitez, ſoit des grands, ſoit des petits, qui tombent malades: comme il appert clairement au troiſieſme liure, *De diebus Decretoriis*, de Galien, & encore mieux par les experiences ordinaires des bons Medecins, qui ſçauent bien marier ces deux ſciences, & qui au commencement d'vne maladie donneront touſiours trente & biſque ſur le prognostic aux autres Medecins ignorans l'Aſtrologie, qui ne peuvent predire la mort du malade que quand elle paroift
à tous

à tous les assistans : Au lieu qu'un bon Astrologue la predira dès le commencement de la maladie; & la future santé tout de mesme, qui n'est pas chose de peu d'importance & vtilité. Donc les Autheurs de la lettre qui m'est adressée, ne meritoient-ils pas d'estre bruslez, d'enuoyer au gibet les personnes cy dessus nommées, puisque, *Agentes, consentientes, precipientes, & approbantes pari pœna plectendi sunt?*

Or ils font bien pis. Car ils y enuoyent encore saint Thomas, dit le Docteur Angelique, lequel en plusieurs endroits approuue l'Astrologie iudiciaire, & particulièrement, *in Prima sec. q. 9. art. 5.* où il dit nettement. *Ex impressione Cælorum aliqui sunt habiles ad iram, & ad alias passiones, quas homines sequuntur. Ob quam causam Astrologi ut in plurimum vera dicunt* (notez ces belles paroles) *sed Sapiens dominabitur Astris.* A dieu donc S. Thomas au gibet, selon la sentence de ces ignorans & impies. Mais quand l'ignorance parle, que peut-elle dire que des sottises extrauagantes? S'ils auoient du iugement, seulement la longueur de leur nez, ne verroient-ils pas clairement que ces consequences s'ensuiuent de leurs fausses hypotheses? Mais disons plus vrayement, que si tous les Impies & Athées, & qui mesmes ont esté accusez d'auoir enseigné l'Atheïsme, eussent esté brûlez, comme ils ne l'ont mérité que trop, du commun consentement de toutes les Nations du Monde: DIEU feroit mieux honoré des hommes par ses œuvres, & principalement par le Ciel & les Astres, qui sont les plus beaux de ses autres ouurages visibles; & qui mesmes tous seuls d'un langage seulement connu aux sages, *enarrant gloriam Dei*, Psal. 18.

Que Barancy donc & Neuré s'enflent d'enuie & de rage comme des crapaux contre mon *Astrologia Gallica*, où ils n'entendent rien : Cela n'empeschera pas qu'elle

ne s'imprime. Pour deux rondus & vn pelé (comme on dit en commun prouerbe) qui par malicieuse ignorance crachent contre le Ciel, & vomissent leur venin contre la plus diuine des sciences naturelles, il n'est pas raisonnable que tout le corps des Doctes de l'Europe, qui l'a demandent instamment depuis plus de 12. ans, en soit priué. D I E V ne m'a pas donné la connoissance des principes de cette science; Le genereux mespris du gain que i'y pouuois faire à Paris sans abus, si i'eusse voulu y employer mon temps; Et la constance & patience de 30. ans à trauailler à sa reformation; pour la laisser perir maintenant qu'elle est acheuée. Je croy qu'il veut qu'auant la fin du Monde, toutes les sciences naturelles soient conneuës pour son honneur & sa gloire; & sur toutes cette-cy, comme la plus haute & plus capable d'honorer D I E V en l'estat où ie l'ay mise. Si elle s'imprime, ie suis assuré qu'au moins ses principes & fondemens seront leus en Philosophie, Medecine & Theologie; Et n'estoit mon âge, & que i'ay des pauures niepces à entretenir & marier, *difficillimis temporibus*; ie ne plaindrois pas six mil liures d'auance à la faire imprimer dès à present: Mais cét empeschement me fera chercher quelque autre expedient, qui tout au plus ne me cousté que mon trauail. Iusques à present i'ay refusé de l'enseigner à quelque prix que ce soit; Et m'a-on plusieurs fois assuré que si i'en voulois faire vn cours à Paris, il s'y trouueroit tousiours 30. Auditeurs de condition & d'esprit releué, qui me donneroient chacun cent escus; Ce qui suffiroit à l'impression qui sera de deux Tomes in folio. Peut-estre tenteray-je ce biays, si ie peux échapper des malignes influences qui regnent à present sur ma vie, mon honneur, & mes biens, plustost que de donner mon trauail à vn Libraire, sans bonne recompense. Et que Barancy ne publie point faussement que ie me suis rui-

née en impressions : Il s'en faut plus de deux mille liures que ie n'aye employé les presens & gratifications que i'ay eu de mes liures imprimez , sans ce que i'en ay vendu , & les exemplaires qui me restent , pour n'estre propre à debiter telle marchandise ; Et sans compter deux mille liures de pension passée en Cour de Rome , que i'ay eu du Roy sur l'Abbaye de Royaumont , en consideration de mes labeurs. Je ne pense pas que Barancy gagne iamais tant que cela sur les Atomes d'Epicure, Marchandise de contrebande & fort décriée depuis long-temps.

Mais auant que quitter ce discours d'Astrologie , il me faut encore respondre à ce qu'ils m'en disent touchant Monsieur Gassend. Ils disent donc que c'est par vengeance , qu'en ma lettre à Monsieur Gaultier i'y ay inferé ce qu'un Gentilhomme mien amy auoit remarqué de la vertu des Astres sur la naissance dudit sieur Gassend, par son esprit & ses mœurs, & par les accidens de sa vie. Que ie n'ay parlé que des choses passées, sans m'oser d'hazarder à predire quelque chose de futur sur sa figure. Et que peut estre on me iouë de m'auoir baillé à dessein telle figure qui n'est pas la vraye.

Pour le premier, ie dis qu'il est faux: Car ie l'ay fait seulement, afin que Monsieur Gassend reconneust sur luy-mesme, & par sa propre natiuité, la vertu des Astres, laquelle il ignoroit & nioit opiniastrément.

Pour le second, le Gentilhomme ne luy a rien predit de particulier ; tant pour n'auoir voulu prendre la peine de faire les calculs necessaires aux predictions particulieres & à temps prefix , qui sont plus longs & penibles qu'on ne pense ; Que parce que les effets des Astres predits & determinez de la sorte, peuuent estre éuitez & destournez par la prudence humaine, suiuant ce que S. Thomas a dit cy-dessus: *Sapiens dominabitur Astris*: Au-

trement l'Astrologie seroit inutile. Et arriuant qu'ils soient destournez, l'Astrologue sera tenu pour ignorant par ceux qui ne considereront le fondement de sa prediction, ny le soin & la peine qu'on aura pris à en éuiter l'effet, croyans sottement, & à la Turquie, que la prediction & la vertu des Astres sont de fatale necessité, quoy qu'on fasse au contraire. Mais puis qu'ils me pressent d'une telle prediction, ie veux en cecy auoir plus d'esgard à la conseruation de la vie de M. Gassend, que i'estime m'estre amy, que non pas à mon honneur. Je dis donc, que s'il ne prend bien garde à sa santé, il court hazard de mourir de maladie l'an 1650. Et le plus fort de la maladie ou du peril, me semble tomber sur la fin de Iuillet & commencement d'Aoult, lequel temps à grand peine passera-il sans éprouuer perilleusement en sa personne les malignes influences de Saturne & de Mars, & qu'il fasse profit de cét aduis, & m'en sçache gré s'il veut. Je n'en dis pas dauantage, luy souhaitant vie plus longue. Finalement pour le dernier. On ne trompe pas si facilement les bons Astrologues: Et Mōsieur Gassend qui m'a baillé sa figure depuis longues années, ne m'auroit pas tant ioüé, comme il auroit ioüé Monsieur de Valois son bon amy, auquel il a fait dresser cette figure par le calcul des Tables Rudolphines, & des Triangles Spheriques, avec toutes les figures de la Theorie des Planetes, qui est vn trauail inestimable, dont i'ay la copie; sans parler qu'icelle figure est le vray portrait celeste de Monsieur Gassend, au rapport de tous les Maistres du mestier.

Mais tout ce qui est dit cy-deuant, ne sont que pieces détachées, & ne touche point le different d'entre mes detracteurs & moy. Par ma lettre à Monsieur le Conseiller Gaultier, ie me plaignois d'eux, de ce qu'ils ne s'étoiēt pas contentez d'vser de perfidie & trahison enuers Monsieur Gassend, de faire imprimer son Apologie,

contre la parole qu'ils luy auoient donnée; sur les instantes prieres & defences qu'il leur en auoit fait : Mais de plus y auoient adjousté vne Preface de 8. pages d'iniures atroces contre moy, attribuées faussement à feu Monsieur le Prieur de la Valette mon intime amy. Comment se démeslent-ils de ces deux poincts ? Pour le dernier, la Roche supposée maintient que les 8. pages auoient esté dictées par le bon vieillard : Et le veut confirmer par Monsieur le Conseiller Gaultier son nepueu. Mais ie n'auray iamais si mauuaise opinion de Monsieur le Conseiller Gaultier : Et espere qu'en peu de temps ils se verront honteusement desauoiez par sa lettre, comme des fourbes qu'ils sont, & qui apprehendent ce desauou.

Et pour le premier poinct, voicy ce qu'ils disent. *Celuy qui chassoit les Demons, illuminoit les aueugles, & guerissoit les infirmes, defendoit tres-instamment, (ce mot est faux,) qu'on reuelât ses miracles : Mais quand il eschappoit au zele de quelqu'un de les diuulguer, nous ne voyons pas qu'ils en ayent esté blasmez, &c.* Cette comparaison n'est-elle pas d'un Athée ou d'un impie ? Ils comparent le Fils de DIEU faisant des miracles; (car ie croy que c'est de luy qu'ils veulent parler, encore qu'il ne l'appellent que *Celuy*, comme les Sorciers & Magiciens ne l'appellent que *L'autre*,) avec Monsieur Gassend, faisant vne Apologie pleine d'iniures & de faussetez : Et se comparent à ceux sur lesquels il a operé ses miracles. Voila bien pis que ce que disoit le Pasteur, *Stultus ego paruis componere magna volebam*. Ils deuoient au moins attendre iusques à ce que le mesme DIEU eust chassé les diables d'orgueil, d'enuie, de mensonge, &c. de leurs Ames; que d'aueugles qu'ils sont en leurs iugemens, il les eust rendus clair-voyans; & eust guery l'infirmité de leur ceruelle: Car ils eussent connu que ces malades

de l'Evangile ne publioient en leur zele que ce qui estoit à l'honneur & gloire de DIEU, & à l'edification & vtilité du Prochain. Mais eux qu'ont-ils publié contre la defense de Monsieur Gassend, & leur parole donnée, qu'une sordide Apologie, avec ce qu'ils y ont adjousté de pire? Passons outre.

La Roche supposée m'exhorte à ne m'attaquer à Neuré & Barancy; & me veut faire peur de leur réponse, comme de gens grandement à craindre; qui toutefois n'osent m'attaquer que masquez de noms supposez: Mais ie ne les apprehende non plus que des espouuanteils de chenevieres. Que peuuent ils dire pis contre moy, que ce qui est contenu dans la Preface de Neuré, & dans cette lettre de la Roche supposée, à leur tres-grande confusion? Ie pense qu'ils se mordront les doigts de s'estre attaquez à moy, qui ne les cherchois, ny cognoissois, ny n'auois iamais eu affaire à eux: & recognoistront qu'ils me font par trop inégaux. Qu'ayant la verité, le raisonnement, & la franchise de mon costé, Ie fouleray tousiours sous mes pieds toutes leurs malices, fourberies, & fleurettes de Rhetorique; bien que cela soit fort rude à des esprits superbes, qui se flattent vainement du faux tiltre d'Illustres, & s'estiment au dessus de tous: Et moy au contraire, ie ne les sçauois moins estimer, qu'en les estimant ce qu'ils sont; sans vouloir perdre plus de temps à leur respondre cy-apres.

Venons à la conclusion, qui ne paroist que constitures & dragées pour le dessert. La Roche supposée s'intitule mon particulier amy; qui est euidentement vne bien grande trahison, puis qu'il me traite si iniurieusement. Et à la fin de sa lettre: *Songez donc (dit-il) à temperer un peu cette mauuaise humeur, qui vous porte à querreller tout le monde, & chercher tousiours quelqu'un pour*

mordre. Il ne tiendra qu'à vous d'avoir pour amis, en vivant paisiblement, ceux que vous tachez d'attirer sur vos bras par vos inuectives.

Mais font-ce pas des plaisans falots de me parler de la sorte ? N'est-ce pas eux qui m'ont mordu & querellé les premiers, moy n'ayant jamais eu affaire avec eux, ny ne les cognoissans pas seulement ? Or ie leur declare en un mot, que i'ay telle antipathie à toute malice, fourberie & imposture, qu'il en faut estre tout à fait exempt, pour avoir part asseurée en mon amitié particuliere : Et que tant qu'ils seront tels en mon endroit, ie ne scaurois dire en hypocrite, comme me dit la Roche supposée, que ie suis leur tres-humble & tres-affectionné seruiteur,

I: B. MORIN.

Domine, libera animam meam à labiis iniquis, & à lingua dolosa. Psalm. 119.



LETTRE DE MONSIEVR
de Neuré à Monsieur Luillier,
Conseiller du Roy en sa
Cour de Parlement
de Mets.



MONSIEVR,

J'ay tousiours bien preueu , que le Docteur Morin continuant son procedé iniurieux , laisseroit enfin la patience de Monsieur Gassendy , & qu'il l'obligerait à vne defense qui feroit voir quel estoit cét homme , & combien peu il meritoit les eloges qu'il a extorquez de la ciuilité de nostre Amy. Les precautions, que les plus aduisez apportent pour ne venir pas aux mains avec les estourdis, se trouuent la plus part du temps inutiles. Et ce n'est pas merueille si Monsieur Gassendy ne s'en est pû defendre : puis que la necessité , qui contraint trop souvent les sages de se commettre avec ceux qui ne le sont pas , semble auoir mis en desordre la sagesse mesme , & donné de la peine à Salomon , lors qu'il a entrepris de s'expliquer touchant la façon que nous deuons traiter avec ceux qui sont de l'humeur de Morin ; En effet, quand

quand ce grand Roy , toutremply de l'Esprit de Dieu, a voulu enseigner aux hommes comme ils se doiuent comporter avec cette sorte de gens, il conseille de ne leur point respondre, pour ne paroistre pas semblables à eux; puis comme s'il se reprenoit, il dit incontinent, qu'il faut leur respondre pour arrester le cours de leur folie. Deuons-nous pourtant croire que ces preceptes se contrarient. Il est certain que non, puisque l'un & l'autre à son usage auantageux, selon la diuersité des sujets pour lesquels ils ont esté donnez. Il n'y a personne qui n'ait obserué dans le monde deux sortes de fous tres-differents; les vns ne le sont qu'à demy, qui n'extrauaguent que sur certaines matieres, & qui donnent quelque diuertissemens à ceux qui prennent le loisir de les escouter: ce qui les fait passer pour des esprits folets & boufons, que l'on laisse volontiers dans la liberté de dire & faire ce qui leur vient en fantaisie. Pource qu'à n'en mentir point, les guerir seroit les gaster, & desrober quelque chose au diuertissement du public. C'est, à mon aduis, à ces fous que le Sage conseille de ne point respondre, afin de ne paroistre pas aussi peu raisonnable qu'eux. Mais il y en a vne autre espeece que l'on peut appeller fous acheuez & enragez, qui ne font que du mal, & dont tout le monde apprehende la rencontre: que l'on est obligé de tenir dans la loge, & à l'attache: à la guerison desquels l'on employe la verge & le fouet, salutaire & vnique remede à cette maladie. Ceux qui connoissent Morin, peuuent asseurer l'auoir veu dans l'un & dans l'autre de ces estats; & il est tres-certain que Monsieur Gassendy s'est comporté avec luy dans tous les deux, selon le double conseil du Sage. Tandis que ce pauvre homme n'a paru que dans la place Dauphine, pour assembler la populace, & luy donner plaisir en luy preschant ses fantaisies, & ses

reuelations : pendant qu'il croioit luy-mefme fes Almanachs , vendoit fes Horoscopes , faisoit mettre la croix à la main pour dire la bonne aduanture , tandis m s'me qu'il parloit aux Anges de fes Longitudes , qu'il commentoit l'Apocalypse , qu'il annonçoit la venuë de l'Antechrist ; Monsieur Gassendy l'aescouré dans ce facetieux delire , sans autre emotion que de pitié , & s'est bien empesché de respondre à quoy que ce soit qu'il ait pû dire de luy Mais depuis que sa teste creuse est venuë à s'eschauffer par vne contention trop violente de sa foible imagination , sur des chimeres qu'il s'est proposées pour des realitez ; & que ses hypochondres bruslez par la melancholie qu'il a conceuë de se voir mesprisé , n'y ont plus enuoyé de ces legeres vapeurs , qui formoient dans sa petite ceruelle toutes ces agreables illusions ; Lors (dis-je) que de gaillard il est deuenu furieux , que quitant la Marote il a pris le glaïue à la main , pour la destruction des autres hommes , qu'il s'est debatü & emporté contre le merite de Monsieur Gassendy , iusques à le vouloir faire passer , non seulement pour vn ignorant , mais encore pour vn heretique , sans autre raison ny preuue , que parce qu'il n'estoit pas de son opinion ; alors Monsieur Gassendy a iugé que sa patience n'estoit plus vne vertu , que Morin en estoit venu iusques au dernier degré de folie , contre laquelle il estoit obligé de se defendre ; que la charité mesme l'exigeoit , que les preceptes du Sage le commandoient ; & que pour reprimer vne si dangereuse insolence , il estoit expedient de luy faire teste , & de le repousser , comme disent les Interpretes modernes. *Vt illius meretur stultitia , eum solidis rationibus reuincendo , & grauibz prudentibusque verbis arguendo , spurca & probrosa quæ effudit in eum regerendo , & le renuoyer apres , ad gentiles & agnatos , pour apporter la derniere cure à ses frene-*

fies, selon l'aduis d'un Pere de l'Eglise: *Loco verborum* *Cyprian.*
reponet illi verbera, corripet, punit illum, coërce petulantem
linguam, etiam si opus virga & compedibus, ne forte impunitas
illum audaciorum ac deteriore reddat.

Voila Monsieur ce qui a induit nostre patient Amy à faire la responce à Morin, que vous trouuerez dans ce paquet. J'en ay receu deux copies pour vous en faire tenir vne, & vous supplier de la rendre à son adresse. Je croy certainement auoir beaucoup contribué à faire en sorte que Monsieur Gassendy prist cette resolution: Et ie ne seray point fasché que Morin en soit aduerty, & qu'il m'en sçache tout le mauuais gré, que les sentimens d'un arrogant bien estrillé luy pourront suggerer; du moins quand il m'esdira de moy avec autant d'animosité, que l'on en peut attendre d'un homme à qui j'ay procuré l'opprobre, dont il demeurera couuert par cette lettre de Monsieur Gassendy, il le fera avec un sujet plus apparent qu'il n'a fait iusques à cette heure, en outrageant tous ceux qui ont acquis quelque reputation par les lettres. Car c'est tout ce que l'on peut esperer de Morin dans les compagnies où il se fourre, qu'une perpetuelle médifance des gens de vertu, ou bien un continuel panegyrique de soy-mesme; si ce n'est lors qu'estant saisi d'une verue plus gaye pour les auditeurs, il estalle ses meditations secretes. Alors certes Morin n'est point mauuais pour une couple d'heures, on en tire du plaisir, non sans quelque instruction, & du moins voit-on iusques où va l'imagination humaine une fois blessée. Il vous peut souuenir, Monsieur, du recit qui nous fut fait par un personnage, que la probité, la politesse & la doctrine ont esleué depuis peu dans une des principales & plus importantes places de la Cour, du diuertissement que luy donna une fois Morin en l'enrerenant serieusement de sa plaisante vision Apocaly-

„ prique , touchant la venuë de l'Antechrist. Voyez-
„ vous , Monsieur , disoit-il grauement , tout est perdu ;
„ Enfin nous y voila. Tous les Prophetes ont eu beau pre-
„ dire la naissance de ce grand Seduc̃teur , ils s'y sont tous
„ trompez , pour n'auoir pas sceu l'Astrologie. Il n'appar-
„ tenoit qu'à moy seul , qui en ay penetré le fonds. Enfin ,
„ i'ay trouué le point du Ciel , sous lequel ce Fils d'ini-
„ quité deuoit naistre : Et à present que ie vous parle , il a
„ déjà bien trente bonnes années , à conter depuis le
„ temps que Magdeleine de la Palud m'assura qu'il a-
„ uoit esté engendré dans Babylone , de la semence du
„ Magicien Gaufridy , qui fut portée par le Diable à vne
„ Iuifue. Son horoscope est couché tout au long dans l'A-
„ pocalypse : mais faute de connoissance des Astres , tous
„ les Interpretes n'y ont veu goutte. Or Dieu , qui veut
„ le salut des hommes , n'a pourtant pas permis que cela
„ demeurast caché. Il leur a fait la grace de m'en reueler
„ le mystere , afin qu'ils puissent apprendre de ma bou-
„ che , que les iours de la grande persecution sont enfin
„ arriuez. Mal-heur à ceux qui ne m'en voudront pas
„ croire : car ils se verront bien-tost accablez dans les ca-
„ lamitez de cette desolation vniuerselle. Ce sera pour
„ lors qu'ils diront bien , mais inutilement , montaignes
„ & collines tombez sur nous. Il ne sera plus temps quand
„ l'Empire de la Beste sera estably , & nous ne le verrons
„ que trop tost à nostre grand mal-heur. L'Italie a desia
„ senty son arriüée : ces horribles tremblemens de terre ,
„ qui renuerserent dernièrement tant de villes , se firent
„ iustement lors qu'il y mit le pied ; & vous ne tarderez
„ pas à luy voir gaigner bien du pais. Car la puissance de
„ ce fleau du genre humain sera si forte , qu'en moins de
„ trois ans il subjuguera toute la terre ; ne deuant pas em-
„ ployer plus de temps à conquerir tous les Royaumes du
„ monde , que nostre Seigneur fit a prescher son Euangi-

le. Les Armées des Gots, des Sarrazins & des Tartares, ne furent iamais rien en comparaison de la sienne, qui assiegera, & prendra les plus fortes villes en moins de tourner la main. Et sur ce que cette judicieuse personne luy objecta, que c'estoit pourtant vne chose bien difficile à concevoir, comment vne armée pourroit prendre si promptement tant de villes fortifiées, qui sont maintenant par toute la terre. O vrayment, dit il avec son petit ris d'innocent, il y a desia long-temps que j'auois pensé à cette objection: Mais enfin, j'ay bien trouué de quoy la résoudre. Voyez-vous monsieur, il faut que vous sçachiez, qu'il y a vn nombre incroyable de Magiciens & de Sorciers parmy les hommes. Et à vray dire, selon le rapport de ceux qui reuiennent du Sabat, possible que de quatre viuans il n'y en a pas deux qui ne le soient: Or ces gens-là sont tous soldats enrollez dans la milice de Sathan: dont l'Antechrist est le Generalissime. Si bien qu'aussi-tost qu'il battra aux champs, on les verra tous se ranger en foule sous ses estendars; & ils composeront en moins de rien la plus nombreuse armée, qui fut iamais sur la terre; laquelle ne s'amusera pas à des approches, des blocus, des sieges, des circonvallations, & des lignes: pour apres venir par tranchées gagner pié à pié le fossé, & de là passer par des galleries iusques à la muraille, afin de s'y attacher, & puis enfin, les renuerser à force de mines & de sapes. Vrayment les Sorciers sont bien plus diligens, bien plus habiles, & plus subtils. Ne sçauiez-vous pas qu'ils n'ont qu'à monter à cheual sur vn balay, pour s'enuoler par les cheminées de leurs maisons? & se transporter en vn instant aux lieux de leurs rendez-vous, fussent-ils aux extrémités de la terre? Or l'Antechrist étant chef de tous les Sorciers & Magiciens, & ses meilleures troupes ne deuant estre composées d'autre chose, aussi tost qu'il

» approchera vne ville , si elle ne se rend à la premiere
» sommation , il commandera cent mille caualiers de la
» sorte , qui dans vn instant se trouueront , au grand
» estonnement des habitans , rangez tous en bataille au
» milieu de leurs places d'Armes , & par tout sur leur
» rempart , ausquels ils seront contrains de se rendre la
» corde au cou ; & ainsi il ne luy faudra pas vn mois pour
» conquerir le plus puissant Empire du monde. Cent au-
» tres personnes luy ont entendu faire le mesme conte,
» mais tous ne sçauent pas que l'extrauagance d'expli-
» quer la saincte Escriture selon sa propre phantasie , est
» commune à la famille des Morins , & que depuis deux
» ou trois ans on tient dans la Geole de l'Officialité de
» Paris , Simon Morin proche parent , aucuns disent fre-
» re du Prophete de l'Antechrist , pour l'empescher de
» prescher au peuple par les ruës , comme il fait aux mu-
» railles de sa chambre , la doctrine des Illuminez d'Es-
» pagne , avec mille additions ridicules & pitoyables ;
» soit que ce pauvre homme tienne cette folie du seul
» vice de sa race , ou qu'elle luy soit venuë par la commu-
» nication contagieuse qu'il a eue avec nostre Morin. Ce
» que ie ne dis pas neantmoins pour aider à la preuue de
» la foiblesse de son cerueau , ny pour rendre plus croya-
» ble ce que ie viens de rapporter de son illusion sur la ve-
» nuë de l'Antechrist. Car ie suis si asseuré de son peu de
» iugement , que quelque chose que ceux qui prennent
» soin de sa conduite luy puissent représenter , pour luy en
» faire comprendre l'importance , il ne se commandera
» jamais tellement , qu'il n'en fasse parade ; Et ce sera
» grande merueille , si dès la premiere feüille qu'il fera
» imprimer , il n'en parle & n'en piaffe avec son orgueil
» ordinaire ; tant ce Singe a de complaisance & d'amour
» pour les productions de son esprit , quelques monstrueu-
» ses qu'elles puissent estre. Et ie ne doute point que cel-

le-cy ne soit vne des ses bien-aymées, puis qu'elle flatte sa vanité non seulement en ce qu'il croit que c'est vn tesmoignage de sa grande perspicacité & de sa profonde erudition, mais aussi pource qu'à son sens elle le coiffe de quelque rayon de sainteté, non commune, & qu'elle l'esleue au-dessus des notions, où l'on peut paruenir par la raison humaine; Car il a de l'hypocrisie le bon homme, & affecte la reuelation: Il donne mesme iusques dans l'apparition & fait descendre allegrement vn Ange du Ciel, pour luy annoncer des mysteres en fait de speculations. Pour moy, quoy qu'il y en ait beaucoup qui croient que ce miracle n'est rien qu'une illusion de la ceruelle euaporée de nostre homme; j'ay pourtant peine à me persuader, qu'il n'y ait plus de fourbe que de folie. Pource qu'encore qu'au temps que cette fable est escrite, Morin eust déjà les principaux organes du raisonnement en desordre, si n'estoit il point encore tellement abandonné, que l'on peust le tenir pour vn fou à vision Angelique. Et si ie ne me trompe fort, il ne fut bien acheué, que par la derniere touche, que luy donna Monsieur Bouilland en l'année 1645. Mais depuis cette heure-là, *Elleborum frustra*. Le Scarabée est demeuré enseuely dans sa pelote, & Morin n'a plus paru que dans vne demence deplorée.

*Astronomia
Philolaica
lib. 2. pag. 95.*

Il y en a d'autres, qui sans entrer plus auant en la discussion de la verité de cette apparition, craignent seulement qu'elle n'ait pas esté d'un Ange de Lumiere, tant pource que Morin n'en est demeuré gueres plus illuminé, que pource qu'il fait parler cét Esprit d'un Latin, qui n'est pas plus elegant que celuy des Diabes de Loudun. Mais voyons comme il rapporte luy-mesme cette histoire: C'est en la page 220. de la sixiesme Partie de sa Science des Longitudes, imprimée in quarto à Paris chez Libert en 1636.

Dum ergo animi recreandi gratia, ego etiam tubo optico inter alia intuerer systema iouis, circa finem Martij 1635. Vesperis: atque super eius in mundo usu atque necessitate cogitabundus haberem, ecce nuntius è Cælo alacriter aduolans me improuisum sic alloquitur. Quid miselle totus ad Iouem, Lunam, & Solem tuorum aciem oculorū frustra hebetas? Hæc aliis relinque, & utilioribus, ad quæ natus es, incumbere: maior, te gloria manet, si sapueris: quippe Sole etiam super horizontem fulgente, omnes planetas, imo & fixas mortalium oculos effugientes ipse intueberis. Indequè vniuersæ Astronomiæ restituenda ratio omnium verissima maximeque naturalis tibi aperietur; Atque hisce dictis illico euanuit.

Sic mente cælitus tactâ, dici non potest quantâ meus animus alacritate simulque anxietate fuerit occupatus; dum nempe quâ arte stellas, interdum Sole super Horizontem fulgente, intueri possem, apud me rcuoluebam. Ipsam tamen Artem, si qua esset in Natura, breuissimo tempore affecutus sum: memor Venerem etiam interdum cum Sole ipso videri.

Atque idcirco postridie ante Solis ortum, insignioribus adhuc stellis in Cælo fulgentibus, tubum opticum teretem sesquipedalem albidâ Planisferij à me inuenti (qui Armillarum æquatoriarum munia omnia obit simplicissimè) applicui: Eoque super museoli mei fenestram occidentalem aptato, (ne in orientali, Solis orientis fulgor mihi esset impedimento) selegi Arcturum, ad eamque stellam nobilissimam tubum direxi. Quâ per tubum deprehensâ, illam studiose in Tubo seruandam suscepi, imò cum mira voluptate seruauî ferè vsque ad ortum Solis: subinde experimentum faciens illam Tubo cerni, dum solis oculis nullatenus conspici posset: At circa Solis ortum, nubecula interpositione vaneſcens, fuit mihi deinceps impossibile eamdem denuo reperire: qua dere non parum contristatus, pacato tamen degi animo; quòd scirem me illam multò diutius seruaturum fuisse, nisi
nubecula

nubecula illa gaudio meo inuidens intervenisset. Die igitur sequenti eadem horâ, Cœloque valde sereno, rursus tubum ab Arcturum collineavi, illamque in tubo servavi, donec Solis exorti splendor mihi ex parte occidentis appareret. Parùm tunc absuit quin gaudij mei impetus totum rursus negotium inturbavit. Nihilominus spiritibus sese nimium diffundentibus subitò reuocatis, sedataque gaudij tempestate, tranquillo animo stellam in tubo continui, plusquam per dimidiam horam à Solis exortu : tuncque in ipso tubo præ exilitate disparuit. Et ego pro tam nobili utrique arcano, gratias immortales Deo Opt. Max. persolui.

Alterâ iterum die sequenti, quoniam Venus in Aquario retrograda Solem orientem precedebat, illam similiter suscepi per tubum observandam. Planisferio igitur aptato super cubiculi mei fenestram, quæ à Meridie ad occasum parùm declinabat, direxi tubum in Venerem, tunc corniculatam, atque à Sole nondum orto separatam plano muri meæ fenestræ, ut proinde Solis orti radius, hac etiam observatione mihi non posset officere : Veneremque in tubo servavi multò facilius, quàm Arcturum per horam à Solis ortu & amplius, cum tamen sine tubo nullatenus videri posset. Cumque adhuc in tubo optimè cerneretur, experimento contentus à diuturniore cum ipsa voluptate ultro abstinui.

Idemque in aliis Planetis atque Fixis observavi ; quippe artificio supra dicto astra videri, Sole etiam supra Horizontem eleuato.

Morin & Mahomet ont cela de commun, que l'un & l'autre de ces faux Prophetes se vante d'auoir communication avec les Anges : mais celuy-cy, tout pauvre esclaue, ou facteur de Marchand qu'il estoit, en bien vsant des conseils du sien, si nous le voulons croire, establit en moins d'un rien sa fausse doctrine & sa tyrannie dans la moitié de l'Asie & de l'Afrique. Et vous Monsieur le Docteur en Medecine, Professeur

Royal en Mathematiques , s'il m'est permis de vous adresser mon discours , avec vostre grande capacité & les instructions de vostre Ange , à peine auez-vous appris à voir les estoilles avec la lunette , le Soleil estant déjà esleué sur l'horison. Pratique si facile & si vulgaire , qu'il n'y a personne si peu exercée aux obseruations celestes , à qui cela ne soit arriué vingt fois sans le secours des Anges ; voire mesme sans celuy des Lunetiers. Monsieur Bouillaud encore , enfant , & déjà plus sçauant que vous , a suiuy vne fois Arcturus de sa seule veuë , plus d'une demie heure , depuis le leuer du Soleil. Mais apres tout , qu'auuez-vous profité de cette mystérieuse apparition , de l'admonition familiere que vous fit vostre Ange , de ces preparatifs & obseruations par trois matinées , que vous prenez tant de plaisir à décrire ? Vous reconnistes enfin que les Estoilles n'ont point de barbe ; car vous adjoustez estant reuenu de vostre transissement de joye , *Dicam ergo quid in his obseruationibus occurrit notatu dignum ; Primum ergo stella fixa suo capillitio prorsus spoliata cernuntur interdum , &c.* Allez , allez , *Miselle* , vous ne deuiendrez iamais seducteur de peuple , ny fondateur de Monarchie. Et apres vous estre si mal & si inutilement seruy de la Lunette , dont vostre Ange vous auoit enseigné l'vsage , avec des paroles si gratieuses , & apres auoir pris tant de frayeur de la beste de l'Apocalypse , & en auoir presché la venue si à contre-temps , vous ne passerez iamais que pour vn mal-adroit Lunetier de l'Antechrist.

Avec cela neantmoins , ce visionnaire a bien l'arrogance de se produire pour restaurateur de l'Astrologie , & de persecuter les Ministres du Royaume , pour auoir des recompenses. Car le principe de sa folie n'est pas seulement la vanité , son esprit n'est pas moins rongé d'une sordide auarice , qui le tourmente si cruelle-

ment, que les immenses liberalitez des Grands ne font que l'enflammer dauantage. Aussi pour dire la verité, n'a-t'il pas encore obtenu ce qui luy est le plus necessaire, & qu'il merite le mieux; puisque ses chimeriques labours ne luy ont pas encore acquis la place vacante aux petites maisons, par la mort de Lerty, pour y tenir eschole ouuerte de sa Philosophie. Certes, quand cette fortune luy sera arriüée, il ne manquera pas d'estre aussi bien suiuy que son predecesseur, pourueu que l'on affiche sur la porte, *Ceans Iean Baptiste Morin, enseigne l'art de deuiner, de faire des Almanachs, dire la bonne aduenture, trouuer la pierre philosophale. Il monstre aussi la science des Longitudes, la solution du probleme sur le mouuement de la terre, l'explication de l'Apocalypse touchant la venue de l'Antechrist, le moyen reuelé par l'Ange pour voir les Estoilles en plein iour*; Mais ie m'aduise que ce seroit vn grand crime d'oublier la qualité de *Docteur*, & encore vn plus grand de luy donner celle de *Maistre d'Eschole*; quoy qu'il en ait fait le mestier iusques à quarante ans, allant de porte en porte la plume à l'oreille, & l'escritoire au costé, mandier l'escolier, & gagner le mois en monstrant à escrire, lire, calculer & compter, tant au ject qu'à la plume; Car pour les principes de la langue Latine, qui est le sublime de cette vacation crottée, il s'y est addonné depuis fort peu de temps, & ie pense mesme seulement depuis qu'il est Docteur en Medecine. Vous ne l'offenserez pas moins de l'appeller *Precepteur*: & quoy que ceux qui ont conuersé avec le Souuerain Prestre selon l'Ordre de Melchisedech, n'ayent point creu le

*Luc. v. 8.
45. 9. 49. 8.
13. 21. 7.*

deshônerer en le nommant ainsi, Morin veut pourtant que Prestre & Precepteur, soient des iniures. Resoluez-vous donc pour euitier sa colere, de le traiter de *Docteur en Medecine*, sans vous obliger pourtant à declarer en quelle Vniuersité, puis qu'il le cele luy-mesme; en quoy certes il desoblige beaucoup de ses semblables, qui auroient grande enuie & grand besoin, d'apprendre en quel lieu on est receus'y facilement au Doctorat, sans sçauoir ny Grec, ny Latin, ny auoir aucunes des conditions, qu'Hippocrate requiert en ceux qui font profession de cét Art si excellent, pour la conseruation des hommes. Mais pensez-vous que nostre pretendu Docteur les ait iamais conuës, ny qu'il croye que pour estre Medecin, ce n'est pas assez de s'imaginer de l'estre; mais qu'il faut pratiquer, & monstrier son experience, & son iugement par des cures signalées. *Μὴ λόγῳ μόνον ἀλλὰ καὶ ἔργῳ ἡγεῖσθαι νομίζεις*: autrement que l'on est réputé ignorant & sans industrie. *τὸ γὰρ οἶδεις, μὴ ἀρήσσειν δὲ, ἀμαθίας ἢ ἀπειρίας σημείον ἔστι*. Ce sont les termes d'Hipocrate, dont Morin n'a iamais ouy parler, non plus que des suiuaus, comme estant des maximes entierelement contraires à celles qu'il veut obseruer. Vn Medecin doit, auant toute autre chose, prendre garde à contenir son esprit dans vne grande moderation, non seulement en s'abstenant de trop parler; mais encore en reglant toutes les actions de sa vie. *Δὲ ὃ τῶτον σκοπεῖν τὰ ὃ ᾤει τὴν ψυχὴν πόρρω· μὴ μόνον τὸ σιγᾶν, ἀλλὰ ἔτι ᾤει τὸν βίον παντὶ ἔντακτον*. Ne faire point de bruit dans les contestations, estre modeste & iudicieux en ses responses. *πρὸς τὰς ἀναισias σιγητικὸς, ὁ δὲ πρὸς τὰς ἀποκρίσεις*. Faire tout ce qu'il dit, & n'aduancer rien, dont il ne puisse donner la demonstration. *πρὸς λόγους ἀνυσὸς πᾶν τὸ ὑποδείχθαι ἐκφέρειν*. Estre ciuil, courtois, gracieus, sociable, obligeant enuers tous les

Hippocrat.
lex.

Idem de de-
centi habi-
tu.

De medico.

De decenti
habitu.

Hommes, point vetillart, ny chicaneur; *ὅτι καὶ ῥαῖος χάρειν διαπύμνος, ὁμιλήπιος, ἀπειτέρης, φιλάνθεπος.* Et en vn mot, *καλὸς ἔ ἀγαθός*, c'est à dire, accom-
ply en toutes ses mœurs, afin que viuât de la sorte il puis-
se jouyr d'une tranquillité interieure, qui paroisse sur vn
visage, & dans l'embompoint de toute sa personne.
Ὅρῳ δ' ἔχρωσε ἔ ὄταρκος. Pourroit-on bien trouuer
quelqu'un entre tous les imposteurs, qui s'attribuent le
nom de Medecin, plus despourueu de toutes les con-
ditions requises par Hipocrate que Morin. De quel-
le pratique s'oseroit-il vanter, luy qui n'est que babil,
& de qui toute la suffisance consiste en sa propre opi-
nion. Y a-t'il dans la plus basse lie du peuple vne hu-
meur aussi contentieuse que la sienne. S'il s'esleue la
moindre controuerse entre les sçauans, Morin] ay-
meroit mieux mourir, que des'en taire, & mesme de
n'en pas parler indiscrettement. Ses escrits ne sont
qu'inuectiues, ses entretiens que mesdisances, & ses
occupations que bagatelles. Son cœur est incessam-
ment troublé de haine, de jalousie, d'enuie, d'auarice,
d'ambition, & d'une infinité de passions violentes, qui
renuersent toutes les facultez de son ame, & deffigu-
rent son corps: on le voit palle, hideux & deffait; pour-
quoy? parce que,

Ambitione mala aut argenti pallet amore.

Le bon-heur d'autrui l'afflige plus que sa propre mise-
re; il n'a nul sentiment de l'infamie & des iniures qui
tombent sur luy; mais s'il voit quelque honneste hom-
me s'accroistre en honneur, si Monsieur Gassendy est re-
cherché des estrangers, estimé par les gens de reputa-
tion, aymé & chery des Princes, Morin en seiche &
maigrit.

Inuidus alterius macrescit rebus opimis.

Auec tout cela il desespere de ce que tout ce qu'il fait;

tout ce qu'il dit, avec tant d'impudence, ne sert qu'à le
 faire siffler. Les plus simples se deffient de ses promesses,
 & des assurances qu'il donne avec tant de caquet.
 σφαλερὴ γὰρ καὶ δ' ἡπαιστος ἢ μετ' ἀδελφείας ἡ γάρησις, dit
 Hipocrate. Mais suiurons, ie vous prie, ce grand hom-
 me, & vous prendrez infailliblement plaisir à conside-
 rer vn Medecin tel qu'il le figure, & puis à rabaissier
 vostre veuë sur ce rebut de l'escole, & cét excrement de
 la Medecine, Morin; qui ose impudemment s'adocto-
 rer de soy-mesme. Ainsi les Peintres mettent souuent
 en vn mesme tableau vn Nain contre-fait au pied d'un
 Heros, pour releuer la grace de l'un par la difformité de
 l'autre. Voicy les parties dont Hipocrate compose
 son Medecin. Αφιλαργεῖν, ἐνέροπῃ; ἐρυθείσις, κατασο-
 λή, δόξα, κρείσις, ἡσυχία, ἀπάντησις, καθαριότης, γνωμο-
 λογία, εἰδήσις τῶν πρὸς βίον χρηστῶν καὶ ἀναγκαίων καθαρῶν
 ἀπεμπόλησις ἀδαισδιαιμονία, &c.

ἀφιλαργε-
 εῖν.

ἐνέροπῃσις.

κατασολή.

δόξα.

κρείσις.

Qu'est-ce que les plus fauorables peuuent remarquer
 en la personne de Morin, qui ne soit directement oppo-
 sé à ces excellentes parties. Ya-t'il vne auarice plus fa-
 le & plus mendiante que la sienne; cette vilaine passion
 l'emporte dans vne effronterie si desreglée, que non
 seulement il tend la main sans honte, mais les rebufades
 mesmes, les huées, & dit-on encore les coups, ne l'ont
 peu faire rougir: son petit mantelet, ses gregues ferrées,
 & son bas vert, ne le font-il pas prendre plustost pour
 le harlequin que pour le Docteur de la Comedie. Et
 quelle peut estre sa reputation; puis qu'il n'est inge-
 nieux que pour se fantasier des opinions & visions ridi-
 cules; & qu'il n'eut iamais la discretion de iuger la diffe-
 rence qu'il y a entre luy & vne personne consommée
 dans les langues, les belles sciences, & la Philosophie.
 Luy, dis-je, qui prit sa premiere leçon dans les Elements
 d'Euclide, lors de sa promotion à la Chaire Royale.

Monsieur Herigonne fut son maistre, contre lequel il
 s'est depuis reuolté avec tant d'insolence & d'ingrati-
 tude. Aussi au lieu de la patience & de la douceur que
 propose Hipocrate, comme le principal ornement de
 son Medecin, Morin ne se plaist qu'en la contradiction.
 Toute la nature dans son plus grand desordre, ne sçau-
 roit former vn esprit plus inquiet, plus confus, & plus
 turbulent que le sien : qui s'est attaché iniurieusement
 à tous les Mathematiciens de nostre âge, depuis Galilei
 iusques au dernier des disciples du Curé de Milmonts.
 Et cette humeur acariâtre qui le possède, fait qu'au lieu
 d'auoir la rencontre agreable, il n'aborde iamais per-
 sonne que pour le choquer, en médifiant des hommes de
 reputation, ou l'ennuyant iusques au desespoir, par le re-
 cit de ses propres loüanges; tant il est estoigné d'auoir de
 la grauité dans son entretien; & d'estre sententieux en
 ses paroles. Son esprit mercenaire fait trafic de tout, &
 s'il s'est iamais ingeré de traiter quelque miserable Pa-
 lefrenier, abandonné dans vne escurie; ce n'a esté qu'à
 dessein de faire valoir ses meschantes drogues, & de les
 debiter avec profit. Car non seulemēt, il ne sçait rien en
 la composition & distribution des vrais remedes, mais
 il n'a iamais eu le courage de se deffaire de la bassesse &
 de l'ordure, qu'il a contractée en rodant avec les baste-
 leurs; & ioignant la profanation à l'ignorance, il ne
 feindra point de promettre la guerison d'un mal qu'il ne
 connoist pas, à force de neuuaines, de versets pronon-
 cez à reculons, & de billets pendus au cou. Ce que nous
 pouuons dire estre aussi vn effet de cette lasche super-
 stition, de laquelle il est tellement aueuglé, qu'il croit
 tousiours auoir à ses talons les Magiciens, les Sorciers
 & l'Antechrist mesme; dont il a telle frayeur, que toute
 sa vie il n'a fait que crier, *gare, gare, le voicy*. N'est-ce pas
 là vn gentil Docteur en Medecine; & le sieur de la Ro-

ἡ συνείδησις.

ἀπαίτιος.

γναμολογία.

εἰς τὸν τῶν
 θεῶν βίον
 χρῆσθαι τῇ
 ἀναγκῇ
 καὶ ἀπορίᾳ.
 Ces mots se
 lisent diuer-
 sement, &
 ie me suis
 accommodé
 à tous les
 sens que l'on
 leur donne.
 Ἀδελφίδαι-
 μος.

che n'est-il pas vn grand faussaire, de luy auoir rogné cette qualité : Il auroit pourtant pû apporter tout ce que nous auons tiré d'Hipocrate, pour monstrier que Morin ne merite pas ce grade, selon l'intention de ce grand homme; mais s'il se fust aduisé de tant citer cét Auteur, Morin l'eut pris sans doute pour vn Medecin, par la mesme raison qu'il l'a iugé pour vn Aduocat, à cause qu'il a cité le Code, le Digeste, & le Decret. Car Morin mesurant l'estude des autres par sa petite capacité, ne croit pas possible qu'un homme sans auoir des caracteres, soit sçauant en Iurisprudence, ny en Medecine, s'il n'est passé Docteur comme luy, & beaucoup d'autres afines ses semblables. Permis à luy d'en prendre le titre, & d'en parer les premieres pages de ses liures.

Quand à celle de Professeur aux Mathematiques, j'auoüe franchement que ie ne la luy sçauois souffrir. Il n'a point fait d'autre tort à la Medecine que de l'abandonner, parce qu'il n'y entendoit rien : mais encore qu'il soit tres-ignorant aux Mathematiques, il a fait tout ce qu'il a pû pour en des-honorer la profession, & en profaner l'usage. Ces belles & veritables sciences, qui rauissent l'intelligence de l'homme iusques au Ciel, & luy ouurēt le chemin pour penetrer iusques au fond de la Nature; qui rendent les esprits capables des plus hautes merueilles, ont tousiours esté mal-heureuses à ce point, qu'il s'est trouué de siecle en siecle, & presque sans cesse, des Morins, qui en les maniant indignement les ont tellement diffamées, qu'elles ont toujours passé dans l'opinion de plusieurs, pour des arts illicites & pernicieux à la société des hommes. Et non sans quelque sorte de raison; car tous ces charlatans n'y ayant iamais pû rien comprendre, se sont contentez d'en vsurper le nom, & de se donner la reputation d'en posseder les talents,

lents, sans faire autre chose que d'en pervertir la pratique, & en alterer la nature, sans mesme en entendre les termes. Les vns content que l'Arithmetique est toute pleine de nombres magiques, ou le rabinage & la cabale trouuent des merueilles; les autres que la Geometrie est la Geomance, & les autres, que la Musique n'est qu'enchantement; & les plus dangereux que l'Astronomie, n'a point d'autre fin que les impostures, dont les Astrologues se seruent à tromper le vulgaire. Il est certain que les tireurs d'Horoscopes ont tousiours esté les plus outrageux à l'honneur des Mathematiques, pour auoir insolemment pris la qualité de Mathematiciens par excellence, & s'estre neantmoins incessamment prostituez à tant de fourbes & tant des meschancetez punissables, qu'il a fallu les bannir des Estats, faire des Loix pour les exterminer, & renoueller dans l'Eglise les Anathemes que le saint Esprit auoit desia si souuent prononcés contr'eux dans les Escritures sacrées. Mais nonobstant toutes ses rigueurs, il en eschappe tousiours quelqu'un. Cette vermine pullule contre les remedes, & produit tousiours des Morins, qui penetrant par leur hardiesse jusques dans les cabinets des Grands, n'en peuuent estre chassez que par quelque gratification, dont ils s'enorgueillissent apres deuant les simples, comme d'une recompense de leur valeur; quoy qu'en verité ce ne soit qu'une redemption de leur importunité, ou une aumosne pour le soulagement de la necessité pressante, & la noire faim qui paroist sur le visage de ces faux Philosophes. C'est ce qui rend aujourd'huy l'Astrologue Morin si fier & si insupportable, à cause qu'il a obtenu des pensions de la facilité des Ministres. Il pense auoir rendu des seruices à la France, plus considerables que ceux de son bienfauteur. Il voudroit mesme faire declarer criminel d'Etat, celuy qui auroit parlé de

luy avec trop peu de reuerence, ou qui auroit manqué de l'appeller Monsieur le Professeur du Roy. Il croit qu'il n'est pas plus deffendu de rogner la monnoye, que de luy retrancher cette noble qualité qu'il a si glorieusement remportée sur ses competeurs, en consideration des belles aduentures qu'il auoit predites sur la maladie du feu Roy à Lyon, au grand soulagement de la France. Et cependant nous auons veu ce qui en a reüssi, & tout le monde sçait que Morin n'obtint sa Chaire que par la recommandation de la deffunte Reyne Mere, seduite de l'apparence de milles fausses predictions, dont ce meschant amusoit sa credulité, & dont elle tesmoigna du regret à sa mort, (c'est ce que veut dire Monsieur Gassendi) s'en voyant surpris en vn temps bien esloigné de la longue vie, que luy auoit promise son Astrologue. Il y a mille autres rencontres, ou la fausseté de ses propheties ont paru, dont le recueil excéderoit la grosseur d'un iuste volume. I'en rapporteray seulement quatre qui sont venuës à ma connoissance, & qui peuuent estre certifiées par vne infinité de tres-considerables tesmoins. La premiere est, d'un des fils de Monsieur de Chauigny. Nostre Mathematicien s'estant intrus dans cette maison, ouuerte à tous les gens de lettres, apprit des nourrices l'heure de la naissance de l'enfant, sur laquelle il dressa l'horoscope à sa fantaisie. Car voyant qu'il estoit né de pere & mere, soigneux de l'institution de leurs enfans, puissants en dignitez, credit, & richesses, l'Astrologue creut qu'il ne pouuoit faillir réglant sa prediction sur les apparences, & predict hautement que ce nouveau né seroit vn des plus rares, plus sçauants, plus illustres, & plus heureux de son siecle. Et veritablement, il estoit destiné pour vne grandeur immense, & vne felicité suprême; Morin ne s'estant trompé seulement qu'autant qu'il y a de distance de la Terre au Ciel, où Dieu appella cette petite creature

bien peu de temps apres qu'elle eut receu le Baptefme. Il auoit pris fes mefures & raifonné de mefme fur ce qu'il croyoit deuoir arriuer au fils aîné de Monsieur le Prefident Gobelin, & ce luy sembloit avec plus de certitude, pource qu'alors que cét horoscope fut dressé, ce ieune homme commençoit d'entrer dans le monde, bien fait de corps & d'esprit, bien instruit dans les lettres, ciuil & agreable à chacun, se difpofant ouuertement à fuiure la profeffion où son pere auoit acquis tant d'honneur; & c'est pourquoy Morin affeura avec son audace ordinaire, qu'il feroit vn des plus grands hommes de la Robbe, & paruiendrait aux plus eminentes charges de Iudicature. Et neantmoins, par ie ne fçay quelle ardeur de courage & emportement de ieunesse, il prit les armes, & mourut incontinent apres. Vn des premiers Ministres d'Eftat durant le dernier regne fit appeller la Brosse & Morin pour confulter fur fa figure celeste. Les opinions se trouuerent parties d'abord, l'vn foustenant qu'il auoit Cancer en son ascendant; & l'autre Leo. Enfin, les deux Mages s'accorderent, & prononcerent vnanimement qu'il auoit encore fept années de vie, au bout desquelles vne grande maladie le menaçoit, & qu'en eftant refchappé il n'auoit plus rien à craindre que l'extreme decrepitude: mais nonobftant cét authentique decret peu de iours apres, *mortuus est diues.*

Ecce nunc aliam historiam, pour vfer de la tranfition ingenieufe & du friand Latin de nostre Docteur. Vn Gentil-homme encore à l'Academie, s'adreffa à luy pour fçauoir la fuite de fa bonne fortune. Morin qui croit qu'il n'y a rien meilleur pour se faire bien payer que de respondre choses agreables, ne manque pas de luy certifier qu'il feroit le plus vaillant, le plus adroit, & le plus heureux aux armes de son temps: & principa-

*En la feuille
d'iniures
qu'il a fait
imprimer
contre Mon-
fieur Bouil-
laud p. 3.
lin. penult.*

lement en duel. Ce qui enfla tellement ce ieune courage qu'il deuint querelleux: & sur vne occasion fort legere fit vn apel mal à propos, qui luy cousta la vie. Son aîné qui perdoit en la personne de ce cadet, & gaignoit peu en son bien, sçachant que Morin estoit la cause de ce mal-heur, deschargea sa cholere sur le dos de ce deuineur avec tant d'excès, qu'il y eut raport de Chirurgien; plainte au Baillif de sainte Geneuiefue, & finalement accord entre les parties par l'entremise des Peres de la Doctrine Chrestienne; moyennant vne ample reparation ciuile que Morin receut avec grande consolation, imitant en cela les coupeurs de bourses, & les Bohemiens, ses camarades en bonne aduventure; qui ne font que secouer les espaules apres auoir esté demy-affommez de coups, & traînez parmy les fanges, pourueu qu'ils emportent la bourse, laquelle ils ont esté surpris desrobans en plein marché. Ces dernieres circonstances me dispensent de nommer le Gentilhomme, ou de le designer plus particulierement.

La verité de tout ce que ie viens de dire, & d'une infinité d'autres rencontres, où ce vendeur de fumée s'est incessamment abusé, est si connue; que tout ce qu'il en pourra dire passera tousiours pour estre mille fois plus apocryphe, que n'est le Liure d'où il tire le passage qu'il appelle sa Deuise; & qu'il s'applique aussi mal à propos que la qualité de Mathematicien, puis qu'il est manifestement aussi grand menteur que franc ignorant. C'est ce que ie vous promets, Monsieur, de faire paroître dans peu de temps, ou plustost d'en faire souuenir tous les Sçauans. Ce ne fera pas en respondant vulgairement à ses futilitez; ie veux desormais le traiter en Docteur; Et afin que les Nations estrangeres puissent iuger de nostre querelle, ie leur donneray en Latin toutes les pieces du procez. La lettre de Monsieur Gallien.

di sera la fondamentale, & celle-cy n'y sera pas oubliée. Il est à propos que la posterité connoisse, que nostre Socrate n'a pas vescu sans estre persecuté de l'enuie; & qu'il a eu en la personne de Morin son Melitus, qui l'auroit volontiers fait condamner dans l'Areopage de Rome, pour n'auoir pas sacrifié aux Idoles de Saturne, Iupiter, Mars & Mercure: Et c'est par là que ce Zelé a creu pouuoir se rendre immortel; la seule gloire d'auoir attaqué Monsieur Gassendi. estant capable de conseruer sa memoire. Et pour moy, ie me veux encore vanter d'estre aussi son Appion, & de donner par mes escrits quelque durée à son nom; que les beurrieres auroient bien-tost exterminé, s'il n'estoit que dans ses propres liures; ou s'il ne prenoit enuie à ces Dames de l'eloquence de la place Maubert, de cōseruer ces dignes ouvrages, à cause des belles pointes, & riches phraſes quelles y-peuent trouuer, pour s'en seruir dans les Panegyriques quelles se font les vnes aux autres, tous les iours apres des-jeuner. Et c'est la meilleure fortune que puissent auoir les eserits de Morin pour leur durée. Car enfin quand ses plus affidés sectateurs auront veu qu'ils ne contiennent que du vent, & qu'ils sont semblables à ces boëtes vuides des Apothicaires, qui n'ont que de beaux eseriteaux, que luy-mesme n'entend pas; on peut bien sans horoscope deuiner qu'ils ne la feront pas longue; & qu'ils n'ont pas beaucoup à viure. La peine qu'il prend à les louer luy seruira peu; il proteste qu'ils se liront vn iour dans les Escoles de Philosophie, de Medecine, & de Theologie; Et moy, ie soustiens qu'ils ne seront iamais que le rebut des boutiques des Libraires, s'ils sortent de la sienne: & que le mespris ne les abandonnera point qu'il ne les ait reduits au neant, ou du moins à estre vendus à la rame au bout du pont saint Michel.

Ce n'est pas neantmoins qu'il ne se soit donné grand soin, pour me faire entendre que ses ouurages estoient merueilleux: & qu'en vertu de son admirable sçauoir, il trauailloit sur des matieres fort excellentes. Quand il me vint visiter à Aix l'année qu'il marque dans ses gazettes, apres auoir bien declamé contre Monsieur casfendi, & Monsieur Bouïllaud, tout son entretien ne fut que de ses miraculeux trauaux, & de ses journalieres productions, tant imprimées qu'à imprimer: Il eut mesme si grande peur apres m'auoir quité, que i'en oubliasse le Roole, qu'il s'aduifa d'une assez plaisante supposition pour me l'enuoyer; on le comprendra mieux dans la lettre qu'il m'escruiut pour cela, qui s'est conseruée parmy quelques autres enuelopes; en voicy la copie. *Monsieur ie ne pensois pas que la necessité m'obligeast a accepter l'offre que vostre courtoisie m'a faite, de prendre quelque commission pour moy, ie croy auoir perdu à Aix chez Mademoiselle Martelli, où i'estois logé, un livre de ma façon imprimé contre les Athées, accompagné de quatre manuscrits. L'un, de quantitate, l'autre de motu, l'autre de natura vel anima hominis, l'autre de tempore creationis mundi, pieces curieuses & nouvelles de ma façon. Je vous supplie vous en informer, & s'ils se trouuent les enuoyer à Paris chez Mademoiselle de Chaigny, pour me les rendre, & ie donneray une pistole pour le vin, de qui il appartiendra, sans conter l'obligation tres-grande que i'aurois de demeurer toute ma vie, Monsieur vostre tres-humble seruiteur Morin, à Montdragon ce 10. Iuillet 1646.*

Je m'apperceus incontinent de la fourbe, & ne laissay pas pourtant d'aller chés cette Demoiselle, pour y faire l'enqueste: & afin qu'il apparut de ma commission, ie fis lecture de ma lettre; mais à peine estois-je à la moitié, qu'une seruante m'interrompant, s'escria; *Pore de Diou!*

Et ont diable aret tingu tout aquo, que nauiet pas solament vn pichon basagner per estremer son baretin de neuch. I'auoüe que ie fus bien honteux, estant assez assureé que ce que ie cherchois & rien estoit tout vn. Le m'en tiray pourtant le mieux que ie pus, & de ce mesme pas ie m'en allay prendre la plume, pour luy rendre conte de ma diligence. Il receut ma lettre, & me répondit par vne autre que i'ay eu soin de conseruer, & pour cause. Dans cette réponse est contenu vn fort courtois remerciement, en suite duquel il me prie de n'estre plus en peine de ses liures, m'assurant qu'il auoit retrouvé toute cette Bibliotheque, égarée parmy les hardes de son équipage. Veritablement i'en estois desia hors de soucy, & n'auois pas grand besoin de cét aduis pour m'en tirer.

*Puissance de
Dieu, ou
Diable au-
roit tenu
tout cela,
qu'il n'auoit
pas seulemēt
vn petit sac
pour mettre
son bonnet de
nuit.*

Ie laisse à penser maintenant, si apres vne pareille piece, il a raison de me raualer tant en ses escrits, comme il fait, protestant si souuent qu'il ne m'a iamais veu, ny n'a iamais eu à faire de moy. Et me traittant, en vn mot comme vne personne entierement indigne de sa connoissance. Cependant, si i'estois homme à faire parler les morts, ainsi qu'il me reproche, ie pourrois bien prendre à témoin le deffunt Pere Merfenne, & encore le bon homme Monsieur Herigone; & ces deux personnes aussi candides que la terre en ait portées depuis longtemps, feroient bien souuenir cét orgueilleux, qu'il ne me doit pas si fort méconnoistre, apres m'auoir employé pour luy faire voir Monsieur Bouillaud, homme d'honneur & de merite, que Morin auoit desia sottement choqué sans l'auoir iamais connu, de quoy il a esté pareillement si idiot que de se vanter. Et c'est de là que ie tire beaucoup de consolation; car ie voy bien qu'il n'y a pas grand des-honneur de n'estre pas connu de luy, puisque cette personne a bien pû luy estre inconnüe;

& neantmoins estre estimé par toute l'Europe, pour vn des plus grands Mathematiciens que nous ayons. Ce que ie dis icy n'est donc pas pour me deffendre de l'infamie que Morin croit me procurer, en me reprochant que ie ne suis pas honoré de sa connoissance; c'est seulement pour faire voir le peu de iugement qu'il a dans sa vanité. Car si pour vne chose aussi peu importante, comme est celle d'asseurer qu'il ne me connoist pas, il s'est engagé dans ce mensonge si grossier, n'y a-t'il pas vn iuste sujet de douter qu'il die la vérité, lors qu'il s'agit de quelque chose où il a plus d'intérêt. Il ne seroit pas mal aisé d'apporter mille conuictions du plaisir qu'il prend à mentir; mais quel loisir faudroit-il auoir pour s'amuser à faire le Roman de tant de faussetez? Et neantmoins il a encore l'audace d'en acuser les autres, & leur objecter, nō vn mensonge commun, mais vn mensonge sacrilege, tel qu'est la falsification de l'Escripture sainte; & cela mesme lors que l'on la rapporte mot à mot. Et parce qu'il n'entend ny Grec ny Latin, non pas mesme celuy de Breuiare, il accuse de faux le sieur de la Roche, pour ce qu'il a dit, que *parfois Iesus-Christ ayant fait quelque miracle, deffendoit instamment de les manifester*. Et comment ce Docteur voudroit-il mieux tourner, ἡ πολλὰ ἐπεμύα αὐτοῖς ἵνα μὴ αὐτὸν φανερὸν ποιήσουσι. N'est-ce point qu'estant aussi barbare en Latin & en François, comme il est ignorant au Grec, il voudroit qu'on escorchast la version; & parce qu'il y a *vehementement* au Latin, voudroit-il point que l'on dit *vehementement*, au lieu d'*instamment*: car c'est ce terme d'*instamment* qu'il arguë de faux. Je voudrois demander à ce beau censeur, si ce n'est pas deffendre *instamment* à quelqu'un de parler, que de s'émouuoir iusques à fremir contre luy, le menasser, & brusquement, c'est bien plus qu'*instamment*, le chasser dehors (Morin adiouste.

adiousteroit par les espauls.) En luy disant, prens bien garde de n'en dire mot à personne, ἐμβρυζαῖδος αὐτῷ δὲως ἐξέβαλεν αὐτὸν , Ἐ λέγει αὐτῷ ὅρα μηδενὶ μηδεν εἰπης. *Fremens in ipsum*, ou selon la vulgate, *minatus ei, statim eiecit eum*, & dicit ei *vide nemini dixeris*. Telles sont les faussetez dont ce veritable faulsaire accuse les autres, sans en donner aucune raison. Mais que répondroit-il, à qui luy montreroit le texte de saint Thomas, qu'il a tout trōqué & falsifié, pensant luy faire dire ce qu'il veut. Voicy fidellement l'ordre & la suite naturelle du passage qu'il a allegué; *Apetitus sensitivus est actus organi corporalis; VNDE nihil prohibet ex impressione corporum caelestium aliquos esse habiles ad irascendum, vel concupiscendum vel aliquam huiusmodi passionem: sicut & ex complexionem naturali plures hominum sequuntur passionem, quibus soli sapientes resistunt. Et ideo ut in pluribus verificantur, quae pronunciantur de actibus hominum secundum considerationem caelestium corporum. Sed tamen, ut Ptolomeus dicit in centiloquio, Sapiens dominatur astris, &c.* Et voyez avec la mesme fidelité le rapport tout au long qu'en fait Morin dans sa réponse au sieur de la Roche, *In prima sec. q. 9. art. 5. Ex impressione caelorum aliqui sunt habiles ad iram, & ad alias passiones quas homines sequuntur, ob quam causam Astrologi ut in plurimum vera dicunt (notez ces belles paroles) sed sapiens dominabitur astris.* Y eut-il iamais falsification plus manifeste, ny plus impie que celle-cy: puisqu'elle tend à faire croire que S. Thomas a voulu soustenir l'imposture Astrologique, ainsi que Morin l'auroit bien voulu persuader; mais quelque depravation qu'il ose tenter en citant les passages de cet Angelique Docteur, il n'en rapportera iamais vn seul qui le semble favoriser; & celuy qu'il a si malicieusement alteré, n'a iamais esté que pour condamner la Iudiciaire. Mais peut-estre Morin n'en est-il

pas si coupable comme l'on pense, & son ignorance luy peut seruir d'une excuse peremptoire. Qu'il dise la verité, a-t'il iamais veu seulement les indices de saint Thomas ? ne s'en est-il pas rapporté à quelque pauvre galliche de Sorbonne, qui luy aourny ces deux ou trois lignes, en les accommodant au sens, dont il pensoit que Morin eust affaire ? on deuroit l'aduerter de choisir vn autrefois vn plus fidele, ou vn plus adroit chercheur de passages, mais comme il est opiniastre, il n'en fera rien ; & soustiendra encore que sa citation est bonne ; & que s'il n'a rapporté les paroles de l'Auther, du moins n'en a-t'il point corrompu l'explication. Je ne luy demande rien en cecy, sinon qu'il en croye les experts, & qu'il en consulte son bon amy Monsieur du Chefne : sans doute qu'il luy resoudroit sincerement la question, & il me semble que j'entends desia ce bon personnage luy dire avec la charité d'un vray Ecclesiastique.

“ Monsieur Morin mon amy, vous auez tort de pretendre que saint Thomas soit iamais tombé en cette foiblesse de croire à l'Astrologie. Il auoit trop de pieté pour deffendre vne imposture, qu'il scauoit bien auoir esté tousiours en execration dans l'Eglise. On vous a trompé en vous donnant d'autres paroles que les siennes, & encore plus en vous les interpretant tout au contraire de son intention, qui est en cet endroit, de refuter l'objection qu'il s'estoit formée sur l'erreur des Astrologues, qui enseignent que le mouuement des Corps celestes influë beaucoup sur la volonté des hommes. Saint Thomas ne dit pas simplement comme vous, le mouuement des Cieux, parce que c'est vn mouuement chimerique ; il dit le mouuement des Corps celestes, pour ce que celuy-cy est effectif ; & que l'approchement ou l'esloignement du Soleil, qui est l'un de ces corps, faisant le chaud ou le froid, cela peut bien

mouuoir la volonté de quelqu'un, entant qu'il dit au mesme article, *adueniente frigore incipit aliquis velle facere ignem*. Comme aussi pour ce qui est du temperament eu de la complexion, tout ainsi que le lieu de la naissance y fait beaucoup, vn Æthiopien estant ordinairement tout d'une autre humeur qu'un Scythe ou vn Suedois. Le temps & la saison y peuuent pareillement contri- buer quelque chose, & partât le mouuement des Corps celestes, qui font les saisons, sont bien capables d'imprimer quelques differentes qualitez dans les humeurs corporelles, où logent les esprits qui forment nos passions; ce que pourtant ce bon Saint n'ose presque asseurer, mais il le concède seulement par le terme de *nihil prohibet ex impressione cælest. corp.* aduoüant de plus, que l'on peut bien asseoir sur cette disposition celeste, quelques coniectures non tousiours fausses; & quoy qu'il puisse entendre que c'est le fait des Astrologues, neant- mois ce mot d'Astrologie que vous luy faites dire, luy est tellement suspect ou odieux, qu'il ne s'en est pas osé feruir dans la resolution, si ce n'est en faisant parler S. Augustin, qui croyoit, côme il témoigne, que quand les Astrologues disoient vray, c'estoit par vn tressecret instinct incomprehensible, à eux-mesmes, côme ces femmes qui pleines de l'Esprit malin & trompeur, rédoient les oracles, sans sçauoir ce qu'elles disoient; *Fatēdum est*, dit ce grand Docteur de l'Eglise, *quando ab Astrologis vera dicuntur, instinctu quodam occultissimo dici: quem nescientes humane mentes patiuntur; quod cum ad decipiendum homines fit, spirituum immundorum & seductorum operatio est*. C'est bien loin d'estre persuadé que les Astrologues soient gens de bien, ny que l'on puisse rien deuiner de bon par le moyen des Astres; & puis que les influences de ces Corps celestes n'ont aucun pouuoir sur l'esprit des Sages, par lesquels au contraire ils sont maistrisez,

ne vaudroit-il pas mieux estudier la sagesse qui apprend
 à se seruir du bien & à éuiter le mal, que l'Astrologie
 qui ne voit goutte en tous les deux. Vous n'avez qu'à
 prendre pour vous le conseil que vous donnez aux au-
 tres, & bien remarquer ces belles paroles, *Sapiens domi-*
nabitur astis. Ne vous imaginez pas pourtant que ce soit
 vne pensée de Saint Thomas, qui ne la propose pas aus-
 si comme sienne, il est bien esloigné du crime de Pla-
 giaire : & quand il emprunte quelque chose, il est touf-
 jours fort soigneux de nommer ceux qui luy prestent;
 cōme il a fait en cét endroit, touchant la consideration
 de lapuissance du Sage cōtre les constellations, qu'il at-
 tribuë à Ptolomée. Vn grād Astrologue cōme vous, qui
 cōmantés & reformés cét Autheur, deuoit auoir remar-
 qué cette sentence dans ses liures, & vous souuenir en-
 core, que ce Prince mesme de l'Astrologie ne fait pas
 cas de l'influence des Astres, puis qu'il les soubmet à la
 foible sagesse humaine. En sorte que le Sage peut touf-
 jours dire avec Epictete, tout cela ne me presage que
 du bien si ie veux, quoy qu'il en arriue, ie puis tourner
 tout à mon profit, *ἐμοὶ ὃ πάντα αἴσια σημαίνειται ἕαν ἔρω*
δέλω, ὅτι γὰρ ἀνὰ τοῦτων ἀποβάνη ἐπ' ἐμοῦ ἔστι ωφελιμότητα
ὑπ' αὐτῶν. Pour conclusion, s'il est vray, Monsieur Morin,
 que les Sages dominant sur les Astres; Vous deuez croire
 que les Astres ne dominant que sur les fous, & particu-
 lierement sur ceux de qui l'ascendant est en Aries. Et
 qui pour auoir Fomahant en la premiere maison, se pro-
 mettent vne eternelle renommée. C'est à peu près la
 leçon que Morin doit attendre d'un bon & pieux Do-
 cteur en Theologie, tel qu'est Monsieur du Chesne, &
 tasccher d'en faire son profit, en se desabusant que Saint
 Thomas ait iamais approuué l'Astrologie; & en quit-
 tant les sotises, où engage cét infame battellerie de di-
 seur de bonne aduventure.

C'est
 l'horosco-
 pe que
 Morin se
 donne.

Or qu'il ait mal entendu S. Thomas, qu'il ait encore aussi mal repris le sieur de la Roche, ce n'est qu'une faute de iugement, ou un excès d'ignorance, que ie veux bien luy pardonner : puisque le manque de prudence ou de sçauoir n'est pas un crime ; Mais aussi ne faut-il pas qu'il soit meschant, & meschant iusques au point d'attenter sur l'honneur & sur la vie des gens de bien; comme il fait en objectant par un escrit public l'Atheïsme à un homme qu'il ne connoist point ; seulement pour ce qu'il a trop loué la vertu. C'est estre Athée au sens de Morin, de dire, qu'un seruiteur de Dieu, qui porte le caractere de Iesus-Christ, qui est l'un de ses Vicaires en terre, imite ses vertus ; C'est estre Athée de dire qu'un Chrestien conforme ses actions & ses mœurs à celles de son bon Maistre, qui l'a ainsi commandé; *Exemplum dedi vobis, &c.* Quoy donc, les Apostres, les Euangelistes, & les premiers Peres de l'Eglise estoient-ils des Athées, lors qu'en faisant le Panegyrique du premier Martyr, ils ont dit qu'il a imité la genereuse charité du Fils de Dieu, qui au milieu de sa passion prioit son Pere de pardonner à ses bourreaux ? Et quand Morin s'en applique les paroles, & se compare à tous les deux, est-il luy-mesme un Athée, ou plustost un double Athée. Iesus-Christ pour enseigner aux hommes l'humilité, a souuent voulu cacher ses miracles, ses vertus, & l'incomparable science de sa sagesse infinie. Quel mal y a-t'il donc de dire, que Monsieur Gassendi, pour imiter un si bon maistre, n'a pas voulu faire esclater les talents de doctrine, & de pieté, dont il est si richement pourueu. Si Morin estoit homme sincere, il rendroit témoignage de sa patience à souffrir les iniures mieux que personne, apres l'auoir tant de fois éprouuée. Et quand à sa modestie, nous qui sçauons la peine que nous auons à tirer de ses mains les belles productions de son

*A la fin de
sa lettre à M.
Gautier.*

esprit; nous publions hautement le merite d'une si rare vertu, & ne craignons pas de dire, qu'il imite en cela Jesus-Christ. Mais Morin qui est d'une humeur toute contraire; & le veritable Antechrist en ce point, nous prend pour des Athées, par ce que nous louions les perfections dont il a les deffauts opposez; car il est tout constant, que l'orgueil de Morin souleve toute la terre contre luy, & que l'humilité de Monsieur Gassendi luy a concilié une bien-veillance universelle. Aussi n'y a-t'il personne qui ait tant soit peu conversé avec luy, qui ne puisse rapporter quelque trait particulier de sa modestie. Monsieur de Maridat, Conseiller au grand Conseil, m'a fait recit d'une récontre qui luy est arrivée avec Monsieur Gassendi, que ie n'oserois pas escrire si ie ne la tenois de la bouche propre de ce digne Personnage plein de vie & d'honneur, en sorte qu'il en peut rendre un tesmoignage irréprochable. Il me disoit donc, qu'ayant fait il y a quelques années, le chemin de Paris, en Dauphiné avec Monsieur Gassendi, sans l'avoir connu tout le long du voyage, que par sa qualité de Preuost de Digne, & pour homme d'esprit & de littérature, & s'estans logez ensemble en mesme hostellerie à leur arrivée à Grenoble, Monsieur de Maridat sortit pour aller visiter ses amis, dont il rencontra quelques-uns par la rue, qui luy dirent, apres les civilités ordinaires, que leur dessein estoit d'aller visiter un grand & renommé Philosophe, appelé Monsieur Gassendi, qui autrefois avoit demeuré dans leur ville avec grande reputation. Vrayement, dit alors Monsieur Maridat, ie serois bien aise d'estre de la partie, i'en ay tant ouy parler, & il y a si long-temps que i'ay enuie de sçavoir quel il est. Aussi-tost suivant les autres, il fut bien surpris de se voir ramener en son logis, & plus encore quand il s'aperceut que cet illustre Gassendus, dont il sçavoit seulement le nom, &

que ses amis embrassoient avec tant d'honneur, estoit le mesme avec lequel il venoit d'acheuer vn si lōg voyage. Pourroit-en faire demy-iournée avec Morin sans estre estourdy de ses dignitez, honneurs, recompenses, capacités, sciences, ouurages, inuentions, desseins & aduantages remportés par luy sur les plus fameux Philosophes & les plus grands Mathematiciens du monde. Et quand apres auoir fait 150. lieuës en mesme carosse, dans la continuelle importunité de ses vanteries, vous vous seriez enfin separé de luy, & que vous seriez esloigné de deux iournées, penseriez-vous en estre entierelement deliuré. N'apprehenderiez vous point encore qu'il inuentât quelque sujet, pour vous rebattre tout de nouueau par vne lettre, ce dont il vous auroit si longtemps rompu la teste: Mais permis à luy de suivre tant qu'il voudra son caprice, qu'il nous laisse au moins la liberté de louer la modestie d'un homme admiré pour cette vertu par tout le monde; & qu'il n'ait plus l'impudence de crier à l'Athée contre moy, pource que j'ay dit, que ce Philosophe Chrestien imite autant qu'il peut celuy qui a tant pris de soin à celer ses miracles.

Je ne m'apperçois pas d'autre costé, que ie donne à Morin vn beau champ de m'accuser, que ie parle en sorcier, en disant *celuy qui*, sans exprimer le nom. Certainement ie ne voudrois pas disputer contre luy en critique de Sabbath; mais puis qu'il veut regenter par tout, il ne doit point trouuer mauuais si ie luy propose cette question. Les Sorciers vsent-ils du langage des Saints, ou les Saints qui en parlant de Iesus-Christ, se contentent de dire *celuy qui*, sans le nommer autrement; se seruent-ils de termes de Sorciers? Si cela estoit, ie n'oserois plus lire l'Apocalypse. Et ie m'estonne que Morin qui a tant trauaillé à la commenter, n'a point songé à reformer ce stile de Sorcier, qui est si familier à

S. Iean, qu'il ne parle point autrement de Dieu, ou de Iesus-Christ, qu'en l'appellant, *Celuy qui est, celuy qui tient les sept Estoiles, celuy qui a les sept Esprits, celuy qui estoit assis sur le Throsne*. Il n'y a pas d'apparence neantmoins que ce saint Euangeliste, qui a tant esté aymé de Iesus-Christ, ait parlé de luy en Sorcier; autrement il faudroit dire, que mesmes la Reyne des Anges y auroit parlé, quand elle a dit, *Celuy qui est puissant m'a fait merueilles*, sans le nômer autrement. Nous serions enfin contraincts d'en venir iusques à cōfesser que celuy qui est appelé l'Ange du grand Conseil, & qui est le Fils de Dieu, parloit aussi en Sorcier en parlant de son Pere, puisque sans le nommer il disoit simplement, *Celuy qui m'a enuoyé, est avec moy, celuy qui m'a enuoyé, est veritable, mon manger est de faire la volôité de celuy qui m'a enuoyé*. Cette phrase estât si familiere au S. Esprit, n'est-ce pas vn sacrilege de dire que ce soit vn langage de Sorcier? Et veritablement ie pense qu'il n'y a qu'un Morin au monde capable de ce blaspheme; que si i'estois aussi iniurieux que luy, sans mesme tirer les choses d'aussi loin qu'il fait, ie pourrois bien luy reprocher que sa veuë esgarée, sa grande intelligence aux termes de Grimoire, & son affectation de crier contre les supposts du Sabbath, sont des marques tres-euidentes qu'il a eu quelque participation en leurs mysteres, & qu'il a pris plus de degrez en cette Faculté, qu'en celle de Medecine; veu principalement qu'il fait vne si haute & si ouuerte profession d'Astrologue, & que la deuinaillerie & forcellerie sont sœurs. L'Empereur confond toute cette canaille sous vn mesme tiltre de *Maleficis & Mathematicis* au Code; Mais c'est, à mon aduis, assez d'opprobres à Morin, de luy laisser la qualité dont il fait plus de vanité, & le traiter simplement d'Astrologue; Je dis pauvre Astrologue loqueteux & descricé, principalement depuis le mal-heur qui

qui luy est arriué, pour auoir voulu trop bien faire, en pouffant plus que de raison vn de ses plus illustres escoliers; sans considerer que c'estoit bien assez d'insinuer passablement la folie dās leurs esprits, sans les faire monter iusques à la rage. Peu de gens ignorent maintenant ce qui est arriué à vn homme de cōdition, & des plus releuez dans la Robbe: auquel Morin ayant entrepris de montrer le fin de son art par esperance d'en estre plus amplement salarié; l'esprit du disciple trop ardent s'est tellement euaporé, que de sage il est deuenu fou, & de fou furieux, par les preceptes & la frequentation trop assiduë avec son Maistre; & dans le temps que i'escris ses parens le tiennent enfermé. Ce scandale a fort deshonoreré l'Escole de Morin, & l'a renduë fort deserte. Ce que prenoyant, & pour couvrir la honte d'estre ainsi abandonné, il fait courir le bruit & se vante faussement, d'auoir refusé ses conferences à ceux qui n'ont iamais songé à luy, que pour en éuiter la rencontre. Et ie ne sçay pas quel ressentiment aura Monsieur de Montconis du reproche que luy fait Morin d'auoir brigué l'entrée de son Escole, sans y estre admis; il a trop d'esprit & d'experience, pour se vouloir amuser à ce qu'il sçait bien n'estre que folie, & encore sous vn tel Maistre. Et puis, qui ne sçait que Morin s'est tant de fois trompé dans ses pronostics, & qu'il est si mal-heureux à rencontrer, que les plus credules en sont rebutés? Peu luy sert de partager son gain avec trois ou quatre hableurs qui profnent es Propheties, & les appliquent aux choses arriuées; comme si cēt Astrologue les auoit predites. I'espere que pour sa derniere ignominie Dieu nous fera la grace de confondre la grande enuie que cēt irreconciliable ennemy de Monsieur Gassendi porte à sa gloire, & qu'il prolongera cette vie digne de l'immortalité, en luy faisant voir vn grand nombre d'Estés apres celuy de

l'année prochaine, dans lequel Morin emporté de jalousie & de haine, veut qu'elle finisse suivant les regles de sa Science. Bon Dieu quelle joye luy seroit-ce, si cette affliction nous arriuoit, & si les continuelles maladies de ce laborieux homme, déjà cassé de ses longues veilles, & d'une trop opiniastre assiduité à l'estude, operoit au mois de Juillet ou d'Aoust 1650. ce que nous apprehendons de iour à autre. Je ne sçay d'où nostre Prophete receuroit plus de satisfaction, ou de voir qu'une de ses prediCTIONS auroit enfin reüssi, ou de ce qu'il seroit deliuré de celuy, dont il ne peut supporter l'estime; & qui l'a banny de l'Auditoire public, & de la Chaire Royale, où Morin n'a osé se hazarder de monter, depuis qu'il y a veu paroistre Monsieur Gassen. di avec une si grande affluence d'Auditeurs: Des-lors il s'est confiné dans la rue des Morfondus, pour attendre les bonnes femmes qui viennent au Deuin; & les Escoliers qu'il pretend encore attirer par les affiches qu'il propose de mettre avec celles des Operateurs aux coins des ruës. C'est le trafic sur lequel Morin assigne le fond necessaire pour l'impression de ces deux volumes in folio de son Astrologie Gallique, aussi-bien que celui destiné pour le dot de ses pauvres parentes: & comme ie doute fort que ce gain approche à beaucoup près l'immensité des esperances qu'il en conçoit, aussi j'ay grande peur qu'il ne puisse jamais rien faire de ces filles languissantes dans l'ennuy de leur virginité, autre chose que des Sibilles, en leur inspirant quelque peu de sa faculté deuineresse, pour consolation de leur perpetuelle continence. Ce qui me donne, à n'en point mentir, beaucoup de compassion pour elles, me souvenant d'auoir remarqué dans Plutarque, le reproche d'un pucelage suranné estre si odieux, qu'Electra mesme, toute sage qu'elle nous est representée par Euripi-

de, perdit patience, & respondit avec iniures à sa propre cousine, s'entendant nommer *vielle fille*, quoy qu'innocemment par elle. Mais le desir que j'ay de voir cette fameuse & si long-temps promise Astrologie Gallique, me donne bien plus d'inquietude; estant certain de la conuaincre d'ignorance & d'impertinence, depuis la premiere periode iusques à la derniere. Certainement si l'Auteur de cét admirable ouurage scauoit avec quelle preparation ie l'attens, ie ne doute point qu'il ne me comparât au Dragon de l'Apocalypse, qui est continuellement en embusche & la gueule beante pour deuorer ce pauvre celeste. Ne s'aduiferoit-il point de faire qu'ester pour cette edition, comme il a fait pour la pluspart des autres que nous auons de luy? I'y contribuerois certainement mon aumosne avec plus de gayeté, que ie ne donnay mes deux quarts d'escu pour aller voir la farce de Iodelet Astrologue.

Mais contre tout ce que l'on peut dire au mespris de cette vaine & fallacieuse Science, Morin qui la deffend comme l'vnique soustien de sa vie & de sa reputation, se tient assez fort ayant à son aduis le Pere Gonderen de son costé. Que s'ils s'en veut rapporter à ce pieux & scauant homme, j'espere, ou plustost ie l'asseure, luy monstrier sa condannation dans le beau Panegyrique de l'Astrologie fait par ce Pere. Ce merueilleux Cardinal de Richelieu pour delasser son esprit, prenoit plaisir quelquefois à exercer celuy des autres; & principalement de ceux qui se mesloient d'escrire, en leur donnant pour tasche des sujets paradoxes, comme seroit la defense des choses communément condamnées à l'imitation de ces discours faits à plaisir, les Eloges d'un Nerón, la louange de la Folie ou de l'Asnerie. Le Pere Gonderen, qui passoit pour grand Orateur, receut commandement de faire quelque chose en faueur de l'A.

strologie, ce que Morin prend tout de bon; & neantmoins il y trouuera la reprobation de son iugement parfaitement bien concluë. Ce Pere en la page 223. de ce discours dit, que *le droit Canon & les SS. Peres en plusieurs lieux blasment l'Astrologie diuinatrice, payenne & heretique, &c. quand elle iuge des choses contingentes.* Et p. 299. *Les predictions des choses contingentes par les Astres, ont esté aussi prohibées par la Bulle de Sixte V. contre les Astrologues, &c. Il paroist par là, que l'Eglise ne condamne pas ceux qui dressent des natiuitez, &c. qu'au cas qu'ils voulussent iuger des choses contingentes, ce que la vraye Astrologie ne pretend iamais.*

L'Astrologue Morin, pour establir de plus en plus la certitude de ses predictions, iuge par les Astres, & deuine, mais avec les precautions ordinaires aux faiseurs d'Almanachs, que Monsieur Gassendi mourra l'année 1650. Cela peut estre, & peut bien aussi n'estre pas. Il peut estre empoisonné, tué, noyé, escrasé, & peut pareillement ne le pas estre. Et cela selon l'Escole est la ver table definition des choses contingentes. L'Astrologue Morin en fait iugement. Donc selon le Pere Conderen l'Astrologue Morin est condamné par le droit Canon par les Peres de l'Eglise, & par la Bulle de Sixte V. comme vn Deuin, vn Payen, & vn Heretique: *Etiam si certò se non affirmare asserat*, comme dit la Bulle.

Mais j'espere avec l'ayde du bon Dieu, qu'il ne sera pas plus heureux en predisant la mort de Monsieur Gassendi, qu'il a esté iusques à present en décrivant ses ouvrages; pour iuger de la valeur desquels il faut estre bien plus versé dans les Langues, l'Histoire, & la Philosophie, que pour dresser des horoscopes. Aussi Morin aduoüe sa propre foiblesse de ce costé là, & ne nous menace pas de sa plume pour censurer le dernier trauail de Monsieur Gassendi; mais bien de quelque Aristarque,

qu'il se prepare à tirer de l'Academie des fameliques Hibernois du Mont saint Geneuiefue. l'ay pourtant bien de la peine à croire qu'il soit deuenu sage iusques au point de s'abstenir decrire contre ce qu'il n'entend point. Certes, si ie pensois qu'il fut en si beau chemin, ie luy tiendrois la main, & pour acheuer de le persuader de la laideur du mestier qu'il fait, en s'esleuant avec enuie, & sans iugement, contre tous ceux qui donnent quelque chose au public: ie luy representerois vn beau passage d'Hipocrate sur ce sujet; En voicy les termes en François, afin de luy épargner la peine de chercher vn traducteur. Affecter de diffamer les inuentions d'autrui par l'artifice d'un discours indecent, & au lieu de produire quelque chose du sien, ne faire que descrire faussement les ouurages des sçauants deuant ceux qui n'entendent rien, ce n'est pas à mon auis la pensée d'un homme de sens, mais plustost vne preuue conuaincante d'un naturel depraué, aussi bien que d'une extrême insuffisance; car cette façon de faire ne conuient absolument qu'à des gens qui estans destituez de toute sorte d'industrie, s'abandonnent passionnément à l'ambition de ruiner, si leur force pouuoit seconder leur malice, la reputation des ouurages d'autrui quand ils sont comme il faut, ou d'en faire raillerie quand ils ne le sont pas; Nous trouuons encore dans les Anciens, mille autres belles descriptions d'un ignorant Zoile, qui ne sont pas moins élégantes, & ne conuiennent pas moins bien à Morin. Mais pour ce qu'il s'attribuë avec tant d'imprudence & d'iniustice la qualité de Docteur en Medecine, ie n'ay voulu produire contre luy que l'Autheur reconnu par tous les siecles passez, pour le grand Mai-

*Hipocras.
de arte ini-
tio pag. 3.
τὸ δ' λόγον
οὐ καλῶν
τέχνη τὰ τοῖς
ἄλλοις ἐν-
σημῶναι αἰ-
σχύνειν περὶ
δομῆς αὐ-
τῶν, δια-
βάλλοντα δ'
τὰ τῶν εἰδό-
των περὶ
τοῖς μὴ εἰ-
δότας ὅσον
εἴματα, ὡς
εἴ τι δοκεῖ
ἐνέστος ἐπι-
δύμημαί τε
καὶ ἔργον εἶ-
ναι, ἀλλὰ
αὐτῇ ἀμο-*

*καταχρησθῆναι μᾶλλον φύσος, ἢ ἀτεχνῇ· μωροῖσιν γὰρ τοῖσιν ἀτέχνοισιν ἢ ἐργαπῇ
ζει, φιλοτιμιμυθῶν μὲν, οὐδαμᾶ δ' δυναμῶν κακίης ὑποσχεῖται, εἰς τὸ τὰ τῶν πέ-
λας ἔργα ἢ ὄρδα ὄντα διαβάλλειν, ἢ ἐκ ὄρδα μαμμάειν.*

stre en cette science; afin de le dedoctorer, s'il est permis de dire, ainsi par les sentences & irrefragables decrets d'Hipocrate mesme.

C'est à cela que ie m'arresteroy seulement pour cette heure, ie viendray apres à son doctorat en Mathematiques, qui est vn sujet où ie ne veut pas entrer maintenant, Morin croit ou veut faire croire que son griffonage est la plus excellente chose du monde & que si Monsieur Gassendi n'y trouue rien à redire, c'est pour ce qu'il ny entend rien: Pour moy ie ne suis à son compte qu'un petit escolier, qui n'oserois leuer les yeux deuant sa face, mais quel que ie sois il se peut bien aiseurer si le cœur luy en dit, & quand il ne luy en diroit pas mesme que dans la disposition où ie suis, ie luy feray bien voir du pays en beau & grand volume, pendant qu'il s'amusera à me dire des iniures sur ses feuilles volantes, que i'expedieray tousiours en deux matinées; & il faut qu'il sçache que si ie n'ay pas trouué de difficulté à faire voir à toute la France sa mauuaise humeur, sa malignité, son enuie, son ambition, son extrauagance & son ignorance, il me sera plus facile encore d'exposer à toute l'Europe son asnerie parfaite aux Mathematiques. Pour cela, ie n'ay besoin ny d'ancre ny de papier, ny d'autres liures que les siens, & quoy qu'il ne me tienne pas pour vn grand Docteur, j'ay pourtant assez de connoissance des Mathematiques, & assez de presence d'esprit, pour faire voir en me voyant, que dans toutes ses œuvres depuis la premiere leçon d'addition qu'il a donnée estant maistre d'escriture, iusques à la dernière page qu'il a fait imprimer depuis qu'il est Professeur Royal; ce peu qu'il y a de luy ne vaut absolument rien, & que tout ce qu'il a dérobé des autres, est entierement peruertuy par son peu d'intelligence & de iugement, en sorte que ce qui est or dans leurs liures, n'est qu'ordure

dans les siens; c'est ce que ie luy promets gratis & de bon cœur, & sans attēdre qu'il m'y oblige plus qu'il n'a fait. Mais s'il n'est sage, il y a des plumes biē plus ferrées que la mienne, & des personnes d'une bien plus grande suffisance, & plus sedentaires que ie ne suis, de qui Morin porte desia des marques tres-sanglantes, qui travailleront au mesme dessein avec plus d'apparat, & une ignominie plus durable pour luy, & qui le pourront bien pousser dans un desespoir pareil à celui de Lycambe. Voilà Monsieur ce que ie luy promets en foy d'homme d'honneur: P'osemesme vous supplier de vouloir estre ma caution; ie vous donne parole que ie n'y manqueray pas, & que ie n'auray iamais plus grande ioye que de faire repentir ce fanfaron, d'avoir si bestialement choqué vostre cher & incomparable amy Monsieur Gassendi, & si indignement traité;

MONSIEVR,

A Lyon ce 25. Septembre 1649.

Vostre tres-humble & tres-obéissant
seruiteur,

DE NEVRE.



LETTE DE MONSIEVR

Gassend à Monsieur Morin.



ONSIEVR,

Vos Lettres de la fin de May, & d'environ la my-Juillet, ne m'ont esté rendues que fort tard, à cause des troubles de Prouence, qui font que depuis longtemps ie ne reçois rien par la voye d'Aix, ny mesme par le droit chemin de Lyon, si ce n'est par quelque occasion extraordinaire; d'autant que l'entrée & la sortie de la Prouince, n'est pas entierement libre de ce costé-là. Quand ie les aurois mesme receuës plustost, ie n'aurois guere peu vous y répondre plus promptement, ayant esté attaqué d'une nouuelle maladie, qui m'a tenu dans le liét depuis le commencement de Iuin, iusques bien auant dans le mois de Iuillet & dont i'ay mesme encore quelques restes. Neantmoins m'estant trouué par la grace de Dieu depuis cinq ou six iours en estat de pouoir supporter quelques moments, soit de lecture, soit d'escriture, & venant d'apprendre qu'il y aura moyen de faire tenir mes lettres à Lyon. pour y estre remises à la poste, ie n'ay pas voulu differer d'auantage de vous donner aduis par celle-cy de la reception des vostres & de la copie de celle que vous auez fait imprimer, adressée

sée à Monsieur de Gaultier, & iointe à la dernière de celles que vous m'avez escrites.

Au reste, si ie n'eusse receu que vos lettres seules, vous ne receuriez icy de moy que de simples remerciemens. Car pour les protestations que vous faites en l'une & en l'autre, de vouloir tenir la parole que vous m'avez donnée, de ne point répondre à mon Apologie, comme si ma lettre n'auoit eu autre but que de vous empescher de le faire, ie n'aurois eu garde de m'en formaliser, attendu que la chose seroit demeurée entre nous, & que j'aurois eu mauuaise grace de vous soupçonner de n'estre pas sincere. Mais pour ce que non content de publier ma lettre, vous avez si fort affecté de mettre deuant & apres, les mesmes protestations, afin de persuader à tout le monde que la seule consideration de la parole, que vous m'avez donnée, vous a retenu de faire vne chose, que i'aye sujet d'apprehender; Pour cela dis-je, & pour ce que d'ailleurs parmy les bonnes paroles que vous avez semées de moy dans vostre escrit, dont ie vous suis obligé; vous en avez inseré tant d'autres, que ie ne sçauois souffrir avec honneur, vous voulez bien qu'avec ma franchise accoustumée, ie vous fasse icy quelques plaintes.

Et premierement à l'esgard de vostre parole, il est vray, que Monsieur le Baron de Tourues, ce Seigneur si accompli, n'ayant guere accoustumé d'aller faire ses deuotions à Nostre-Dame, sans me faire l'honneur de me visiter dans le Cloistre, me dit vn iour, qu'ayant veu affiché vn liure de vous contre moy, il vous estoit allé voir, & vous ayant reconnu homme de merite, vous auoit proposé le dessein qu'il auoit de nous reconcilier; que vous luy auiez fort genereusement donné les mains; & qu'il vous auoit dit que de l'humeur dõt il me connoissoit, il osoit se promettre que de mon costé ie

ferois la même chose. Je luy representay auant toutes choses le tort que vous auiez eu, de rompre sans sujet le nœud de nostre ancienne amitié, en escriuant & publiant de gayereté de cœur vn liure contre moy, dans lequel vous faisiez tous vos efforts, pour me rendre suspect à l'Eglise; l'adioustay en suite, que quoy que ie fusse l'offensé, ie ne voulois point tesmoigner moins de facilité que vous à la reconciliation, dont il luy plaisoit de s'entre-mettre; mais que i'y preuoyois vn obstacle, qui estoit qu'ayant esté obligé par honneur de répondre à vostre liure, vne copie de ma réponse auoit esté enuoyée en Hollande. & craignant qu'elle ne fust sous la presse, ou mesme peut-estre desia imprimée, il seroit fâcheux qu'apres nous estre reconciliez, il parust au iour vne pièce, qu'il fust capable de me faire accuser, ou du moins soupçonner d'inconstance. Il se retira apres m'auoir dit, qu'il vous proposeroit cette difficulté; & m'estant reuenir voir, me rapporta que vous vouliez passer par dessus cela, adioustant qu'au premier iour il vous ameneroit chez moy. A peu de iours de là, il y reuint, & vous eustes la bonté de l'accompagner. La premiere chose que ie fis, en allant au deuant de vous, fut de vous protester combien j'auois de disposition à renouer nostre ancienne amitié. l'adioustay seulement la même difficulté que i'auois proposée à Monsieur le Baron de Tourues, & que voyant que vous la vouliez franchir, ie ferois tout ce que ie pourrois pour retirer ma réponse; mais qu'en cas que ie ne le peusse pas faire, & qu'elle se trouuast publiée dans quelque temps, vous ne pourriez me reprocher d'auoir donné atteinte à l'accommodement qui se faisoit alors. Ce fut sur ces paroles que vous me dites, que non seulement vous ne me le reprocheriez pas, mais encore que vous ne me feriez point de repartie. Voila donc la pa-

role que vous reïterez si souuent de m'auoir donnée, avec l'occasion qui vous a porté à me la donner; sans que vous puissiez vous vanter, ny que ie vous disse alors autre chose, sinon que pour cela vous en vseriez comme il vous plairoit, ny que iamais depuis ie vous aye tesmoigné, que ie deusse estre fasché, quand vous ne la tiendriez point, & que l'enuie vous prendroit de respondre.

Or estant arriué, que l'original de ma responce (qui n'estoit en effect qu'une longue lettre, escrite sur le sujet de vostre liure à nostre cher & venerable amy Monsieur le Prieur de la Valette) a esté communiqué en telle façon, que la piece s'est trouuée imprimée à Lyon à mon insceu, & contre mon consentement, ie vous ay escrit la lettre dont est question, dans le seul dessein de vous en tesmoigner mon desplaisir, à cause de l'apparente, & toutesfois nullement veritable occasion, que vous pourriez auoir de croire que i'eusse eu quelque part en cette impression. Vous avez trouué bon de faire imprimer cette lettre, & ie n'en suis point fasché, puis que vous avez creu que cela estoit necessaire pour vostre satisfaction; quoy que si i'eusse pensé, que vous en deussiez faire vne piece publique, ie l'aurois peut-estre conceuë autrement. Ce qui me touche, c'est qu'en faisant d'un costé semblant de me croire, vous introduisez neantmoins comme sur le theatre, vn de vos amis qui publie, *que le procedé de mes amis est vn jeu fait à plaisir, pour me descharger d'intelligence, & que cela est euidentement confirmé par l'aduis de l'Imprimeur au Lecteur, on les protestations de l'Imprimeur, que le tout a esté fait à mon insceu, & par la violence de mes amis, sont trop affectées, pour bien courrir cette mesche, qui audit encore besoin, pour suiuez-vous, de ma lettre, pour me mettre hors de soupçon; & que vous ayant ja autresfois mal-traitté à plats*

couverts, ie vous traittois encor à present de mesme, avec plus de precaution, pour ce que la virulence de mon Apologie est fort grande. Telles sont vos paroles, pour infinuer que le but de ma lettre n'a esté qu'une precaution pour vous empescher de respondre à mon Apologie, dont vous triomphez en disant, que si bien l'accomplissement de ma promesse a esté empesché par la perfidie & trahison de mes deux plus affidés amis, vous ne lairrez toutes fois pas d'accomplir la vostre, & que vous me donnez derechef vostre parole de ne respondre point à mon Apologie, bien que vous ayez dequoy y respondre. Que tels amis m'ont exposé à des nouvelles fatigues & picoteries, si l'humeur vous prenoit de me respondre, n'estant pas nouice à vous defendre, ny vostre espée ne tenant point au fourreau comme l'on sçait, dites-vous, bien. Que neantmoins vous ayant inré par ma lettre à foy d'homme d'honneur, que la chose auoit esté faite & publiée à mon inscen, vous devez & voulez me croire, & en suite ne faire aucune responce à mon Apologie, comme par deux fois vous m'en avez donné vostre parole, laquelle insqu'icy vous n'avez encore fausée à homme du monde, estant mesme marry qu'elle me fera peu d'honneur.

C'est donc premierement à l'esgard de cette parole, dont ie vous veux faire mes plaintes; pource que vous en faites parade avec tant d'affectation, qu'il n'est point d'homme de bon sens, qui ne la iuge insupportable. Ny ie ne l'ay point exigée de vous; ny ie ne vous ay iamais tesmoigné, que ie deusse estre scandalisé, quand il vous prendroit enuie de la rompre. Pourquoy donc en faire vn si grand bruit, & pourquoy parler si haut, pour faire entendre que vous voulez vous taire, comme si d'effroy ie me deuois tapir contre terre, pour la crainte de vostre insulte, ou si ie deuois me publier extrêmement obligé à vostre silence? Bien loin de cela, ie vous declare icy, que ie vous rends de tres-bon cœur toute

cette prétenduë parole; & n'ay que faire que vous me la redonniez de nouveau, comme vous affectez de le faire? Le vous donne vne pleine & entiere liberté de desguainer cette espée, dont vous prétendez me faire peur, & vous promets de ne vous reprocher iamais, qu'au preiudice de vostre parole, vous l'avez tirée contre moy. Le vous coniure mesme de me respondre, puis que vous dites *qu'il vous est aisé de le faire avec aduantage*, & de n'apprehender point que i'aye du desplaisir de me voir *exposé*, comme vous le dites, à de nouvelles *fatigues & picoteries*; pource que bien que ie sois homme à ne vous repartir vray-semblablement aucune chose, comme ne preuoyant point, que vous me puissiez rien opposer de raisonnable; Le ne m'engage point pourtant à ne le pas faire, puis que par la grace de Dieu, ce que vous appelez *fatigues & picoteries*, n'est à mon esgard qu'un simple diuertissement, & vne occupation plaisante. Ce qui m'engage à vous faire ce deffy, est ce que vous dites, que *vous estes marry de quoy vostre parole gardée me fera peu d'honneur*. Car en disant cela, ne prétendez-vous pas faire croire au monde, qu'à moins que vous me teniez vostre parole, ie seray ruiné de reputation; & que mesme en la tenant ie ne lairray pas de l'estre; pource que vous donnez assez à entendre, que vous me faites grande grace de ne publier point mon des-honneur? Faites-donc hardiment tous vos efforts ensuite de la dispense que ie vous donne de cette parole, dont vous m'avez fait le maistre? Et ne croyez pas qu'encore que ie m'estime fort peu de chose dans le monde, i'aye neantmoins si mauuaise opinion de moy-mesme que i'estime que mon honneur depende de quoy que ce soit, que vous puissiez dire, ou taire de moy. Si vous deuez estre marry de quelque chose, soyez-le de ce que vous avez fait, & non pas de ce que

vous protestez de ne vouloir pas faire, & ne faites point de reflexiõ sur le peu d'hõneur que vous me ferez, mais sur le des-honneur que vous vous ferez à vous-mesme.

Je vois bien que vous me menacez par l'aduis de ce feint Amy, de *traiter mon Apologie, comme vous avez traité celle du Pere du Liris Recollet, lequel, adjoustez-vous, ne s'en est pas vanté du depuis.* Mais ne vous imaginez point que toutes ces charretées d'iniures que vous avez versées contre ce pauvre Religieux, me donnent de l'apprehension. Quand vous euoqueriez mesme toutes les Furies, pour vous inspirer toute leur malice, & vous suggerer toutes les inuestiues, dont la rage & le venin d'un homme peut estre capable, soyez assurez que par la grace de Dieu, ie me sens assez de constance pour n'en estre point esmeu, & pour me croire comme vn rocher, que tous les efforts de vostre colere, non plus que ceux d'un Pygmée, ne scauroient esbranler. A vous permis de vous seruir de ce stile de harangere tant qu'il vous plaira; pour moy i'ose vous dire, que i'ay formé le mien à vne meilleure eschole. Vous insultez sur ce bon homme, & faites gloire de ce qu'il ne s'est point vanté de vostre traitement? Et n'est-ce pas cela mesme qui ne vous fait guere d'honneur? puis que, ou comme Chrestien il a supporté patiemment toutes vos iniures, ou comme Philosophe il a estimé qu'elles estoient dignes de mespris. Ce n'est pas, encore vn coup, que ie m'engage à ne vous point repartir, non plus qu'à le faire, quand vous me traitterez de mesme que luy; Je veux tousiours estre en liberté de suiure l'un ou l'autre des deux conseils que le mesme Sage donne, de respondre ou de ne pas respondre, suiuant le genie de l'attaquant, attendu les diuers motifs que l'on peut auoir; l'un de ne se rendre point semblable à luy; l'autre de luy monstrier qu'il n'est point si sage qu'il pense l'estre. Vous faites

adjouster à cét Amy, qu'en me traittant comme vous auez fait le Pere de Liris, on ne pourroit point vous blâmer iniquement pour la promesse que vous m'auex faite, puis que ie ne vous ay point tenu la mienne, ou eu le soin que ie denois pour l'observation d'icelle, & que mes amis mesme m'ont aussi trompé, supposant mon innocence. Or c'est pour cela qu'encore vne fois ie vous rends vôtres promesses, & vous mets à pis faire apres vous auoir formellement nié, que ie n'aye point tenu la mienne. Je ne vous ay promis autre chose que de tascher de recouurer s'il estoit possible, la copie de mon Apologie, qui auoit esté enuoyée pour estre imprimée en Hollande; l'ay esté si heureux que de la pouuoir recouurer, & empescher qu'elle y fust imprimée. Me voila donc entierement quitte de ma promesse; Je ne deuois pas presumer, que Monsieur le Prieur de la Vallere qui estoit saisi de l'original, le deust donner à Monsieur de Neuré pour le faire imprimer à Lion. Si la chose a esté faite contre ma pensée, ie ne vous ay pas aussi promis qu'elle ne le feroit point. Ayant esté aduertie que la chose se faisoit, j'ay fait tout ce que j'ay pû pour empescher qu'elle ne s'acheuast, sans auoir pû en venir à bout. Mais l'impression estant demeurée long-temps supprimée, pour ne me point fascher, la patience est enfin eschappée à ceux qui s'y estoient employez. Qu'en puis-je donc mais? ou qu'y a-t'il en cela contre ma promesse? Mes Amis m'ont trompé; Je m'en suis plaint aussi; mais cela ne regarde aucune promesse que vous ayez eue de moy. Je vous ay neantmoins fait ciuilité, & protesté que la chose auoit esté faite à mon insceu, & contre mon consentement; cependant vous faites parler cét Amy pretendu, comme si par ma lettre j'auois voulu empescher vostre response; en vn mot donc respondes librement;

En second lieu, à l'esgard des choses que vous avez inferées, & dont j'ay occasion de me plaindre, ie laisse à part qu'en protestant de ne vouloir point respondre à mon Apologie, vous avez tissé cet imprimé d'une façon, que vous avez creu qu'il luy peut servir de suffisante réponse. Vous y avez en effect touché en substance, tout ce que vous me pourriez opposer par un plus long escrit, & l'artifice n'en a pas esté petit, pour deux fins; l'une que n'ayant guere autre chose à dire que ce que vous avez dit, vous avez imaginé pouvoir donner cette sous-entente à vostre pretenduë obseruation de parole, que vous auiez mille belles & importantes choses à dire contre moy, lesquelles vous diriez si vous n'auiez promis de le faire; l'autre qu'en me traittant de la sorte, vous avez pensé que ie n'aurois pas l'esprit de reconnoistre vostre dessein; que ie me sentirois obligé à vous, de ne me voir point engagé à une nouvelle fatigue, & que j'aurois de là sujet de vous en dire grand-mercy. Certes, si vous auiez creu à ma lettre de bonne foy, comme vous avez fait semblant de le vouloir faire, vous n'aurez point à la façon des Tragiques, introduit un personnage à qui vous fassiez dire tout le contraire de vostre creance, & ne m'aurez point reputé si simple, que puisque c'estoit vous-mesme qui estalliez en public les paroles, ie deusse faire distinction de celles que vous proferiez comme de vous-mesme, d'auec celles que vous luy attribuez. Ce n'est pas que la chose m'importe, ou que ie vüille me formaliser de quelque sorte de Rhetorique, dont vous ayez voulu vser; mais c'est seulement pour vous faire comprendre que ie me connois un peu en toutes ces choses. Je laisse donc cela à part pour toucher seulement trois points de vostre imprimé, où à mon esgard ie trouue à redire.

LE PREMIER, regarde ce que vous dites d'abord du
premier

premier motif de nostre querelle, qui est *qu'en l'année 1642. Je fis imprimer à Paris deux Epistres, De motu impresso à motore translato.* Et cela est vray, car bien que ce fussent Messieurs du Puy, à qui depuis deux ans ie les auois adressées, qui de l'aduis de quelques autres de mes amis, trouuerent bon de les faire imprimer, il est neantmoins vray qu'ils ne firent rien que de mon consentement. Vous poursuidez, *que le but de ces lettres ne paroist autre à ceux qui s'y connoissent qu'à fortifier l'opinion du mouuement de la Terre.* Voila d'abord le déguisement que vous donnez à mon intention, qui n'ayant effectiuement esté autre, comme la lecture mesme en fait foy, que de rendre raison, ou expliquer la cause de toutes ces experiences rapportées dès le commencement, vous l'interpretez neantmoins si sinistrement, que vous voulez que ie n'aye pointeu d'autre dessein, que de fortifier le mouuement de la Terre. Et pourquoy cela? Quelle nécessité auiez-vous d'aller remüier encore cette chorde, pour me rejetter dans le soupçon d'heresie, duquel vous auiez desia vne fois fait tous vos efforts de me noircir, & pour lequel i'auois esté obligé de faire mon Apologie? Mais *vous auiez dittes-vous, escrit par trois fois contre ce mouuement?* Doncques il falloit que pour attacher cette queue, vous donnassiez cette glose là à mon intention? Et puis, quand vous eussiez escrit cent fois contre ce mouuement, deuiiez-vous pretendre d'auoir fermé la bouche à tout le mode, & particulieremēt à moy vostre amy? Le sujet que ie traitois m'obligeoit à parler encore de ce mouuement, & ie ne pouuois taire la foiblesse de cette raison, qui auoit esté si triuiale, & que les experiences que i'expliquois conuainquoient de fausseté, sans passer pour vn idiot. Vous voudriez que i'eusse sacrifié ma reputation à la gloire de vos escrits, & n'eusse point eu le courage de retoucher à ce sujet, apres les

choses que vous en auiez dittes ? Voicy en suite vos paroles, & voyant que Monsieur Gassenden ses Epistres, ne m'auoit traitté en amy fort ancien, qui le visitois souuent, ie fis imprimer l'an 1643 contre cette opinion un quatriesme travail, intitulé *Alæ telluris fractæ*, duquel Monsieur Gassend se picqua par excez, & à tel point qu'il paroist par vne sienne Apologie imprimée cette année. Or premierement en quoy, & comment est-ce que ie ne vous auois point traitté en amy ? (paroles que vous repetez encore sur la fin) Auois ie entrepris ce trauail contre vous ? y auois- ie rien dit qui vous peut blesser ? auois- ie seulement pensé à vous ? iusqu'à ce qu'en relisant la derniere de ces deux Epistres, & estant desia sur la fin, ie me souuinis que vous auiez particulièrement escrit en faueur du repos de la Terre, & là où ie n'auois nommé personne autre (comme ayant en effect escrit ces Epistres là sans aucuns liures pour estre hors de chez moy, & à diuerfes reprises, à mesure que Monsieur le Comte d'Alais, qui desiroit que ie me donnasse l'honneur de le suivre par la Prouince, s'arrestoit en quelque part) ie m'aduisay de rendre ce resmoignage à nostre commune amitié, que parmy tous ceux qui avec grande subtilité auoient inuenté des raisons pour establir le repos de la Terre, vous teniez le premier rang, *Et non pauci quidem hactenus non paucas, nosterque imprimis Morinus magna solertia, excogitarunt.* Voila tout ce que j'ay dit de vous en toutes ces Epistres, & cependant vous reïterez icy que ie ne vous ay point traitté en amy ? Certes, si j'ay failly en ces paroles (comme plusieurs m'ont reproché que j'auois fait par ce mot, *imprimis*) dont vous auez tiré auantage plus d'une fois, i'en dis ma coulpe de tres bon cœur.

Mais il falloit bien que vous donnassiez quelque couleur à l'enuie, qui vous prit alors de faire ce quatriesme travail intitulé, *Alæ telluris fractæ*, que vous dit-

tes simplement auoir fait imprimer *contre l'Opinion du
renouuement de la Terre*, en dissimulant que vous le fistes
nommément & spécialement contre moy, afin de don-
ner à entendre au monde, que si *ie m'en picquay par excez*,
comme vous le dites, ie le fis, non pas pource que vous
auiez escrit contre moy, ny pource que vous m'auiez
mal-traitté dans vostre liure, mais pource que vous
auiez escrit contre vne opinion que i'auois à cœur, &
que ie ne scaurois voir choquée sans en estre blessé sen-
siblement. Et me croyez-vous tout à fait priué de sens,
pour ne m'apperceuoir point de cét artifice? Vraye-
ment ie me ferois bien soucié de releuer vostre escrit,
s'il ne s'y fust agy que de vostre opinion, & que vous
ne m'y eussiez point outragé comme vous auiez fait.
Ie suis trop d'humeur à laisser le monde libre dans son
sentiment, & sçachant que chacun abonde en son sens,
ie suis fort esloigné de me plaindre des resueries de
ceux qui supportent paisiblement les miennes. Vous di-
tes donc que ie fus piqué par excez de vostre trauail?
Il est vray que ie fus piqué de me voir traité de la for-
te, & principalement par vn amy, & vn amy que ie
n'auois point desobligé, mais que i'auois creu mesme
obliger, sinon au point d'en attendre quelque remercie-
ment, au moins en sorte de n'en attendre point de mau-
uais gré. Si ce fust par excez, ou non, ie m'en rapporte
à la mesme Apologie, bien me souuiens-ie que pour
tout le reste i'en fus aussi peu touché que l'est la Lune
de se voir abboyée, & que seulement ie ne pûs souffrir
patiemment le blasme dont vous m'auiez voulu char-
ger au fait de la Religion, en n'obmettant rien pour me
rendre suspect à l'Eglise que ie reuere. Or pour cela
voudriez vous, que là où Rufin, Sainct Hierosme, & les
autres Peres me deffendent d'estre patient, & ne veu-
lent point que ie passe pour Chrestien, si quand on me

voudra imputer quelque soupçon d'heresie, ie ne m'en remiét tout à bon : Voudriez vous, dis-ie, que ie me teusse, & ne me picquasse point de voir vn escrit public par lequel vous ayez hautement déclaré, *que vous n'eussiez iamais creu qu'un homme d'Eglise comme moy, dust auoir le courage de fournir de nouvelles armes contre vne opinion condamnée par l'Eglise ; que vous vouliez escrire contre moy, de peur qu'en abusant de la reputation, que ie pouuois auoir parmy les sçauans, ie continuasse de séduire les esprits trop credules, & qui sont incapables d'examiner la verité. Que si bien pour n'estre pas moins fin que Galilée, & afin de me premunir i'auois protesté d'auoir en veneration le decret des Cardinaux, rendu en faueur du repos de la Terre, neantmoins on pouuoit m'appliquer, c'est à dire par moquerie, ces paroles de Iesus-Christ, ô femme que ta foy est grande ; il n'y auoit guere aucun, qui voyant mon liure ne iugeast que ie suis plustost Copernicain, qu'autrement ; qu'auectoute ma profession de foy, vous me conseillez en amy, que ie me garde bien d'aller iamais à Rome, de crainte d'y estre traité plus mal mesme que Galilée, pour apres la sentence rendue contre luy, auoir attenté d'armer de nouveau les esprits vertigineux contre l'autorité de l'Eglise. N'est-ce pas vne chose plaisante, qu'apres vous estre donné carriere de la sorte au preiudice de ce que j'ay, & que ie tiens le plus cher dans le monde, vous trouuiez mauuais que ie m'en sois picqué ; comme si vostre escrit ne touchoit point mon particulier, mais estoit simplement fait contre l'opinion du mouuement de la Terre. Ie dis bien plus, c'est que cet escrit est tellement contre moy, qu'il n'est nullement contre l'opinion du mouuement de la Terre ; voire sert mesme à troubler son repos, ainsi qu'à mon aduis j'auray occasion de toucher tantost. Et il n'est pas necessaire que ie le vous represente icy, puis que ie l'ay amplement fait aux pages septiesme, & sui-*

uantes de mon Apologie , par le sommaire examen du contenu aux quatorze chapitres , dont vostre ouurage est composé. I'en estois parueni iusques icy , quand ayant esté saisi d'une nouuelle fievre , i'ay esté empêché d'acheuer ce que i'auois entrepris de vous dire. Maintenant , que par la grace de Dieu mes accez se relaschent , & que ie puis non pas certainement escrire moy-mesme , mais à tout le moins dicter par interualles quelques periodes à mon homme , ie luy fais reprendre la plume pour continuer d'escrire autant que ie pourray dicter , afin de vous faire moins languir apres ma responce.

LE SECOND POINCT doncques , duquel i'auois fait dessein de parler , regarde la façon dont vous remarquez que mon Apologie est escrite. Car vous dites premierement , qu'elle *est toute farcie d'injures & brocards* , comme si en l'escriuant i'auois esté de cette humeur , dont vous me menacez de vouloir estre , c'est à dire , dont vous auez esté enuers le Pere du Liris , si l'enuie vous prend de me respondre. Or ie me reconnois par la grace Dieu tout autrement fait que cela , & ie ne me repens point d'auoir desplû à mes Amis , en ce qu'ils se sont faschez de ce qu'ayant esté offensé par vous , au point où ie l'ay esté , ie vous ay neantmoins traité avec tant de moderation , & ay v'sé de tant de retenue à vous dire de grossières & fascheuses paroles. Vous seriez en effet bien en peine de m'en nommer vn autre , qui blessé autant que moy , vous eust traité plus doucement que moy ; & i'interpelle vostre conscience de ce que vous auriez vous-mesme fait , si quelqu'un vous auoit traité de la sorte ? Si vous m'auez cotté quelques-vnes de ces prétendues iniures , avec les motifs que ie puis auoir eu de les dire , i'entreprendrois de vous en esclaircir ; & si en les proposant vous m'auez conuain-

eu d'auoir eu tort, ie vous en ferois de tres-bon cœur toute sorte de reparation; Mais puis que vous n'en auez rien particularisé, il seroit superflu de le remuer moy-mesme. Je dis la mesme chose à l'esgard de ces pretendus *brocards*, pource que si vous trouuez bon de m'en coter quelques-vns, & ensemble le sujet que ie puis auoir eu de vous les donner, ie suis prest, ou de me iustifier si j'ay eu raison, ou de m'accuser s'il se trouue que j'aye eu tort. Vous dites ensuite, *que la virulence de mon Apologie est fort grande*. Ne voulez-vous pas dire qu'elle est pleine de fiel, de venin, de rage; ou s'il y a quelqu'autre mot, que vous veüilliez entendre par ce mot de virulence? Quoy que ce soit que vous puissiez entendre par cette parole, j'en laisse & le sens & l'usage à ce haut stile, auquel vous vous vantés d'estre passé maistre, & duquel vous auez voulu me faire peur; Car pour le mien, il est, Dieu mercy, d'une trempe bien differente; & ie ne suis point aux termes de me purger de rien de semblable à ce que vous m'opposez; puis que ie n'ay fait autre chose que vous témoigner mon ressentiment, pour le tort que vous m'auiez fait; & ie me rapporte à tout homme de bon sens, si ce mot, dont vous baptisez mon ressentiment, luy conuient ou non. Vous dites là-mesme, *que ie vous ay mal-traitté à plats couuerts*. Quest-ce encore à dire cela? Ne voulez-vous point insinuer ce que vous auez déjà rebatu dans vostre liure, que *j'auois pretendu de refuter vostre solution du fameux Problème, & auois respondu à vos argumens, pour l'immobilité de la Terre, sans toutesfois vous nommer, ny faire mention qu'ils fussent de vous*? Si vous auez eu cette pensée, ie m'en remets à ce que j'ay si copieusement remonstré touchant cét article, en faisant voir que vous n'auiez cherché ce pretexte, que pour donner quelque couleur à la demangeaison que vous auiez eüe d'escrire contre

moy, afin de ne sembler point estre le premier à rompre le nœud de nostre amitié. Car pour le surplus, j'auois aussi peu pensé à choquer en particulier, ny vous, ny aucun autre qui eussiez escrit contre le mouuement de la Terre, comme à arracher la Lune du Ciel; & si par hazard j'auois touché quelques vns des argumens que vous auiez employez; j'en auois aussi casuellement obmis d'autres employez aussi par vous, comme il me souuient que vous vous en estes plaint; la mesme chose m'est arriuée à l'égard des autres Auteurs, qui auroient eu occasion de faire de semblables plaintes. Et tout cela pource que j'auois escrit ces Epistres hors de chez-moy, tout en voyageant; & sans aucun liure, & que j'auois simplement desduit les choses qui me passioient par l'esprit, & touché les argumens qui me venoient en la memoire, sans songer à ceux qui les auoient proposez. Que si par ce mot de *pluts couverts* vous pretendez que j'aye dit l'un & pensé l'autre, ie vous declare que ie ne m'entends point à cela, & que ie n'ay iamais rien eu tant à cœur, que de m'expliquer nettement, & proposer nuëment & sincerement mes pensées. Et à vostre esgard particulierement, quelle occasion ou necessité puis-je auoir de feindre, & de desguiser mes sentimens? Est-ce que ie doie apprehender vostre raisonnement, ou craindre vostre stile comme la foudre; pour estre obligé de pallier la verité, & me couvrir seulement de quelque apparence? Je sçay bien l'opinion que vous auez de vous; mais ie sçay bien aussi celle que j'en dois auoir.

Ensuite de ces choses vous parlez du *blasme*, lequel vous dites, que ie receuray par ceux de Paris, qui nous ont veu en si bonne intelligence depuis nostre reconciliation, & ont publié quelle est ma sincerité & douceur de naturel, dont moy-mesme, poursuiuez-vous, me vante, & qui m'est attri-

*buée par ceux qui voyans mon Apologie me cognoistront mieux à fonds. Or en premier lieu, pour ce qui est du sentiment de ces Messieurs de Paris, qui nous ont veu en si bonne intelligence, & qui voyent néanmoins maintenant mon Apologie imprimée, i'ose me promettre de leur candeur, que pour la connoissance qu'ils peuuent auoir de moy, & de ma franchise, ils adiouteront librement foy aux protestations, qui ont esté mises en teste, & demeureront persuadez, que ceux qui ont pris le soin de cette impression, l'ont fait sans mon consentement, & sans que i'en aye eu aucune participation. Et certes, si l'auois trauaillé à cette piece depuis nostre reconciliation, & qu'elle ne se trouuaist point auoir esté dés-auparauant mise hors de mon pouuoir; i'aduoüe que ie ne serois point excusable de m'estre employé à ce trauail, ou mesme de l'auoir communiqué à aucun qui le peust publier. Mais vous aduoüiez-vous mesme que lors que nous nous reconciliafmes, ie vous parlay de la piece faite, & de la copie enuoyée en Hollande; en supposant que l'original auoit dés-auparauant esté enuoyé à nostre commun amy, dont ny vous ny moy, n'auions point occasion de nous deffier. En second lieu, pour ce que vous notez que ie me vante *de la sincerité & douceur de mon naturel*; ie vous veux dire à l'esgard de la *sincerité*, que non seulement c'est vne chose dont ie me vante, mais que ie me croy mesme obligé de soustenir au prix de mon sang; pource qu'en effect vn homme que l'on peut accuser de manquer de sincerité, c'est à dire, de candeur, de bonne foy, & de prud'hommie, ne merite point de viure sur la terre. Et à l'esgard de la *douceur*, i'auoüe que c'est bien vne qualité, dont ie recognois que Dieu m'a donné quelques semences; mais que ie m'en vante au point que vous le dites, ie ne vois pas le sujet que ie puis vous en auoir donné; puisque Dieu m'ayant fait la grace de
me pou-*

me pouuoir recognoistre, ie ne suis point d'humeur à me vanter d'aucune perfection; mais d'auoüer plustost en tout & par tout ma foiblesse. Tout ce dont ie me puis apperceuoir qui vous a donné occasion d'inserer ce mot de vanterie, sont ces paroles de la page 37. de mon Apologie, ou apres m'estre vn peu laissé emporter sur le sujet du blasme, que vous m'auiez donné au fait de la Religion, j'ay parlé ainsi, *Dices opinor, mi Galteri, videri me preter meam indolem abripi, ac oblitum esse me lenitatis.* Mais pour ne rien dire de ces paroles apposées ensuite, *Verumtamen, ô carum caput, & me cognosco hominem, & authores habeo, sequor que (tametsi, ut mihi videor, eminùs) Sanctorum Patrum precipuos, qui pareis insimulationes ferri patienter prohibuerunt; hinc fueram quidem cetera probra, maledictaque despecturus, &c.* Pour ne dire donc aucune choses de ces paroles, ie vous puis assurer, que cette instance, que ie me fay faire par le bon homme, est la mesme qu'il m'auoit déjà faite sur l'aduis que ie luy auois donné du dessein que i'auois de vous respondre. Car en me r'escrivant que vostre liure au fonds ne valoit pas que i'en prisse la peine, & que ie ferois bien mieux de m'employer à quelque chose de meilleur, il auoit adjousté qu'il seroit neantmoins par auanture bon que ie vous chapitrasse (c'estoit son mot) sur ce que vous auiez si soigneusement affecté de me faire passer pour mauvais Catholique, & qu'il craignoit seulement qu'ayant raison d'estre sensible en cette occasion, ie me laissasse, contre mon humeur, emporter vn peu trop auant, & en quelque façon me rendisse semblable à vous. En troisieme lieu, pource que vous renuoyez ceux qui publient ma sincerité & douceur à la lecture de mon Apologie pour me cognoistre mieux à fonds; Je n'ay autre chose à vous dire, sinon que ie suis tres-aise de ce renuoy; pource que ie suis bien certain, que pour ma sincerité cette le-

Aurs ne les en fera point douter, & ne leur suggererā rien de semblable à ce que ie vous ay reproché en la page 33. sur ce bel aduis, *Profectò illi amicè consulo, nē cum suā fidei professione verbis satis ambiguīs exposita, facie sit unquā Romipeta, sed semper Romifugā, &c.* Et pour ce qui est de ma douceur, i'ay déjà rapporté de quelle forte ils m'ont fait sentir qu'elle n'a esté que trop grande. Je sçay bien que vous auez esté touché de ce que ie me suis picqué de vostre procedé contre vostre attente; mais pour l'opinion que vous auiez que i'estois doux, deuiez-vous estre si aigre & si amer en mon endroit? Ne deuiez-vous pas presumer que bien qu'il n'y ait rien de si doux qu'un Aigneau, il peut neantmoins estre prouoqué, & irrité à vn point, qu'on peut dire de luy, *Cornu ferit ille, cauto?* Vous colligez de ma figure, que i'ay beaucoup de maligne influence, & que mon Esprit est propre à dissimuler, facile à irriter, & prompt à se laisser emporter aux chaleurs de ses premiers mouuemens, comme ie recognois moy-mesme par ma Lettre : Mais puisque vous estes si grand Astrologue, & que vous vous faites si blanc de cette espée; pourquoy ne l'auiez-vous pas recognu auant que de faire contre moy vostre liure? Pourquoy n'auiez-vous pas deuiné que ce liure me donneroit occasion de faire chose qui vous seroit des-agreable? Vous adjoustez, qu'à present vous en voyez les effets contre vous, comme Monsieur Des-Cartes Gentil-homme, de sçauoir & grande reputation, les auoit aussi esprouuez pour bien peu de sujet. Mais si i'ay eu bien peu de sujet ou non, de repartir à Monsieur Des-Cartes comme i'ay fait, ie m'en rapporte à ceux qui ont pris, ou prendront la peine de voir mon ouurage, & vous n'auiez que faire de toucher cette chorde, comme pour interesser de nouueau ce personnage en vostre querelle. Il vous doit suffire d'auoir furtiuement pris de luy les pointes que vous

avez crû estre les meilleures & plus propres à me picquer, quoy que i'aye dissimulé la chose en mō Apologie.

Vous dites d'ailleurs, *que mon Apologie est toute fardée d'alterations de vos Textes ou de leurs sens, & de fausses suppositions, que ie fais souvent pour me donner beau jeu à vous descrier; Et sur la fin parlant des deux points que vous reprenez en la Preface de Monsieur de Neuré, vous concluez, que par ces deux points on peut iuger de la sincerité, tant de mon Apologie, que de la Preface, qui sont secondes, dites-vous, en semblables suppositions.* Or comme tout cela vous est aisé à dire, ainsi ie vous deffie de le verifïer. Vrayement vous me prenez bien pour vn autre, de croire que ie sois homme à alterer le texte, ou le sens de qui que ce soit, & de supposer rien de faux contre aucun, & moins à vostre esgard que d'autre homme du monde. I'ay trop d'ingenuïté pour ne pas aduoüer que i'ay tort, s'il m'est suffisamment monstré que ie l'aye; & i'ayme trop la verité, pour auoir aucune pensée qui aille à son preiudice. Vos raisonnemens d'ailleurs dans les matieres problematiques, ne sont point tels, que ie les doiue apprehender, pour me raualer iusqu'au point d'vser contre vous d'alterations & de suppositions fausses. N'avez-vous point eu pour le fait de ces pretenduës *Alterations*, la mesme pensée que vous auiez déjà couchée par escrit en ces termes, *Sed Dominus Gassendus passim rationes meas, seu syllogismorum premissas, quibus concludo, supprimens, tantum refert conclusiones, iisque dumtaxat verbulo, ne quidem probato, respondet, ut patebit inferius; quod sanè videtur potius esse dolosi Rhetoris veritatem fucare satagentis, quàm ingenui Philosophi veritatis ipsius amore flagrantis.* Si cela est, ie n'ay qu'à vous représenter icy la mesme responce que i'ay faite à ces paroles en la page 22. *Quæso hic etiam, virum-ne bonum, sincerumque amicum agit,*

*dum in immerentem ita debucchatur, ut etiam pro doloſo habeat? Vide interim, quam occasione. Contendit nimirum me ſemper reſpexiſſe ad ſuum librum, quo nullum minus in mente habui: Indignaturque, quòd librum totum, aut ſyllogiſmos integros in Epiſtolam non tranſcripſerim, nec fuerim rixatus ut mos eſt ſcholarum. Putat ratiociniorum vim, niſi in modo, & figurâ conſtituantur, nullam ſentiri; non capit poſſe verbulo moleis verborum immenſas deſtrui; Cauſſatur me illud inſuſum ſcribendi genus non imitari, quod unum ipſi perſpectum eſt; ac tum quia putat alium ſtylum non eſſe viro Philoſopho, ac veritatis ſtudioſo dignum, habet me potius Rhetorem, ſeu (quia artem Rhetoricam non doceo) Oratorem doloſum: ô viri candorem! ô ſimplicitatem! ſed nempe condonandum eſt; neſcit enim quid faciat ignarus rerum, ac neſciens planè quæ bonæ artes inter ſe, aut communicent, aut diſideant; quid diuortium fecerit primùm inter Sapientiam & Eloquentiam, res ex ſe coniunctiſſimas; quo ſtylo uſi fuerint Philoſophorum proceres, & optimi quique ſcriptores. N'avez-vous point auſſi par ces fauſſes ſuppoſitions entendu la meſme choſe, dont vous vous eſtes apres expliquè, quãd apres auoir rapportè ces paroles de Monſieur de Neurè, *Quis non miretur improbam ipſius ſedulitatem in emendicandis, aut veriùs extorquendis tantorum virorum ſuffragiis? Quid non egit, ut extunderet quas flagitabat adulatione plenas Epiſtolas? quanto ſubinde faſtu impetratas vulgauit?* Vous adjouſtez que ces paroles ont eſtè tirées de la ſeconde page de mon Apologie, où ie parle ainſi à Monſieur le Prieur de la Vallette. *Meminiſti certè, cum ille ſuffragium noſtrum expeteret, ut pro euulgata ſua illà Longitudinum inuentione mercedem quampiam conſequeretur, quanto ſudore annucrimus; cum & abeſſe exigenti officiũ amico nollemus; & non poſſemus tamen inuentum, quod neque recens, neque conducens arbitraremur, comprobare; & abunde inte-**

*rim foret perspecta viri indoles, cui nihil præter elogia, plan-
susque foret placitum. Meministi etiam cum ille, editis
quibusdam literarum nostrarum fragmentis vberiores depos-
ceret, id nos cepisse consilij, ut nihil planè responderemus, ra-
ti nostro silentio, neque veritati fucum iri factum, ut si præ-
staremus obsequium; neque viro ullam iacturam, ut si quod
res erat, palàm faceremus. Meministi demum quàm egre
consilium nostrum acceperit; quàm nos pro desertoribus ami-
citiâ habuerit, quam nos patienter eius querelas perferendas
censuerimus; donec ipsi, post sua mercedis desperationem,
pectus detumuit. Et poursuivez, que ces paroles sont con-
traires à la vérité, pource que vostre inuention des Longi-
tudes estant mise en lumière, vous en enuoyastes les liures
aux plus renommez Astronomes de l'Europe, avec lettres ex-
positives de l'iniustice, qui vous auoit esté faite par la secon-
de sentence de vos Commissaires, entierement opposée à la
premiere, & par lesquelles vous les priez simplement de
vous en escrire leur iugement en toute vérité & iustice Ma-
thematique; qu'il n'est possible de prouuer le contraire par
vos lettres escrites à Monsieur le Prieur & à moy, non comme
à vos Amis, mais comme à personnes capables de l'affaire; Et
qu'il n'est pas vray que vous nous en ayez escrit pour la secon-
de fois, pour auoir de nous de plus amples approbations: Les
Astres ne vous ayant pas donné vn naturel à flatter, ou men-
dier, pour auoir Aries en vostre Ascendant, & Mars Sei-
gneur d'iceluy au Trine de tous les autres Planetes conioin-
tes: Ce qui vous fait trop genereux pour en venir là, &
vous ne croyez pas qu'il y ait au monde vn homme plus en-
nemy de flatterie, fourberie, menterie, imposture, ny qui ait
plus d'aersion à faire le mendiant ou l'importun que vous.*

Si c'est icy la chose que vous auez entenduë, puis
qu'aussibien j'auois fait dessein de vous en toucher vn
mot; le n'ay, ce me semble, autre chose à faire qu'à
vous représenter icy les propres termes de quelques-

unes de vos lettres, que i'ay fortuitement rencontrées, comme restant d'un plus grand nombre, qui se sont esgarées ou perduës avec beaucoup d'autres papiers que i'ay trouuë à dire chez-moy, apres de si longues & retirées absences. Et premierement, pour vostre lettre du 11. Octobre 1634. je trouue qu'apres auoir accusé la reception de celle, dont vous fistes imprimer quelques fragmens, & m'auoir entre plusieurs autres choses entretenu ainsi, *Je vous veux dire en premier lieu que ie n'ay point proposé ma science avec demande de recompense, que par le conseil des gens plus sages que moy, & qu'un pauvre garçon comme ie suis, qui a ja beaucoup travaillé pour les uns & les autres sans fortune, ny recompense, n'a deu faire autrement; estant assuré de donner une verité, que personne n'auoit donné deuant moy. Or ie ne doute point, que n'ayez bien examiné mes problèmes & calculs; mais ie crains que n'ayez pris la peine de bien peser le reste; car vous ne m'eussiez point tant opposé de difficultez. Et apres, vous m'objectez des difficultez dont ie n'ay que faire; car ie ne demande point le diametre de la Lunette, &c. Et quant au mouuement de la Lune, &c. Et quant à la science des parallaxes, &c. Pour la ligne meridienne voyez Scheinr, &c. Mais quant aux erreurs sensibles qui se trouuent dans les Tables des plus excellens Astronomes de ce siecle, soit pour les Planetes, soit pour les Estoilles fixes, l'ose bien assurer qu'on n'en aura iamais meilleure raison par aucun moyen que par le SCHOLIE, &c. Et peu apres, Quand on auroit bien une autre inuention que par le Ciel, pour trouuer les Longitudes, par exemple, Que la science de l'Eguille aymantée, ou celle dont vous dites m'auoir parlé, ou quelqu'autre, se trouueroit propre à l'effect; Neantmoins on ne s'y fieroit qu'entant qu'elles sont conformes à la science par le Ciel, &c. Et par le Ciel il est impossible d'y arriuer que par la Lune. Vous me dites là-dessus (poursuiuez-vous) comme mes Commissai-*

res; que ie n'ay donc rien enchery par-dessus ceux qui en ont parlé iusques à moy. Mais comment d'ailleurs dites-vous donc, que i'ay porté cette science beaucoup au delà de tous ceux qui s'en estoient meslez deuant moy; Et incontinent apres, Or vous me prenez d'un autre biais, qui est qu'on me demandera, & en France, & ailleurs vne experience; & que ie ne voudrois pas estre cautionaux Espagnols, ou Hollandois, qu'ils peussent estre asseurez & deuiner d'estre à dix lieues près d'un tel banc, d'un tel escueil, &c. Je serois un grand sot, les choses estant en l'estat où elles sont, ie n'en voudrois pas seulement estre caution sur terre ferme; Et m'estonne qu'estant homme de tres-bon Esprit vous me faites cette objection, laquelle mesme ie supporte assez impatiemment de ceux qui ne sçauent ce que c'est. Car il me faudroit donc reciproquement bailler vne caution que les Tables de la Lune sont tres-bien ajustées, & tous les lieux de la terre tres-bien situéz sur la Charte, ou le Globe, au deffaut desquelles deux choses avec toute ma science qui est tres-vraye, ie passerois pour un Durbec, comme on dit en Prouence. Et plus bas, Quant à ce que me reprenez d'auoir aigry l'esprit de mes Commissaires, ie vous iure, mon cher Amy, que ie leur ay rendu deuant mon action, en mon action, & apres, tout l'honneur que i'ay pû; & que pas un d'eux n'a esté mon Iuge que par mon moyen; car c'est moy qui les ay nommez, & en pouuois nommer d'autres plus sçauans qu'eux, &c. Et encore plus bas, I'oubliais à vous dire que les premier & troisieme calcul, &c. Et que le tiltre de mon liure n'est point vain, mais veritable, & que pour cette autre science desrée, qui doit faire le mesme effect, ou plus precix, soit de iour, soit de nuict, sans voir la Lune, ny le Ciel, &c. n'est point dans la nature, s'il ne se trouue quelqu'autre pierre ou chose semblable plus sçauante & reguliere que l'aymant, qui seul, &c. Ce qui me fait hardiment conclurre qu'en toute la nature n'y ayant point de vraye science des Longitudes, que celle que

i'ay donnée ; Le trouue dis-je apres toutes ces choses, cette apostille ou addition. Je vous supplie me faire encore un peu de responce sur cette-cy, & comme ie reçois en bonne part & avec honneur tout ce qu'il vous plaist de m'escrire, ie vous prie aussi d'auoir pour agreable ma franchise & naïfueté. Secondement, ie trouue que ne vous ayant point fait de responce ny à cette lettre, ny à plusieurs autres, tendantes à la mesme fin, pour les raisons contenues au texte Latin de mon Apologie, que peu auparauant i'ay cité. Le trouue, dis-je, qu'environ deux ans apres, c'est à dire le 12. Iuillet 1636. vous m'escriuistes en ces termes ; Vous ayant depuis long-temps escrit par plusieurs fois, sans auoir receu de vous qu'un billet, il y a environ trois mois par lequel seulement me donnez aduis d'auoir receu les miennes, & que m'escrirez au premier iour : Je suis en peine d'où cela peut proceder, & crains que vos Lettres ne me soient pas rendues ; Car que vous n'ayez le loisir de m'escrire, ou qu'un accroissement de fortune vous ait changé, comme elle change les hommes vulgaires, c'est ce que ie ne peux croire. Il faudroit donc que ce fust un refroidissement de nostre ancienne amitié, auquel ie ne croy pas que i'aye donné aucun sujet ; & si ie l'auois fait, il me semble qu'au moins vous m'en deuriez faire vne plainte, plustost que de m'abandonner en un affaire important, ou mesme les Estrangers ne m'ont pas refusé leur secours ; De sorte, que ie me plains que vous secouriez si mal vostre Amy au besoin. Vous voyez les grandes trauersés que ie souffre par un impudent, que mes Commissaires font agir, &c. Apres lesquelles choses ie n'ay rien à adjouster, sinon que tandis que mon homme copioit ces lignes ie me suis mis à remuer quelque tas de vieux papiers, & y ay fortuitement rencontré deux autres de vos Lettres, dont l'une qui est du 6. Aoust 1634. contient entr'autres choses ces mots, En somme ie vous supplie par nostre ancienne amitié, par la charité Chrestienne,

stienne, qui nous oblige tous à prendre le party des indignement oppressez ; & par la mesme verité, de m'enuoyer vostre iugement sur les quatre poincts de la derniere sentence de mes Commissaires. Je fay la mesme priere à Monsieur le Prieur de la Vallee. Je la feray aux plus excellens Astronomes que ie scauray aux pais estrangers, afin que sur leur iugement & le vostre, ie puisse solliciter ma recompense, laquelle sans tel iugement des hommes scauans & gens de bien, i'auray peine d'auoir, pour l'empeschement qui m'y a apporté l'iniquité de mes Iuges. Et l'autre qui est du 18. Feurier 1636. commence ainsi, Je m'attendois de recevoir quelqu'une de vos Lettres pour responce aux miennes dernieres, afin d'auoir de vostre part plus d'avis & de bon conseil sur mon affaire des Longitudes, mais n'ayant eu ce bon-heur, &c. Toutes lesquelles choses ie vous represente icy, afin qu'estant conferées avec mon susdit texte, & ce que vous auez dit en suite de ces lignes, il soit plus aisé de iuger de ce qui en est ; & particulierement de ce que vous dites, que mes paroles sont contraires à la verité.

Vous continuez apres ainsi, Mais puis que tant de gens m'ont rapporté que Monsieur Gassend se plaignoit tousiours de ce que i'auois fait imprimer son approbation de mes Longitudes ; & qu'en son cœur il auoit tousiours gardé cela contre moy : Je luy demanderois volontiers, si luy & feu Monsieur le Prieur m'auoient donné leur approbation de mon Inuention, selon leur sentiment, ou contre leur sentiment. S'ils disent contre, ils confesseront leur iniustice, voire leur imprudence, ayant affaire à un homme qu'ils s'imaginoient affamé d'honneur & de gloire, & qui ne manqueroit d'en faire vanité, & s'en preualoir pour obtenir sa recompense, & tromper feu Monsieur l'Eminentissime Cardinal de Richelieu : Et de plus, ils accuseront d'ignorance Galilée, Monsieur de Valois, Hortensius & Longomontanus, qui ont

approuuë l'Inuention ; voire leur honneur les obligeoit à s'en retracter, & refuter mon Inuention ; ce qu'ils n'ont osé faire. S'ils disent selon leur sentiment, c'est à dire, selon la verité, comme il est bien plus croyable ; quelle faueur ay-je receu d'eux, qui estoient mes anciens & intimes Amis, que ie n'aye aussi receuë de ces autres sçauans Astronomes, dont vne bonne partie ne m'estoit cognüe que de nom, & n'estoit mesme de ma Religion ? Or pource que vous vous estes mis en peine de faire icy vne espeece de Dilemme avec tant d'appareil ; le vous diray seulement, que vous auriez jugé vous-mesme cette peine superflüë, si vous auiez considéré & pesé les paroles, tant des fragmens de ma Lettre que vous auez fait imprimer, que du susdit texte de mon Apologie. Car il est vray que Monsieur le Prieur & moy ayans receu vos Lettres, nous nous imaginâmes que nous auions affaire à vn homme affamé d'honneur & de gloire, & encore d'argent, & qui ne manqueroit pas de faire vanité, & de se preualoir de nostre approbation pour obtenir sa recompense, si nous la luy donnions telle qu'il la desiroit. Mais comme d'un costé nous ne voulusmes point (pource que vous estiez nostre Amy) vous donner le desplaisir, ou de n'auoir point de responce, ou de l'auoir sans quelques tesmoignages d'agrément pour vostre trauail ; Ainsi de l'autre, nous resolusmes de conceuoir en telle sorte nostre approbation, ou tesmoignages d'agrémens, que vous n'eussiez point sujet de faire imprimer nos Lettres, & par ce moyen mettre nostre honneur en compromis, & nous exposer à la risée des hommes sçauans. C'est pour cela, qu'afin de ne parler que de mon fait, ie vous proposay les difficultez insinuées parmy ce que j'ay rapporté de vostre Lettre du 7. Octobre 1634. & temperay neantmoins le tout par la douceur de ces deux ou trois periodes que vous fistes extraire, & imprimer incontinent apres comme

les croyant, & non pas les autres, à vostre aduantage. Et pour voir ce que c'est, voicy mes paroles tirées de vostre liure, *Pour vostre Inuention de la science des Longitudes que vous avez publiée, Je vous diray en premier lieu, que j'ay grandement admiré, & me suis infiniment resjouy de voir à quel point vous avez porté cette cognoissance. Aucun que ie sçache n'estoit point encore allé si auant; & c'est pour cela que j'ay crû que vous meritez, & loüange, & recompense. Et apres, Il est bien vray que si on ne la peut auoir que du costé du Ciel, & qu'il faille seulement s'en rapporter à la Lune; non seulement vous avez enchery par dessus tous ceux qui en ont parlé iusques à vous; mais ie ne vois pas mesme qu'on puisse adjouster grand' chose à ce que vous en avez déclaré. Et plus bas parlant des Commissaires, Car au reste, il me semble qu'ils ne se seroiēt point fait de tort, quand ne voulans point aduoüer que vous eussiez donné à cette cognoissance la derniere main, ils auroient neantmoins déclaré que vous l'eussiez portée beaucoup au delà de ce qu'en auoient atteint tous ceux qui s'en estoient meslez deuant vous. Cela, à mon aduis, eût esté suffisant pour vous faire obtenir vostre recompense, & ce vous eût esté assez. Or de toutes ces paroles pouuez-vous colliger que j'aye approuué vostre science des Longitudes. comme la seule, la parfaite, & la desirée depuis deux mille ans? J'ay dit que ie ne sçauois point qu'aucun fût encore allé si auant? Ay-je dit pour cela, que vous fussiez allé iusqu'au bout? Vn homme qui est party de Paris pour aller à Rome, estant arriué à Iuuisy, est allé plus auant qu'un autre, qui n'est arriué qu'à Ville-Iuifue. Peut-on dire pour cela, qu'il soit arriué à Rome? J'ay voulu dire la mesme chose; & pour la difficulté que ie trouue en cette science, j'ay entendu qu'avec tous les Problèmes que vous avez sur-adjoustez à ceux des Anciens, vous n'estes point pour cela plus aduancé en la science des*

Longitudes, que celui qui est arriué à Iuuify, est auancé au chemin de Rome. J'ay dit encore, que *s'il s'en falloit rapporter à la Lune, ie ne voyois pas que l'on pût adjoûter grand' chose à ce que vous en auez déclaré.* Ay-je aduoüé pour cela, que la Lune fust la seule cause, à laquelle on peut auoir recours? Ou que n'y ayant qu'elle qui peut estre employée en cette affaire, elle fut suffisante pour l'effect désiré, quand mesme vous y auriez mis la derniere main? La vraye & désirée science des Longitudes est telle, que comme on en peut auoir affaire à tous momens, & principalement sur la mer; ainsi elle doit estre en main, & toute preste pour le secours de ceux qui en ont besoin? Or peut-on dire que celle qui sera tirée de la Lune, soit de telle nature, qu'à tous momens on la puisse employer? De trente iours qu'elle met d'un renouueau à l'autre, elle en demeure la valeur de quinze sous l'horison: Et si des quinze restans on retranche le temps qu'elle demeure cachée sous les rayons du Soleil, ou ne paroist que foiblement, ou ne peut estre comparée avec le Soleil, ou quelqu'autre Estaille fixe, à peine se trouuera-t'elle de quelque vusage la quatriesme partie du temps. Que si encore de ce temps-là on retranche celui durant lequel les nuées & les broüillards peuuent la couvrir, ou empêcher la veüe des Astres, avec lesquels il la faut comparer, le temps auquel on s'en pourra seruir sera réduit à fort peu de chose. Finalement j'ay dit, *Que vous meritez loüange & recompense, & que vos Commissaires ne se seroient point fait de tort, quand ils l'auroient aduoüé.* Mais est-ce à dire que cette loüange & cette recompense vous doiuent estre données, comme pour l'Invention du vray & désiré secret des Longitudes? Tous ceux qui s'adonnent à de vertueuses occupations, méritent d'estre loüez; pourquoy n'aurois-je pas dit cela de

vous, qui vous estiez occupé vertueusement? Le dire commun est d'ailleurs, que tout labeur merite recompense; Deuois-je dire le contraire du vostre? Sçauoir maintenant si les gens de cœur se doiuent proposer d'autre recompense de leurs vertueux trauaux, que l'honneur & la gloire de s'y estre employez; c'est vne autre question, & ie m'en rapporte à ce que ie vous puis auoir dit sur ce sujet, dans le premier Article, auquel vous respondes par vostre susdite Lettre du 7. Octobre; pour voir si ce n'a pas esté par vne simple condescendance à vostre ardeur, & au dessein que vous auiez d'estre recompensé pecuniairement, que i'ay dit que vous meritez quelque recompense; comme estimant qu'elle ne vous deuoit point estre enuiée, si ayant besoin d'argent vous en pouuiez obtenir quelque somme de la bourse du Roy, ou de Monsieur le Cardinal; quoy que cette bourse auroit besoin d'estre fort grande, s'il falloit donner des recompenses telles que vous croyez meriter à tous ceux qui adjoustent quelques nouueaux Problêmes, Theorêmes, Corollaires, Scholies, à ceux que l'on trouue desia inuentez, ou tracez par d'autres. Toutes lesquelles choses ie vous represente icy à cause de vostre Dilemme, & seulement pour dire que i'ay parlé selon mon sentiment, mais non pas au sens, ny avec l'auantage que vous l'avez pris.

LE TROISIÉSME POINCT regarde ce que vous soustenez que i'ay fait, ou n'ay pas fait dans mon Apologie. Car premierement vous dites *qu'il n'y a rien dans toute mon Apologie, dont ie puisse tirer auantage contre vous, que la croyance que vous auez eüe du branlement de la Terre apres l'experience du Gentil-homme Dauphinois, qui en donna la premiere nouuelle, & dont vous adjoustez, que ie fais vn gros plat, & vne bonne partie de mon Apologie.* Surquoy il faut aduoüer que si ie n'ay eu autre

chose à reprendre en vous, que cette seule croyance, vous auez esté bien habile, & second en bonnes choses; & moy bien mal-adroit, & sterile en mes objections. Mais ce n'est point avec moy que vous deuez presumer de pouuoir eluder, par semblables artifices, soit la vigueur, soit la façon, dont ie vous propose mes difficultez. Vous auez pretendu faire passer cet article pour vne suffisante response à toute mon Apologie, & en appuyer le tacite mouuement, qui vous a fait si souvent repeter de ne me vouloir point respondre; mais c'est pour cela aussi, que ie vous ay redonné vostre pretenduë parole, & que ie vous interpelle encore vne fois de la reprendre, & me respondre si vous pouuez. & de faire voir s'il est vray qu'il n'y ait autre chose en toute mon Apologie que ce seul point, où i'aye eu raison; En me reseruant de faire vne liste de tous les autres, & les esclaircir de telle façon que peut-estre serez-vous honteux d'auoir pensé eschapper, & vous mettre à couuert sous l'artifice de ces paroles. Vous dites, *que i'en fay vn gros plat, & vne bonne partie de mon Apologie.* Ne semble-t'il pas à vous entendre dire, que i'en dois auoir fait la moitié, le tiers, ou le quart, ou approchant de cela? Et cependant de vingt & vne fueilles qu'elle contient tout ce que i'ay dit sur cette matiere n'en comprend point vne & demie entierement? Mais quand il en comprendroit dauantage, à quoy est-il bon d'exagerer cela, si i'ay eu raison de m'estendre sur ce sujet? Ie vois bien qu'il vous cuit dequoy ie m'y suis vn peu arresté, pource que premierement i'ay fait voir que vous vous contredisiez à vous-mesmes, & tombiez dans la mesme Impieté que vous reprochez aux Copernicains, quand vous leur opposez ces passages de la sainte Escriture, *Terra in eternum stat; fundasti terram super stabilitatem suam; non inclinabitur in seculum seculi; &*

autres de cette nature, touchant lesquels vous ne sçauriez apporter aucune distinction, sans qu'il soit permis aux Copernicains d'apporter pour eux les mesmes & autres semblables. D'ailleurs, i'ay fait voir qu'au lieu que ces gens-là expliquent fort commodément le flux & reflux de la mer par le mouuement de la Terre, vous prouviez tres-friuolement, & impossiblement le mouuement de la Terre par le flux & reflux de la mer; Et qu'au lieu que les autres laissent aller librement les choses pesantes vers le centre qu'ils leur assignent, sçauoir est celuy de la Terre, vous les destourniez incessamment & contradictoirement du centre que vous leur donniez; sçauoir est, le mesme que de tout le monde. Outre cela i'ay fait voir la fausseté, ou plustost l'impossibilité de ce pretendu mouuement du perpendicule que vous auez crû estre causé par le mouuement de la Terre, comme agité par la mer; & il n'est pas besoin, que pour le mieux prouuer i'adiouste icy aucune chose. Vous poursuieuez, *que i'ay eu tort de vous reprendre, & brocarder si rudement sur ce sujet, Tant parce que l'année 1644. vous vous en retractastes, & repristes vous-mesme, & que vous fustes le premier qui descouuristes la tromperie de l'experience, comme il appert par la deffense de vostre Astronomie reformée contre Frommius Professeur aux Mathematiques du Roy de Dannemark, en la page 30. Que parce que moy-mesme i'y fus trompé comme les autres, & que sie n'ay crû ce tremblement, pour le moins ie l'ay tenu problematique, & l'ay traitté comme tel, iugeant la chose digne d'estre publiée, & que i'en ay fait vn discours de six pages à la fin de mon Epistre à Monsieur Naudé, imprimée à Paris chez Monsieur Cramoisy l'an 1643.* Or pour tout cela il est à noter, que Monsieur le Comte d'Alais nostre Gouverneur s'estant rencontré à Paris, & m'ayant fait l'honneur de desirer que i'allasse passer avec luy la se-

maine Sainte & les Fêtes de Pasques de l'année 1643. en sa maison d'Escoüen, ie pris occasion d'employer quelques heures du loisir que i'y eus, à faire & enuoyer de là à Monsieur Naudé la Lettre qu'il auoit désirée touchant les neuf Estoilles obseruées à l'entour de Iupiter par le Pere Rheita Capucin de Flendres, & d'y adiouster vne appendice touchant l'obseruation que Monsieur de Peïrins Gentil-homme du Dauphiné m'auoit escrit (par l'entremise de Monsieur de Valois nostre commun Amy) qu'il auoit faite; sçauoir est, qu'ayant attaché à vn filet de diuerses longueurs, & entr'autres de 30. pieds vn plomb ou perpendicule, avec vne pointe au bas, qui durant le repos du plomb respondoit precisément à vne autre qui luy estoit opposée, & arrestée sur le plancher; il auoit remarqué que ce plomb alloit & venoit reglement deçà & delà (à l'esgard de ladite pointe attachée au plancher) deux fois tous les iours, ou dans l'espace de 24. heures. Ma Lettre s'estant trouuée imprimée incontinent apres elle vous tomba entre les mains assez à temps, pour en mettant au iour vostre liure des *Aisles rompuës*, qui fut acheué d'imprimer auant la saint Iean suiuant, faire mention de cette obseruation, & l'employer pour preuue de vostre opinion touchant le mouuement de la mer, comme iustificée par l'agitation de la Terre, avec laquelle le plomb apparemment & la pointe effectiuement, alloit & venoit deux fois tous les iours. Mais moy qui apres mon retour d'Escoüen auois voulu faire moy mesme ladite experience, & l'auois trouuée fausse, ie fus tout surpris de lire dans vostre liure, que vous l'auiez aussi faite, & en auiez parlé en ces termes, *Ego in vno hospitij mei cubiculo bene clauso, cum perpendiculo pendente dumtaxat ex tabulato in suppositam ad pauimentum ariculam, motum illum apparentem perpendiculi per dies quinque adeo sensibilibiter*

libiter observavi, ut de Telluris titubatione nullatenus dubitem. De telle sorte qu'en composant dès le mois de Juillet d'après mon Apologie, laquelle en effect i'envoyay à Monsieur le Prieur de la Vallete sur le commencement d'Aoust, après que le bon Pere Merfenne l'eut parcourüe, ie pris occasion de descrire cōme quoy i'auois descouvert la faulseté de cette obseruation, & l'impossibilité d'un tel mouuement. Vous donnastes après au commencement de l'année suiuant vostre defense contre Frommius, & y reparlastes de l'opinion que vous auiez eüe, & tenuë si fermement touchant cette Experience.

La chose estant allée ainsi, lors que vous dites maintenant que dans cette defense vous vous retractastes de cette Opinion, & fustes le premier qui descouristes la tromperie de l'experience; c'est vne merueille de voir comment vous prenez peu garde à ne rien dire que de vray, & à ne vous contredire pas vous-mesme. Car pour ne parler point de moy qui descouris cette tromperie si long-temps avant que vous fissiez & publiassiez ladite defense, voicy vos propres paroles dans la 30. page du liure de ladite defense, que vous alleguez pour prouuer que vous auez esté le premier auteur de cette descouverte, *Verum hac in parte omnes decepti fuimus; nam perpendiculum filo argenteo tenuissimo suspensum stetit prorsus immobile iudicio visus, ut ego ipse expertus sum, monitus à doctissimo & R. patre Marino Merfenne obseruationibus Physicis addictissimo.* Par ces paroles n'auoüez-vous pas que ce fut le Pere Merfenne, & non pas vous, qui fit le premier cette descouverte? D'autre part, vous dites bien dans les paroles alleguées, que vous vous estiez trompé, *decepti fuimus*; Mais comment pouuez-vous dire pour cela que vous vous soyez retracté, & repris vous-mesme de cette croyance, puis que dans le mesme liure, &

incontinent apres en persistant dans l'Opinion, que le mouuement de la Mer cause vne legere agitation à la Terre, suiuant la proportion qu'il y a du poids de celle-là, au poids de celle cy ? Voicy vos paroles, *cúmque agitat iuncula sit imperceptibilis, saltem perpendiculo ex decem pedibus altitudinis suspenso cum filo argenteo; siquitur rationem illam esse admodum exiguam, ne dicam insensibilem*; Et aussi-tost apres, *sed fortè experientia cum filo argenteo ex maiori altitudine rem hanc elucidabit euidentius*. Par ces paroles doncques pouuez-vous dire que vous vous soyez retracté del'opinion que vous auiez eüe du branslement de la Terre? puis que par elles-mesmes on void que vous y estes tousiours demeuré, comme estant tousiours dans les termes du plus ou du moins? Mais pour m'enuelopper dans vostre cause, & monstrier que i'ay eu tort de vous reprendre, vous adioustez que *ie fus trompé comme les autres, & c'est pour cela qu'ayant fait mention de moy dans ledit liure, vous y poursuidez aux termes citez, Verùm hac in parte omnes decepti fuimus*. Il est vray que pour preuenir ce que vous iugiez bien que ie pourrois vous respondre, vous auez adjousté dans vostre imprimé, que *si ie n'auois creu ce tremblement, pour le moins l'auois-ie tenu problematique, & l'auois traité, comme tel, iugeant la chose, &c.* Et en effet, ie m'en rapporte à ceux qui auront veu mon escrit, & pesé vos paroles cy-deuant alleguées du Liure des *Aisles rompiës*, pour iuger de la tromperie que vous faites commune à vous & à moy. Car à mon esgard, ils trouueront, qu'ayant receu de Monsieur de Peirins la description de son obseruation, ie ne voulus point certainement d'abord la tenir pour faulse; mais aussi ne voulus-ie point declarer que ie la tenois pour vraye; mais ie suspendis le iugement que i'en pourrois faire, iusqu'à ce que i'eussè moy-mesme fait l'experience, &

espluché soigneusement le tout : Et pour preuve de cela voicy mes paroles dès l'entrée de l'Appendice ; *Sanè non ausim quidem illam pro indubia diuendere (quippè & ipse nondum sum opportunitatem experiundi nactus, & vir Nobilis eo candore est, ut uberiores explorationem potius exigat, quàm assensum) verùm & ne prorsus diffidam, facit eius viri solertia, industria, eruditio, fides, & qualiscunque tandem res sit ; ea digna videtur, quàm & ipse noris, & si quibus præterea significandam censueris.* Voicy encore en quels termes ie conclus la deduction problematiquement faite de diuerses choses, qui auroient pû estre tirées d'une telle obseruation, si elle eust esté véritable, *An potius ista, quæ verso omnia, mera nuge sunt, quòd nondum de rei veritate constet ; ac præstat proinde non circa hanc minùs, quàm circa illam aliam R. Patris obseruationem tenere assensum ? Ita mihi quidem videtur, Nau-dæ, &c.* Mais à vostre esgard, les mesmes trouueront que non seulement apres la premiere connoissance, que vous eustes de cette obseruation, vous la tintes probable, mais qu'apres l'auoir mesme faite, vous la tintes si certaine, que vous publiastes hautement de n'en douter, nullatenùs, en façon du monde. Dont il sera aisé de remarquer si ie me suis trompé comme vous, ou mesme, si ie me suis trompé aucunement, veu que ie n'ay rien assuré, & ay au contraire protesté de ne vouloir rien assurer, iusqu'à ce que i'eusse esprouué la chose moy-mesme ; & que l'ayant esprouuée, i'ay publié qu'elle estoit faulse, & monstté que comme impossible, elle ne pouuoit estre soutenüe.

Secondement vous dites, qu'ayant vous eu deux grands desseins, l'un de reformer l'Astronomie, que Ptolemé, Copernic, & Tycho Brahe auoient fondée sur de faux principes, & de reformer encore l'Astrologie, comme farcie d'absurditez, & sottises, & n'ayant ny face ny forme de science dans les li-

ures, qui en ont traité iusqu'à présent: vous vous resioiſſez de voir que pour le premier ie n'ay rien eu à dire contre vostre *Astronomia restituta*, en toute mon *Apologie*, là où ie ne vous ay point espargné en tout ce dont mon esprit s'est pû aduſer. Or pour commencer par ces dernières paroles, vous vous trompez bien fort de dire, ou vouloir faire croire, que i'ay eu la pensée de feüilleter tous vos eſcrits pour eſplucher & diuulguer tout ce que i'y trouuerois à redire. Ie n'ay pour tout ſongé qu'au liure que vous auiez fait contre moy, & auquel i'ay aſſez trouué de quoy reprendre, ſans me donner la peine d'aller fouïller dans le reſte de vos œuures pour y trouuer des matieres ſemblables. Vous ſeriez en eſſet bien en peine de me monſtrer vn ſeul article, dans toute mon *Apologie*, où ie me ſois eſcarté & où i'aye remüé aucune de vos opinions contenües dans vos autres liures. Que ſi vous dites cela à cauſe qu'ayant rapporté quatorze raiſons dans votre ſolution du fameux Probleme, ie les ay toutes ſommairement rapportées & refutées dans mon *Apologie*. Vous voyez bien que ie ne l'ay fait que pource que vous m'y auez engagé, en me reprochant que ie n'auois point auparauant touché toutes ces raiſons, mais que i'en auois laiſſé huit en arriere, & que vous auez continué de vanter & vouloir faire paſſer toutes vos raiſons pour des démonſtrations infaillibles; Dautant que cela m'a obligé à vous remonſtrer, que ſous votre correction, vous n'entendiez pas ce que c'eſt que démonſtration, & à vous faire conſequemment voir les paralogiſmes de toutes ces raiſons ou démonſtrations pretendües. La choſe a d'ailleurs eſté comme neceſſaire, pour toucher quelque choſe du ſujet digne du tiltre, *Ala Telluris fraëta*; parce que ce tiltre faiſant eſperer que vous enerueriez par vos raiſonnemens démonſtratifs les deux principales, & comme fonda-

tales raisons, qui comme deux aîles font voler la Terre; vous n'avez rien fait de semblable en tous les quatorze chapitres de vostre liure; mais avez seulement parlé de ma personne dans les trois premiers; dans les sept suiuaus n'avez que touché quelques preludes generaux du mouuement avec vostre opinion du flux & reflux de la Mer; & dans les quatre derniers avez seulement parlé de la vertu vnitiue ou attractiue de la Terre à l'égard de ses parties; vertu, dis-je, qui est mesme employée par ceux qui soustiennent le repos de la Terre, & n'est point mise en auant par ceux qui en soustiennent le mouuement, comme vne fondamentale raison; mais comme vne simple hypothese pour resoudre quelque obiection qu'on leur fait. En telle sorte que pour esprouuer la force des coups de vostre massüe à rompre les Aîles de la Terre, il a esté necessaire de faire voir quels auoient esté vos quatorze plus grands efforts. Mon dessein n'a donc point esté d'aller regratter sur vos autres liures, & particulièrement sur ce que vous appelez vostre *Astronomia restituta*, sur laquelle il y auroit trop à rondre, à qui s'en voudroit donner la peine, & sur tout à l'esgard de ce tiltre fastueux qu'aucun de tous ces grands hommes, qui ont employé toute leur vie à observer eux-mesmes le Ciel, & à en regler les mouuemens, ne se sont iamais aduisez de donner à leurs ouurages; reconnoissant de bonne foy, qu'ils n'en estoient point venus à bout, & qu'ils laissoient encore bien de la besoigne à leurs succeffeurs, auant que de l'auoir portée à sa derniere perfection. Tycho Brahe mesme auoit bien fait dessein de composer vn ceuvre à la suite de ses progymnasmes, qu'il vouloit intituler, *De instauratione Astronomia*; Mais quelle n'est pas la modestie de ce tiltre en comparaïson du vostre? puis qu'il enonce seulement le suiet de l'ouurage, & ne découure point de va-

nité en l'Autheur, comme s'il auoit tiré l'eschelle, & porté l'Astronomie au plus haut point qu'elle le puisse estre; quoy qu'après vn soin, vn trauail, & vne despenſe incroyable de près de quarante années employées continuellement à obseruer, à trouuer des hypotheses, & à dresser des Tables pour les mouuemens des Cieux. En effet, ce grand homme est mort dans l'embarras des difficultez qu'il iugeoit presque insurmontables: & ses obseruations ayant esté commises à Keppler, cettuy-cy avec tout son grand genie a sué durant 26. ans, auant que de donner les Tables qui en pouuoient estre desduites, & a confessé à la fin, que les moyens mouuemens ne sont point exactement cogneus iusques-icy, & que les hommes n'en sçauroient determiner les equations auant la suite de plusieurs siecles, & les obseruations de ceux qui viendront apres nous. Vous estes bien plus hardy que tout cela avec ce magnifique tiltre, *Astronomia iam à fundamentis integrè, & exactè restituta.* Car qui est-ce, qui le voyant, & ne vous cognoissant point, ne doieue penser qu'il n'y a plus rien à faire en l'Astronomie, pour estre entierement & exactement restablie, presumant que vous ayez entrepris ce restablissement par les vrais fondemens de l'Astronomie, qui sont les iustes & exactes obseruations, & ayez en suite donné des Hypotheses & dressé des Tables, auxquelles il n'y ait rien à dire? Et cependant que trouuera-t'il de tout cela dans vostre liure? Vous n'avez iamais obserué; Vous n'avez iamais trauaillé à faire des Hypotheses sur aucunes obseruations, ny de vous, ny d'autruy? Vous n'avez iamais composé de Tables sur aucunes Hypotheses. Que pourra-t'il penser de vous, si ce n'est le, **PARTYRIENT MONTES?** Quand il ouurira vostre liure, & qu'il n'y verra que quelques petites pieces d'une quinzaine de iours chacune, &

toutes faites dans vn cabinet , & sans voir le Ciel ; ſçavoir eſt, voſtre querelle des Longitudes, avec les Traittez de l'Equation du temps, des parallaxes & des refractions ; aura-t'il occaſion de croire que c'eſt là toute l'Aſtronomie reſtablie en ſon entier ? Et quand dans ces traittez vous auriez adiouſté quelque choſe à ce que Keppler & les autres en ont dit, deura-t'il croire que c'eſt là tout ce qui ſe peut dire en l'Aſtronomie ; en telle ſorte , que vous puiſſiez vous vanter de luy auoir donné la derniere main ; pluſtoſt que d'auoir ſimplement conſeré ſelon voſtre capacité, quelques legers adminicules, ou menuës precautions pour ceux qui à l'aduenir voudront s'employer à la reſtablier ?

Il eſt vray que vous ne vous eſtes point aduiſé de donner ce tiltre à voſtre ouurage, que, *ex poſt-facto*, pource que vous n'auiez point eu d'abord vn deſſein ſi grand, ny vne penſée ſi vaſte, que de reformer toute l'Aſtronomie ; mais ſimplement ietté les yeux ſur la recompenſe, que doit attendre l'inuenteur du vray ſecret des Longitudes, ce qui vous l'auoit fait premierement intituler, *Longitudinum terreſtrium nec non cœleſtium noua, & hætenus optata ſcientia*. Ce n'a eſté qu'apres auoir fait imprimer ſucceſſiuement neuf liures ſous ce tiltre, que vous vous eſtes aduiſé, pour les rendre plus venaux, d'en faire refaire la premiere page, & d'y mettre en teſte ce tiltre, *Aſtronomia*, &c. & que vous ayez pris occaſion d'en intituler deux Traittez faits depuis, l'un *Coronis*, l'autre *Deſſenſio Aſtronomia à fundamentis integrè & exactè reſtituta*. Or quand vous adiouſtez à ce tiltre, que voſtre ouurage eſt abſolument neceſſaire pour dreſſer des Tables exactes, c'eſt à dire, pour donner au Monde la principale ou comme finale partie de l'Aſtronomie (car pour les Ephemerides & tout ce qui les ſuit, ce ne ſont que choſes deſduites, & comme les effets

& les fruits qui s'en tirent) n'aduoïez-vous pas, que l'Astronomie n'est point exactement restablie iusqu'à present; mais qu'elle le pourra estre quelque iour, si quelqu'autre que vous y veut mettre la main: de sorte que iusqu'icy elle ne puisse estre aucunement qualifiée, *Iam restituta*, mais tout au plus, *Olim restituenda*? Ainsi pour ajuster vostre premier tiltre avec le second, vous dites bien que vostre, *Astronomia restituta*, comprend neuf parties, *Optata scientia Longitudinum caelestium nec non terrestrium*, mais si quelqu'un vous demande, quelle est la vraye Longitude de quelque Estaille dans le Ciel, vous n'aurez garde de la luy sçauoir dire; mais vous le renuoyerez iusques au temps, que d'autres auront travaillé à designer la vraye Longitude des Estailles. Ets'il vous demande la Longitude de quelque lieu sur la Terre, vous le remettrez tout de mesme iusqu'à ce qu'il se soit trouué des personnes qui aient reformé les Tables du mouuement des Cieux, & particulièrement de la Lune; & que l'on ait fait de suffisantes obseruations sur la Terre, pour marquer la difference des temps, qui puisse regler la difference des lieux. Surquoy en me ressouenant de ce que ie vous disois tantost, touchant vostre Inuention de la science des Longitudes terrestres, laquelle vous dites estre celle qui a esté desirée depuis deux mille ans, & pour laquelle les Princes & les Republiques ont proposé des grandes recompenses: Je m'auise de vous demander si vous pouuez dire en conscience, que par exemple feu Monsieur le Cardinal au nom du Roy, & Messieurs les Estats de Hollande, aient entendu recompenser rien de semblable à vostre pretenduë Inuention? N'ont-ils pas crû que leur argent ne seroit bien employé, que lors qu'apres auoir achepté le secret des Longitudes, ils pourroient librement enuoyer leurs mariniers en Levant, en Ponant, & par toutes les

tes les Mers, sans craindre de se tromper en la designation des lieux où ils se trouueroient, & qu'il leur importeroit de connoistre? Et s'ils n'ont point crû en pouuoir tirer de semblables vsages; pensez-vous qu'ils ayent esté si niais, que de s'obliger à donner de si grandes sommes? Pensez-vous qu'ils ayent voulu se rendre ridicules, en ne se proposant & n'acceptant rien dauantage qu'un secret inutile? Or le vostre n'est-il pas tel? Le voilà publié depuis quinze ou seize ans? Y a-t'il quelqu'un, soit François, soit Hollandois ou autre, qui l'ait pratiqué, & s'en soit preualu? Vous en renuoyez l'usage & la pratique, iusques à ce que les Tables de la Lune soient reformées: mais premierement, quand le seront-elles? Sera-ce dans dix, dans cent, dans mille ans d'icy? Peut-estre non pas encore au bout de ce temps là? Il s'en est en effect déjà passé quinze depuis vostre secret diuulgué, & pourquoy ne s'en passera-t'il pas encore quinze autres, & peut-estre cent, ou quinze cens mesme, auparauint que ces Tables se trouuent reformées iusqu'à la precision qu'il faut? Et avec quel droit auez-vous pû pretendre un argent present pour un effect si esloigné? Avec quel front auez-vous osé demander, & à Monsieur le Cardinal, & à Messieurs les Estats mesmes la recompense d'un secret, dont vous leur auez renuoyé l'effect si loin? Il n'a tenu qu'à eux, direz-vous, de faire faire les obseruations necessaires pour la reformation des Tables, & à faire trauailler en suite à ladite reformation; Mais en bonne-foy ont-ils deu s'embarquer sur vostre simple parole? & au lieu d'auoir un prompt secours de vostre secret, s'engager à une besogne, qui n'est point d'un iour ny d'un an, mais de plusieurs siecles? D'autre costé ie laisse à part la difficulté touchée cy-dessus, que quand mesme on auroit les Tables les plus reformées du monde, tousiours n'auroit-

on pas le secret que l'on desire, l'usage de telles Tables estant inutile, durant tout le temps que la Lune est sous l'horison, qu'elle est cachée dans la splendeur du Soleil, qu'elle est couverte par les nuages & broüillards, qu'il n'y a point d'autre Astre qui paroisse avec elle, comme il arriue assez souvent, lors que dans l'Hyuer principalement, l'air est legerement nubileux. Je ne dis rien aussi des difficultez qui se rencontrent en l'observation, qui sont & tres-grandes, & tres-considerables; & dy seulement qu'en la declaration de vostre pretendu secret vous avez fait la mesme chose, que feroit celuy qui sur la proposition d'une grande recompense pour la descouverte d'un secret, ou remede infaillible à guerir la goutte, ou autre maladie reputée incurable, demanderoit cette recompense, à cause qu'il auroit descouvert ce secret, pour avoir bien & subtilement discouru, que pour guerir cette maladie-là, il ne faut qu'en temps & lieu appliquer, A C T I V A P A S S I V I S; & pour ceteffect avoir quelques simples qui se trouuent en Orient, dont il ne faille que faire la despense, & prendre la peine de les aller chercher. Je vous laisse à penser si durant la maladie de Monsieur le Cardinal vous luy eussiez fait la proposition de quelque remede semblable, au lieu de luy en proposer quelqu'un qu'il pût promptement pratiquer, où il vous eût renuoyé? Or pour monstrier qu'il a crû que vous l'auez traitté de la sorte en la declaratiõ de vostre secret des Longitudes, ie ne veux que vous représenter icy le contenu de la lettre du 18. Fevrier 1636. dont j'ay parlé cy-deuant. Car ie trouue que vous y avez adjousté ces lignes. *Depuis auoir escrit la presente, j'ay appris chez Monseigneur le Cardinal que ie n'auray aucune recompense; & on n'allegue pour toute raison, que la seconde sentence de mes Commissaires; & que ie ne prouue pas la science des Longitudes par l'experien-*

ce. Voyez ie vous supplie par cette sixiesme partie quel tort on me fait, & si ie n'ay pas raison de mettre au feu le reste que ie me suis reserué; & d'en priuier la posterité, pour rendre telle injustice plus odieuse. Et en suite: Du depuis encore, ayant fait prier vn certain Marquis puissant auprès de Monseigneur le Cardinal, par vn autre Marquis son Cousin & mien Amy, de vouloir interceder pour moy vers son Eminence: Puis moy estant allé voir ce premier Marquis pour sçauoir s'il auoit intercedé pour moy; de plain abbord il m'a si mal, & si indignement traité, que i'aurois honte de le dire: me mettant au rang des faiseurs de pierre philosophale, qui cherche des choses, qui ne sont, ny ne peuuent estre; que Son Eminence ne m'auoit rien promis, & ne me deuoit rien: que la seconde sentence de mes Commissaires estoit vraye; & qu'ils estoient bien autrement capables de iuger de cette affaire, que tous ceux qui m'ont escrit, & enuoyé leur approbation: Que la premiere sentence ne m'auoit esté donnée en pleine assemblée, que ad honores; & plusieurs semblables impertinences, par lesquelles i'ay assez-tost iugé qu'il estoit gaigné par les autres pour me nuire; à quoy il ne manquera point, veu le pouuoir qu'il a, & le ton de mespris, & de desdain, & de brocards avec lequel il me traittoit. Sur quoy, par parenthese, ie vous demande, si ie n'auois pas deu apprehender de vous escrire, & enuoyer vne approbation, dont vous püssiez faire front contre le iugement de vos Commissaires; & si vous ne deuiiez pas apprehender vous-mesme que Monsieur le Cardinal vous demanderoit enfin vne experience, qui vous seroit non seulement difficile, mais mesme impossible; lors que vous me rescriuistes, comme i'ay desia rapporté cy-dessus, Que vous vous estonniez de quoy ie vous faisois cette objection, laquelle mesme vous supportiez assez impatiemment de ceux qui ne sçauoient ce que c'estoit. Je sçay bien que vous ne manquerez pas de repeter icy, ce que i'ay

desia rapporté de vostre lettre du 17. Octobre 1634. sçauoir est, *que vous soustenez hardiment qu'en toute la Nature il n'y a point de vray secret des Longitudes, que celuy que vous avez donné, & que par conséquent la recompense proposée par les Princes pour l'inuention d'un tel secret ne peut estre donnée à autre qu'à vous ?* Mais ne semble-il pas bien iuste, que comme vous les renuoyez iusqu'à vn si long-temps, que celuy des Tables reformées; ainsi ils vous renuoyent iusqu'au bout d'un, de dix, de cent, voire peut estre de tous les siecles, pour voir si à l'aduenir il ne se trouuera point quelque plus habile homme que vous, qui démente vostre hardiessé, & face voir qu'il y a en la Nature ce que vous dites qui n'y est point? Car qu'ils doiuent croire que vous ayez penetré & connu le fonds de toute la Nature, en telle sorte qu'apres ce que vous en sçauiez il ne se puisse rien sçauoir; quelle caution leur en donnez-vous? Et n'est-ce pas en effet la mesme chose, que si auant l'inuention de la Bouffole, de l'Artillerie, de l'Imprimerie, des Lunettes, & autres choses semblables, que ces derniers siecles ont produites; il y auoit eu quelque Monsieur Morin qui eut soustenu hardiment, qu'il n'y auoit point en la Nature de moyen de connoistre en tous temps, & en tous lieux les quatre coins du Ciel; de foudroyer & esbouler les villes; d'escrire en vn moment les pages entieres; de descouurir plus de quarante Estoilles par dessus les six ou sept ordinaires des Pleiades; de compter les pieds d'un ciron, &c.

FINALEMENT, en continuant de parler de vos deux grands desseins, vous dites, *Que pour le second, qui est vostre Astrologia Gallica, non encore mise en lumiere, mais acheuée en 26. liures, vous laissez à iuger, non aux Astrologues, mais aux Sages en general, si ie suis pardonna-ble de la nier, m'en mocquer, & la tenir pour des bourdes ;*

mais que ie ne l'ay encore veüe, & n'ay iamais dressé, ny iugé aucune figure celeste, surquoy vous me conuiez de prendre Aduocat, n'en estant pas capable moy-mesme, pour plaider cette cause in Senatu Astrologorum. Or en premier lieu, ie n'ay point du tout parlé, que ie sçache, dans mon Apologie de vostre *Astrologia Gallica*, mais seulement de l'Astrologie en general, comme quand i'ay dit sur vostre quatorziesme raison qu'elle estoit, *earundem quibus & quinta, sexta, septima nugarum Astrologicarum*, & ay continué en ces termes: *Condonandum autem, si videamus illum in easdem semper recidere, tanquam scilicet germanum parentem; ut qui se primum quesuisse illis, ac adinuenisse germana principia gloriatur; quando & ipse alijs odium Astrologiae condonandum putat, quoniam, inquit, illius diuina scientia prima principia fuerant hactenus ignota, in hisque assignandis errarunt Ptolemaeus, Haly, ceterique Astrologorum principes, qui planè venerandam ex se scientiam fucis, figmentis, falsisque principijs verorum loco adornatam inter alias scientias doctorum ludibrijs exposuerunt.* Qui est en effet la mesme chose que vous auez dite en vostre imprimé, & que i'ay desia rapportée cy-dessus: Et cependant, pource que celuy-là est digne de blasme qui condanne vne chose qu'il n'a point veüe, ou qu'il ne connoist point, vous prenez finement l'occasion de dire que vostre *ASTROLOGIA GALLICA* n'est point iusques icy mise en lumiere, & que iusqu'à present ie ne l'ay point veüe, pour auoir pretexte de me blasmer deuant tous les Sages, de ce que ie nie, me moque, & tiens pour des bourdes & des chimeres, vne chose que ie n'ay point veüe. S'il est de bonne foy, ou non, de compliquer ainsi les matieres du fait, & du droit, pour en tirer ces consequences, ie m'en rapporte. Mais quand i'aurois specialement parlé de vostre *Astrologia Gallica*, ce que ie n'ay point fait, si ce n'est que vous vouliez dire qu'elle

est comprise sous l'Astrologie en general, dont en general ie me mocque; ie croy auoir assez de raisons pour presumer qu'elle se trouuera aussi-bien digne de mocquerie, que la Chaldaïque ou Babylonienne, que l'Egyptienne, que la Grecque, que l'Arabique, que l'Italique, & toutes ces autres, lesquelles vous descrivez vous-mesme pour accrediter la seule *Gallique* vostre chere engeance. Et ma presumption est fondée non seulement sur la connoissance generale que ie puis auoir de ces choses, mais encore sur de particuliers eschantillons, que vous auez laissé voir de cette incomparable Science. En second lieu, sur ce que pour faire mieux voir le tort que i'ay de la blasmer, vous me reprochez hautement *que ie n'ay iamais dressé ny iugé aucune figure celeste*. Auoüez que vous vsez enuers moy d'une hardiesse bien presumptueuse, & qui meriteroit d'estre repoussée par vn celebre démenty, si ie pouuois obtenir de moy de faire le fanfaron comme vous. Mais me contentant de vous dire que cela est faux, ie demande en mesme temps tres-humblement pardon à Dieu, de n'auoir autresfois employé que trop de temps apres ces bagatelles. Il est vray qu'il m'en demeure au moins cette satisfaction que i'en ay pour vne bonne fois reconnu la vanité, & que i'ay pris de là occasion d'appliquer mon esprit, & de donner mon temps à de plus solides, plus serieuses, & meilleures choses: & non seulement cela mais encore d'en auoir conceu vn tel mespris, que i'ay tousiours depuis eu en horreur de passer dans le Monde pour vn diseur de bonne aduanture, & eu pitié de moy-mesme, de ce qu'en ma ieunesse i'auois esté si sot, & si foible, que d'y auoir adjousté quelque foy. Quand vne fois vous me dites, que deux femmes villageoises qui auoient perdu quelque chose, vous estant allé trouuer, vous dirent qu'elles s'adressoient à vous, comme au

Deuin ; combien pensez-vous que ie fus satisfait en moy-mesme d'auoir vescu en telle sorte par la grace de Dieu, que rien de semblable ne m'arriuoit ? L'aduouë bien que plusieurs fois vous m'avez-voulu engager en cette pratique, afin de m'auoir pour compagnon du mestier ; & qu'en vous resmoignant le mespris que i'en faisois, vous m'avez tousiours reproché, que ce mespris ne procedoit que de ce que ie ne voulois point donner de mon temps à dresser & iuger des figures ; mais il me souuient aussi de vous auoir tousiours fait la mesme responce, que ie viens de trouuer couchée dans mon Apologie, à la suite du passage que i'ay tout maintenant cité ; lors que ie dis, que m'ayant vanté l'heureux succez de vos predictions, & objecté, *non aliam ob causam videri à me Astrologiam, quam quòd bonas horas in erigendis thematibus, ferendisq; iudicijs non inuaret impendere ; Excepi, satis esse mihi semel perspexisse artis vanitatem, quam & nihil non in dies confirmaret, ac me abesse vt vellem amplius infelicitè adeo rem omnium pretiosissimam, tempus scilicet, collocare.* L'aduouë aussi que ie n'ay iamais voulu contester avec vous des causes de mon mespris, & des raisons que i'auois de me mocquer de vostre Science ; mais ie l'ay tousiours fait pour deux principales considerations ; L'vne, que ie reconnoissois vostre humeur à tirer aduantage de tout, & que ie preuoyois que vous ne manqueriez point de publier dans vos Escrits, ou que vous m'auriez terrassé, ou que vous m'auriez tiré à vostre cordelle, par la force de vos raisons ; mais que par vne espee d'opiniastreté ie n'aurois point voulu l'aduotier : L'autre, que i'estois persuadé d'auoir à faire à vn homme tellement coëffé de ses opinions, que rien du monde ne l'en sçauroit faire demordre, & d'vne humeur si auantageuse, qu'il voudroit passer pour mon Instruteur, là où ie n'estois point hom-

me à croire que ie pûsse apprendre rien de bon de-luy, en telle sorte que i'ay tousiours tasché de tourner tous nos entretiens en des discours indifferens, & sur lesquels ie n'eusse point occasion d'exciter vostre bile ; estant veritable, que non seulement sur le fait de l'Astrologie, mais encore sur d'autres sujets, auxquels ie croyois que vous n'auiez pas mieux pensé que moy ; vous auez pretendu de passer pour mon maistre, & pour cela ie n'ay eu garde d'en vouloir entrer en dispute verbalement avec vous, tesmoin ce que i'en rapporte en mon Apologie, lors qu'apres ces paroles, *Sed fac occasionem hac ipsa de re differendi non incidisse : fac me eam ultro declinasse, ne bilem mouerem opiniosissimo amicorum ; an verti potest crimini, quo sic debuerit exacerbari ?* I'ay allegué celles-cy tirées de vostre liure, où parlant de moy, vous auiez dit, *At si dum toties eum inuiserem sua dubia, vel difficultates mihi amicè proposuisset, poteram illum ab absurdis infrà exponendis, & utrumque nostrum à scribendi molestia, & me præsertim ab expensis liberare.* Et bien que ie n'aye respondu à cela autre chose, sinon que, *Na ego infelix, & merito meo meritisimo imperitus, qui doctorem tantum, tamque officiosum non sim dignatus consulere, & veritatis sitiens noluerim bibere ex fonte.* C'est bien là peut-estre vn de ces brocards dont vous vous estes plaint cy-dessus ; mais en bonne foy, pouuois-ie ou deuois-ie vous respondre autre chose ?

Vous proposez en suite, *Si n'estant pas capables de vostre Astrologie ie veux prendre Aduocat pour plaider cette cause, in Senatu Astrologorum.* Or pour cela encore, ne meritez vous pas que ie vous enuoye promener avec tout vostre non pas SENAT, mais SABBATH ; non pas ASTROLOGORVM, mais ASTROMAGORVM ; & que ie vous die avec le saint Apostre, *qua conuentio Christi ad Belial ?* Puis que par la grace de Dieu

i'ay le bon-heur d'estre l'un de ceux, à qui pour leur particuliere onction nostre Seigneur fait l'honneur de les appeller *Christos suos* ; & que pource que vous pretendez vous rendre le chef de ceux, à qui il a esté dit, *Annunciate, quæ ventura sunt nobis, & dicemus quia Dñs estis vos* ; vous pretendez estre comme le chef de tous ces autres faulx Dieux, ou deuins, que vous appelez bien Princes des Astrologues, mais que vous faites neantmoins passer à vostre esgard pour des marmoufets ? Vous dites apres, *qu'il n'y a aucun doute, que ie me verray condanné à me recognoistre suiet à l'influence des Astres, & à leur faire hommage de mon bel esprit, de mon sçavoir, de mes Amis, & choses semblables.* Et n'avez-vous point apprehendé d'estre hûé comme vn profane, lors que vous avez parlé de la sorte ? C'est bien loin de dire avec tous les Chrestiens, que c'est à Dieu seul que ie dois rendre honneur & gloire de tous les biens que ie puis posseder, de vouloir me faire condamner à en recognoistre les Astres pour autheurs ; & à leur en rendre hommage ? Je sçais bien que vous direz, que vostre intention a seulement esté de me faire condamner à recognoistre les Astres comme causes secondes, & à leur faire hommage comme à mes Seigneurs d'arriere-fief. Mais tousiours ne pourrez-vous point vous excuser d'auoir parlé ainsi absolument, & sans distinction, comme fasciné de vostre erreur, & tout confit dans la persuasion de vos refueries. Vous auiez déjà auparauant, pour me faire subir cette condamnation composé vn demy-plaidoyé de ce qu'estant né l'an 1592. & le 22. Ianuier à 6. heures 30. minutes (que suiuant vostre art vous avez corrigé, & changé en 42.) du matin, & sous la latitude de 44. degrez six minutes (que par m'esgarde vous avez dit estre de quarante-trois degrez) & ayant conséquemment suiuant la figure dressée par Monsieur de Valois

nostre cher Amy, le 13. degré 54. minutes du Scorpion au milieu du Ciel, & les 17. degrez, 20. minutes du Capricorne en l'Horoscope, Mercure & le Soleil conjoints en la premiere maison dans le Verseau, signifioient en effect vn bel esprit, propre à toutes les sciences ausquelles il s'appliqueroit, & qui se rendroit celebre dans le monde; mais que Saturne Seigneur de l'Horoscope, de Mercure & du Soleil, estant fort mal-affecté en la 6. maison, à sçavoir exilé, retrograde, & battu du quadrat de Mars Seigneur du milieu du Ciel par application mutuelle, & la Lune Dame de Saturne estant au quadrat de Mercure; cela marquoit beaucoup de maligne influence de Saturne & de Mars en tel esprit, propre à dissimuler, facile à irriter, &c comme il a déjà esté rapporté cy-dessus. Vous en faites maintenant vn autre de ce que, ayant vn Iupiter dans le Sagittaire en l'onziésme maison, c'est ce qui m'a rendu si heureux en Amis de qualité, Justiciers, Ecclesiastiques, Gouverneurs de Prouinces, & semblables; & fait que j'ay passé la meilleure part de ma vie en telles maisons, plustost en qualité d'Amy que de seruiteur domestique; Et que la direction du milieu du Ciel au quadrat de Mars, bien affecté en la 2. au Sextil du Soleil & de Mercure, & de plus Seigneur du milieu du Ciel, m'auoit fait Professeur du Roy aux Mathematiques; mais qu'en la mesme année m'estant trop efforcé à parler en mes premieres leçons, ayant l'estomach & les poulmons foibles, à cause de Saturne Seigneur de l'Horoscope, tres-mal affecté dans la 6. maison in Cancro; & s'accomplissant la direction de l'Horoscope au quadrat de Saturne, Je serois tombé en vne maladie de poitrine & de poulmons, dont j'aurois languy près de deux ans, avec grand peril de ma vie, sans en estre encore guery. Or pour tout cecy, ie n'ay garde d'entrer en aucune contestation sur des vetilles, ny de vous plus dire rien que deux choses; L'vne, que c'est à Dieu que ie rends tres-humbles graces de ce tel quel esprit, qu'il

luy a plû de me donner ; de ce peu de nom, qu'il a voulu que j'eusse dans le monde ; de l'inclination qu'il a eu agreable de me donner pour la verité & la vertu, laquelle si ie ne cultiue point comme ie dois , ie le prie de tout mon cœur de m'inspirer la volonté, & me donner le moyen de le faire ; & finalement de ce nombre de grands, cordiaux, & fidelles Amis, à qui il a fait naître l'inclination & la bonté de m'aimer au point qu'ils font, & qu'ont fait iusques à la mort ceux qu'il a retirez à luy. Car au reste, pour vos Iupiters, Mercurès, Mars, & toute cette autre Deïtaille, ie leur baise les mains, & me contente de les reconnoistre tout au plus pour quelques causes generales, mais bien legeres de ce qui se fait icy bas, (à l'exclusion toutesfois du Soleil & de la Lune) & cela principalement pour la satisfaction qu'ils me donnent lors que ie m'employe à les observer, & à speculer leur mouvement, leur esloignement, leur grandeur, leur esclat, & choses semblables. L'autre, que pour ce qui regarde la Chaire Royale de Mathematiques, que Monseigneur le Cardinal de Lyon me pressa par sa bonté d'accepter il y a enuiron quatre ans ; & la maladie de poitrine qui me prit l'année d'après, & qui continuë encore à present à me trauailler, vous auez bonne grace de m'en parler, maintenant que la chose est arriüée comme si vous n'auiez pas plustost deu me le predire auparaüant, si vous vouliez que ie prisse cela pour vne épreuve de la perfection de vostre science deuineresse. Je ne sçay certes, comment apres vous auoir si souuent interpellé de me declarer par aduance quelque euenement qui fut capable, sinon de me conuaincre à tout le moins de me rendre vray-semblable la certitude dont vous auez accoustumé d'asseurer que vos predictions sont accompagnées ; vous continuez de m'alleguer des euenemens, *ex post-*

facto, lesquels vous sçavez bien que ie ne prends point pour argent comptant; comme font ceux que vous embabouïnez de vostre artificieux caquet, estant fort bien instruit de cette infinie & compliquée varieté de Maximes, qui fait que, quoy que ce soit qu'il arriue, l'on peut soustenir qu'il deuoit arriuer, sinon par cette voye-cy, du moins par celle-là. Et ce qui est de considerable, que pose deux euenemens contraires, l'on trouuera parmy ce tripotage, que l'un & l'autre estoit predict. L'importance seroit, d'annoncer déterminément vn euenement qui fust à venir, & dont la cause ne fust point apparente, tel qu'estoit il y a six ans ma vocation, & mon acceptation pour ladite Chaire, ou la maladie contractée en suite. Mais il ne vous a iamais esté possible de le faire, ou si vne fois, ou deux vous l'avez entrepris, il vous a tres-mal reüssi; tesmoin ce que ie vous ay reproché, touchant la mort du feu Roy, dans mon Apologie, & touchant l'année que vous m'auiez decernée fatale; puisque par la grace de Dieu, ie luy suruis déjà d'un notable nombre d'années. J'ay mesme cette bonne esperance de vous, que bien que vous ayez iugé l'année qui court, & qui est la 67. de vostre âge pour la dernière de vostre vie, vous la surmonterez neantmoins malgré, non pas les Astres, qui n'en peuvent mais, mais la futilité de vostre Art; Vous en viurez encore vn bon nombre d'autres, & rendrez vous-mesme vn tesmoignage bien euident contre vostre Astrologie, de mesme que Monsieur Boulliaud (dont vous avez aussi rompu l'amitié par le Liure, que vous avez volontairement & sans sujet, escrit contre luy) comme ayant déjà passé quelques années par dessus la 38. à laquelle selon vostre Art, & les sentimens des autres plus renommez Astrologues ses Amis, & de luy-mesme encore, estoit limité le cours de sa vie. Car au

reste, ie ne vous crois point si desnaturez, & si ennemy de vous-mesme, que vous vouliez faire ce que Monsieur de Thou reproche à Cardan d'auoir fait, à sçauoir de s'estre laissé volontairement mourir en l'année qu'il auoit predite; de crainte que s'il eust suruescu l'on eust argué sa prediſtion de faux. Et tout cela sans toucher à vn bon nombre d'autres prediſtions que ie ſçay vous auoir tres-mal succédé, à l'esgard des personnes de tres-grande condition, & notamment d'une grande Princeſſe vostre bien-faſtrice, qui s'est plainte en mourant de viure dix-ans moins que ses Astrologues ne luy auoient promis.

Vous adjouſtez, *quē par prouiſion ma figure natale ſera jointe à celles de Picus Mirandulanus, & Sixtus ab Hemminga; pour ſeruir vn iour de trophée à l'Aſtrologie; & que quand au mouuement de la Terre ſelon Galilée & Copernic, qui a eſté le principal ſujet de noſtre controuerſe, il eſt tres-certain, que qui que ce ſoit ne le peut ſouſtenir, à moins que de nier l'Aſtrologie comme ie fais; ainſi que vous demonſtrez de propre, & veritable demonſtration, in Aſtrologia Gallica, laquelle tres-euidemment deſtruit cette opinion, ſuppoſant la vertu des Dodecatemories, ſi euidente en ma ſuſdite figure.* Or ſur cela, i'ay premierement à vous dire, que ce ne me ſera que trop d'honneur, d'eſtre accouplé à de ſi grands hommes, & particulierement à ce noble & incomparable Pic, dont ie reuerſe la memoire. Il ne me ſouuient point d'auoir leu quelle a eſté la fin & la deſtinée de Sixtus ab Hemminga: mais pour celle de Jean Pic de la Mirande, ſon Neueu Jean François l'a aſſez deſcrite, en recitant comme il eſt mort, lors qu'il acheuoit ſa 32. année; ſans faire aucune mention de toutes ces pretenduës prediſtions, que les Astrologues poſterieurs, comme Bellant, Pontan, Gauric, & autres, ont publié qui luy auoient eſté faites du temps de ſa

mort ; plusieurs années deuant-qu'elle arriuaft ; trois d'entr'eux, qui ne font point nommez , ayant dit qu'il mourroit en la 36. année de son âge ; & ledit Bellant (qui a escrit contre luy) s'estant vanté de luy auoir predit qu'il mourroit en la 33. De dire quelle foy il faut adjouster à ces contes, ie le laisse à penser, puis qu'ils n'ont pour garand, ny l'Historien de la vie de ce grand Homme , qui auoit tant de moyens d'en sçauoir toutes les particularitez, ny aucun autre grand personnage du temps, qui l'ait rapporté ; ny mesme aucun Astrologue, qui puisse iustifier d'auoir publié la chose auant coup ; quoy que l'on ait adjousté à la fable, quel'enuie d'escire contre les Astrologues , auoit pris à Iean Pic, en haine de ce que les Astrologues auoient predit sa mort dans vne si verte ieunesse. Je laisse à part, que quand toutes ces predicions là luy auroient esté faites, ny elles ne se trouuent point si exactes, qu'on les puisse tourner à grand auantage pour l'Astrologie ; ny ne sont point de telle nature, qu'elles ne puissent auoir esté faites sans Astrologie, & sans autre art, que d'vne simple conjecture à vn ieune homme de delicate complexion, & d'vn trauail si grand & si continuel dans l'estude, que ses seules Oeuures preuent qu'il a esté. I'adjouste seulement, qu'à mon esgard vous auez possible presumé, que cette indisposition de poitrine qui me trauaille, vous donneroit le moyen de faire mon Epitaphe ; ie veux dire de publier ma figure Natale comme d'vn homme mort : mais la bonté de Dieu fera peut-estre si grande en mon endroit, que comme ie suis plus ieune que vous, ainsi ie pourray n'onobstant mes indispositions, vous sur-viure, & vous oster le moyen de publier ma mort, & d'adjouster que vous l'ayez predite. Que si vous alleguez que vous faites difficulté de predire ma mort, de peur que si elle arriuoit au temps prefix, vous

fussiez soupçonné d'y auoir contribué quelque chose, pour faire valoir vostre prediſtion; Prediſez-moy doncques au moins vne fois en vostre vie quelqu'autre euenement notable, afin que si vous ne le faites point, ceux qui ſçauront que ie vous en auray preſſé, ne prennent point l'aduantage de se mocquer de vous, & de la menace que vous m'aurez faite, qu'un iour ma figure natale ſeruiroit de trophée à vostre Astrologie. Voicy par exemple deux maladies qui me ſont ſuruenues, l'une à l'entrée de Iuin, & l'autre à la my-Aouſt; Quel aduantage vous eust-ce esté, si en eſcriuant & faiſant imprimer vos menaces, vous euſſiez deuiné & publié en meſme-temps, que i'estois pour lors meſme trauail-
lé de la fièvre; & predit qu'en ſuite de celle-là, & en tel temps, ie receuerois dans vne autre? Je ſçay bien que vous trouuerez parmy ce fatras de vos dogmes, que l'une & l'autre me deuoit arriuer: Mais ce ne ſera qu'après que vous l'aurez eu appris d'ailleurs, & ſans qu'il y ait apparence que vous l'ayez pû ſçauoir de vous-meſme. I'ay ſecondement à vous dire, que pour ce que vous touchez *du mouuement de la Terre*, ie connois, & vous-meſme vous connoiſſez des perſonnes, qui ne laiſſent pas de le ſouſtenir, encore qu'elles ne nient point l'Aſtrologie comme moy. Et quand vous dites, que *vous demonſtrez de propre, & veritable demonſtration, que quique ce ſoit ne peut ſouſtenir ce mouuement*; i'oſe dire encore vne fois, que vous voulez paſſer pour un homme, qui ne ſçait ce que c'eſt que propre & veritable demonſtration. Car il eſt bien vray, qu'une demonſtration de cette nature doit, comme vous le dites, *euidemment deſtruire, ou eſtablir vne opinion*; mais cette condition n'a garde de conuenir à celle que vous propoſez; puis que vous dites, qu'elle ſuppoſe la vertu des Dodecatemories, qui eſt vne pure chimere. Vous me direz que

ie n'en dois point parler ainsi, puisque iusqu'à présent ie n'ay point veu ce que vous en dites dans vostre *Astrologia Gallica*; Mais puis que c'est là la mesme chose, qu'en substance vous auez déduite touchant les cinquesme, sixiesme, & septiesme raisons de vostre Solution, il m'est bien permis d'en dire ici la mesme chose, que j'ay sommairement déduite dans mon Apologie. Vous dites que cette vertu est si euidente en ma figure: Et comment y est-elle euidente, si ce n'est dans l'imagination que vous vous en formez apres les euenemens de ma vie connus? Euenemens, dont les causes sont toutes prochaines, particulieres, & visibles: là où l'employ que vous faites de l'action de ces parties du premier Ciel, pour y rapporter tout ce qui se fait icy bas, n'est qu'un pur ieu de passe-passe. Je pourrois certes faire icy vne comparaison des veritables causes de tous ces euenemens, avec ces autres imaginaires, dont vous faites tant d'estat: mais ie n'ay que faire de m'engager quant à present plus auant en matiere; & ie n'ay desia esté que trop long à vous déduire les choses dont j'auois proposé de me plaindre à vous.

IE FINIRAY DONC en vous disant deux choses; l'une, que ie reconnois bien d'auoir laissé eschapper quelques paroles, dont peut-estre vous serez fâché; mais que vous deuez aussi reconnoistre que vous m'en auez donné sujet, & que vous n'avez pas deu croire que ie fusse homme à estre traité de la sorte, sans en tesmoigner quelque ressentiment. En suite de quoy, comme apres vous estre donné si librement carriere à mon preiudice, vous auez dit ces mots: *Mais laissons-là Monsieur Gassend, auquel ie veux demeurer bon Amy, & tres-affectionné seruiteur, s'il m'en iuge digne*; ainsi à vostre esgard, ie dy la mesme chose; & adjouste mesme, que c'est de tres-bon cœur: n'ayant fait tout ce que

ce que j'ay fait, que pour vous faire comprendre que vous ne deuez point si facilement, & si volontairement violer, comme vous faites, les saintes loix de l'amitié. L'autre, que si cette Lettre est escrite d'une autre main que de la mienne, ce n'est que pour la cause que j'ay remarquée en passant; & pource que dans la foiblesse qui me demeure, j'ay eu plustost fait de faire copier à mon homme ce que j'en auois escrit, que de transcrire ce que j'en ay dicté. J'ay outre cela iugé nécessaire d'ordonner à mon homme de faire vn duplicata du tout, qui puisse estre enuoyé à mes Amis; afin qu'ils ayent le moyen de m'excuser enuers ceux de qui vous dites que ie receuray du blasme, & de leur faire notamment sçauoir que ie vous ay rendu la parole que vous auez tant repeté que vous m'auiez donnée, & tant affecté de me redonner; & qu'il ne tient qu'à vous de faire telle responce que bon vous semblera à mon Apologie. Avec cela, ie vous reitere, que ie ne laisseray pas d'estre tousiours,

MONSIEVR,

De Digne, ce
Septembre 1649.

Vostre tres-humble, tres-obeyssant, &
tres-affectionné seruiteur,

GASSEND.

Et en la surscription,

*A Monsieur Monsieur Morin Docteur
en Medecine & Professeur du Roy
és Mathematiques, à Paris.*



L E T T R E

D E

FRANÇOIS DE BARANCY

DOCTEVR EZ DROITS,

& Aduocat en Parlement,

*An Sieur I E A N B A P T I S T E**M O R I N Docteur en Medecine,**& Professeur du Roy aux Ma-
thematiques à Paris.*

O N S I E V R,

Je pense auoir raison de trouuer estrange , que vous m'attaquiez si souuent comme vous faites , & par vos lettres , & par vos libelles imprimez , sans vous en auoir donné aucun sujet , & sans auoir eu iamais la pensée de vous offenser.

Si vous auiez toute la prudence que doit auoir vn homme de 67. ans , sans doute que vous vous fussiez mieux informé des noms de ceux qui vous querellent,

& vous eussiez laissé en repos vn bon homme, qui ne dit,
& ne fait mal à personne.

Vous vous plaignez de moy, & vous me persecutez
comme si i'estois l'Autheur de la lettre qui sert de Pre-
face à l'Apologie de Monsieur Gassend contre vous; &
d'une autre Lettre Françoisé sous le nom de la Roche:
Et cependant Dieu m'est tesmoin, que ie n'ay fait ny
l'une ny l'autre. Et i'ay cette satisfaction que mes Amis,
& plusieurs personnes de merite sçauent que ie dis la
verité.

Il est vray que i'ay procuré l'impression de l'Apolo-
gie de Monsieur Gassend contre vous: Ce que i'ay fait,
non point pour aucun dessein que i'aye eu de vous cho-
quer, mais parce que iugeant que le Libelle que vous
auez publié contre luy, intitulé *Ala Telluris fracta*, ne
valoit rien, & luy estoit iniurieux; & au contraire que
son Apologie estoit tres-bonne, & respondoit perti-
nement à ce que vous luy obiectiez, i'ay crû qu'il n'e-
stoit pas raisonnable qu'un mauuais liure contre vne
personne tres-illustre vist le iour, & que sa Respon-
se iudicieuse & sçauante fust enseuelie dans les tene-
bres.

C'est là tout le mal que ie puis vous auoir fait, qui ne
merite pas, ce me semble, tant d'aigreur que vous en
auez fait paroistre contre moy dans vos imprimez, qui,
à n'en point mentir, vous rendent extremement ridi-
cule, comme ie pretens de vous le faire voir.

Pour moy, ie loüe Dieu, de ce que par sa sainte gra-
ce i'ay vn esprit de douceur & de quietude, qui non seu-
lement ne s'irrite point dans de pareilles rencontres,
mais qui s'en diuertit avec quelque plaisir. Certaine-
ment i'en ay ry iusques à cette heure, & ie vous prie,
Monsieur, de ne trouuer point mauuais que i'en rie en-
core, suiuant l'inclination que i'ay pour la Philosophie

de Democrite le Rieur, & le Pere des Atomes, qui vous font tant de peur. Et puis que j'ay souffert patiemment vos mauuaises humeurs, au moins souffrez mes gayetez, & permettez-moy quelque diuertissement dans la Responce que ie m'en vay faire à vostre dernier libelle, que i'examineray page à page, puis que ie n'y remarque point d'autre ordre, & que vous voulez enfin mal-gré moy que ie vous parle.

J'ay seulement vne grace à vous demander : C'est que ie vous supplie, Monsieur, en cas que vous trouuiez mon stile trop desobligeant, de considerer, ie ne dis pas ce que vous feriez, mais ce que le moindre des hommes, & le plus patient, diroit & feroit, estant iniustement & sans y auoir donné aucun sujet, plusieurs fois attaqué, mesprisé & iniurié, en des libelles imprimez, par vne personne à luy inconnüe, & qui ne seroit pas de plus haute condition que vous. Ce n'est pas pourtant que ie me doieue eschapper dans des paroles outrageuses, mais seulement ie veux prendre la liberté de rire, & de me diuertir avec mes Amis aux despens de vostre beau stile & de vos riches pensées.

Et pour ne les point ennuyer dans vn entretien trop long, ny excéder les bornes d'une iuste lettre, Je partageray mes Commentaires en deux, ou trois parties. Aussi-bien ne faut-il pas exposer toutes vos belles choses en vne seule fois. Il n'y auroit pas tant de satisfaction, pour ceux qui les voudront bien considerer.

E X A M E N

*De la Responſe du Sieur Iean Baptiſte Morin Docteur
en Medecine, & Profefſeur du Roy aux Mathe-
matiques à Paris, à la Lettre d'un faux Amy
de Monsieur Gaultier, Conſeiller au
Parlement de Prouence.*

P R E M I E R E P A R T I E.

Vous bronchez dès le premier pas, lors que vous confessez que *C'est contre le sentiment de la plupart des gens doctes & de qualité, qui vous connoissent & vous honorent de leur amitié, que vous faites vostre Responſe.* Est-ce prudence à vous de ne pas croire, & de ne pas ſuiure le ſentiment de tant de gens doctes & de qualité qui vous ſont amis? Et vous en vanter tout au commencement de vostre Responſe, n'est-ce pas vne autre imprudence, qui vous rend ridicule?

Mais c'est vostre couſtume de commencer vos imprimez, ou par quelque vanité, ou par quelque ſottife. En voulez-vous des preuues? Vous commencez vostre Science des Longitudes, reduite en pratique par ces mots: *Ayant inuenté la tant deſirée ſcience des Longitudes en toute perfection Geometrique, & ICELLE publiée l'an 1634. avec approbation des plus grands Astronomes de l'Europe, &c.* Vanité.

Vous commencez vostre Responſe à l'Apologie du P. Du Liris en ces termes: *Il m'eſt bien faſcheux d'eſtre tant de fois diſtrait d'un ouurage, auquel ie travaille depuis 30. ans, toujours attendu & demandé des plus ſçauans de*

*l'Europe, que ie faisois estat d'acheuer cette année. Vante-
rie, Vanité. Vostre fucille Latine, imprimée contre
Monfieur Boulliaud commence ainfi, Mirabitur posteri-
tas vniuerfa. &c. Vanité. La posterité se fouciera bien
de vous. Encore, Vniuerfa. Voicy le commencement
de vostre Libelle, Ala Telluris Fraëta : Post solutionem
meam famosi Problematis de Telluris motu vel quiete, Res-
pensionem ad Apologiam Ioannis Lansbergij, nostrumque
Tychonem Braheum aduersus Philolaum redimium, arbitra-
bar neminem sanae mentis fore deinceps, qui Terre quietem
in dubium reuocare, absurdamque de eius motu opinionem
defendere, vel quouis modo fulcire presumeret, &c. Quel-
le vanité & quelle sottise ! Mais peut-estre vous ne les
voyez pas : Je m'en vay vous les mettre deuant les
yeux.*

Que diriez-vous d'un homme, qui sçachant bien, &
ayant mesme publié, que les plus sublimes Philosophes
& Astronomes de ce siecle soustiennent vne opinion,
communément receuë parmy eux, auroit neantmoins
l'effronterie de commencer vn meschant Liuret en ce
mesme sens : Certes ie pensois, apres auoir escrit trois fois
contre cette opinion, que desormais il ne se trouueroit plus
personne, si ce n'estoit quelque esprit malade, qui eust la pre-
sompction de reuoker en doute ce que i'ay déterminé, & def-
fendre le contraire, ou mesme l'appuyer en quelque façon que
ce fust. Sont-ce là les paroles d'un homme bien sensé ?
Iugez en vous-mesmes si vous n'estes entierement aueu-
gle en ce qui vous regarde. Quoy, il faut donc que les
plus sublimes Philosophes & Astronomes se rangent à
vostre opinion, s'ils ne veulent passer pour des cer-
ueaux desmontez ? Oseriez-vous nier que vous n'avez
pas publié que l'opinion du Mouuement de la Terre
fust receuë parmy les plus sublimes Philosophes &
Astronomes de ce temps ? Lisez, ie vous prie, vos pro-

pres termes en l'Epistre dedicatoire de vostre *Solutio famosi Problematis*, à feu Monseigneur le Cardinal Duc: *At quod inter huius seculi sublimiores Philosophos & Astronomos vulgò receptam Aristarchi, magnique Copernici de ipsius Terra motu sententiam, ipse ausus fuerim euertere.*

Pouuez-vous icy vous plaindre, qu'on vous impose; qu'on vous calomnie, qu'on vous obiecte des faussetez? Mais voyons si vous estes plus modeste au commencement de cette piece, intitulée *Solutio famosi Problematis*, & considerons seulement ce superbe titre. Il s'agissoit d'un Probleme controuersé depuis 2220. ans, selon vostre calcul en la Preface au Lecteur; d'un Probleme qui partageoit en diuerfes sectes tous les Philosophes, Astronomes & Theologiens, tous, tous (c'est par où vous commencez vostre solution) on en disputoit avec autant d'animosité (à vostre dire) comme si c'eust esté pour la conqueste, non pas d'un Empire, mais de tout le Monde. Aristote, Ptolemée, & plusieurs autres anciens & modernes, en auoient entrepris la solution, & n'auoient fait que l'eau toute claire (vous le dites ainsi en l'Epistre dedicatoire) Et on en estoit venu là, que plusieurs personnages tres-doctes iugeoient cette solution impossible: Ouy, impossible (ce sont vos mots) Et voicy, Miracle! vn Malotru Iean Baptiste Morin, qui sans aucun respect, ny pour Aristote, ny pour Ptolemée, ny pour toute cette illustre assemblée des Philosophes, des Astronomes, & des sacrez Theologiens, fend la presse, monte en chaire, fait le Maistre, impose silence à tous, & crie: Messieurs, vous vous estes bien tourmentez iusques à cette heure en vain: mais vous n'estes que des Asnes; Escoutez-moy, Voicy *Famosi & antiqui Problematis de Telluris motu vel quiete HACTENVS OPTATA SOLVTIO*. Et cette Solution ne consiste qu'en des bagatelles & des niaiseries. Qu'en

Quod uniuersus Philosophorum, Astronomorum, Theologorumque cætus in varias hac de re sectas abierit, quæ etiam nū hodiè inuicem acerrimè consurgunt, quasi non de unius tantum Imperij, sed de totius Orbis summa ageretur.

Quod de Telluris motu vel quiete famosam questionem non problematice tractandam, sed soluendam suscepim, quam rē nec Aristoteles, nec Ptolemæus, nec veterum alius eandem aggressi, fecerunt; censetur; à doctissimis pluribus impossibilis.

juger-vous? Pour moy ie crois qu'il ne s'est iamais veu, ny leu, ny ouïy vne Vanité pareille à celle-là; si ce n'est (direz-vous) la mienne, d'auoir la presomption de vouloir approcher & regarder entre les deux yeux ce Morgant.

Ie ferois trop long & ennuyeux si ie voulois examiner tous vos autres commencemens, pourtant si ceux-cy ne prouuent pas assez ce que j'ay auancé, je vous en donneray d'autres sans grande peine.

Page 40. *Trop offensé, par trop iniquement, par trop parlé, trop de*
 ligne 8. 9. *loix, trop d'intelligence, tout cela en trois lignes; n'est-ce*
 10. 11. 12. *pas trop, pour ne pas iuger d'abord que cette lettre est de la*
foible cervelle, &c.

P. 41. l. 3.

I'adresse cét Escrit à Barancy, C'est moy, Monsieur: Aduocat & Libraire ou Imprimeur à Lyon: Que ne dites-vous encor pour me matter, Correcteur d'impression? Sçachez encor vne fois que vous auez tort de m'adresser cét Escrit, puis que sur mon honneur, comme ie vous l'ay déjà iuré, ie ne suis point l'Authheur de ces Lettres qui vous faschent; Et si ie les auois faites, ou si i'y auois cooperé, ie ne suis point si lasche, ny si timide, que de les defauoüer. Maintenant si ie suis Libraire, parce que ie manie des liures, & Imprimeur, parce que ie pren le soin d'en faire imprimer, je ne suis pas seul du mestier. Et vous auriez peine de n'en estre pas, puis qu'outre ce que vous faites ce que ie viens de dire, vous vendez vos liures, & vous en faites profession publique, tesmoins les premieres & les dernieres pages de vos beaux Ourages: en l'une, Et se vend chez l'Authheur, rue des Morfondus. O que vous estes bien logé! en l'autre, Sumptibus Authoris apud quem venalis est. Et puis à la fin: ledit Sieur Morin vend encor en son logis son ASTRONOMIA RESTITUTA, contenant neuf parties, & plusieurs

plusieurs pieces adjoustées sur le mesme sujet, &c. Sa TRI-
GONOMETRIE, &c.

Je laisse icy à Monsieur de Neuré le soin de disputer
ses interêts. Vous pouuez estre certain qu'il n'a pas be-
soin de mon secours ; & qu'il est homme à vous bien
payer.

Accouplez de rage enuénimée. Voila de beaux termes.

P. 41. l. 5.

*Leur lettre n'est qu'une sottise, indigne de mon temps à la
regarder. Cette construction est iolie, & n'est pas mesme
commune.*

P. 41. l. 13.

*Car en effet, il n'y a en toute leur lettre aucune periode, qui
ne soit, ou ignorance, ou mensonge, ou imposture, ou fourbe-
rie. Ah! Monsieur Morin, mon Amy, à quoy pensez-
vous? Estes-vous pas Catholique, ou Chrestien? Il y a
dans la lettre de la Roche presque vne Bulle entiere de
Sixte Quint, qui fait plusieurs bonnes periodes de cette
Lettre: Et vous voulez que les saints Decrets de Nostre
Saint Pere soient, ou ignorance, ou mensonge, ou im-
posture, ou fourberie? Voyez iusques où la fureur vous
emporte? Monsieur Morin, *Profecto tibi amicè consulo*,
pour me seruir de vos propres termes, qui auront plus
d'efficace pour vous persuader, *ne facie sis unquam Ro-
mipeta*, non, mon Amy, *sed semper Romifuga*. O le riche
Latin! Et ne mourez pas dans cette impiété, ie vous en
prie.*

*Ala Telluris
fracta.* P. 7.

*Vn exemplaire D'ICELLE lettre, l'auteur D'I-
CELLE lettre, ICELVY sieur Conseiller; l'honneur
D'ICELVY Seigneur, au frontispice D'ICELLE, en
dix lignes: n'en est-ce pas là assez pour estre relegué
dans le país d'iceluy, & de pour à icelle fin, au iugement
de l'Auteur des Remarques sur langue François au
titre Consideré que? Je ne me puis empescher de vous
dire icy que vous tesmoignez n'estre gueres plus sça-
uant en François qu'en Latin; & que vous escriuez*

P. 41. l. 27.
&c.

également mal en l'une & en l'autre de ces langues (Je m'offre à vous le faire connoître plus particulièrement quand il vous plaira, quelque mespris que vous faciez de moy) & qu'en suite vous n'estes pas un Auteur si redoutable, ny tant à craindre, que vous vous imaginez, quelque bonne opinion que vous ayez conceüe de vostre portée. Jusques-icy vous ne m'avez point fait de peur, graces à Dieu.

P. 42. l. 7.

Au Meurtre, Messieurs, au Meurtre! *Il me rongne ma qualité de Docteur, qui est le premier degré d'honneur que j'ay acquis par mes études: Et ne m'appelle que Medecin;*

P. 42. l. 9.

Alarme! Et ne m'appelle que Medecin! Il me rongne encore ma qualité de Professeur du Roy à Paris: Au Rongneur! Au Fauxmonnoyeur!

En bonne foy, Monsieur Morin, pouuez-vous repasser les yeux sur le commencement de cette page, sans reconnoître vostre vanité ridicule, & vostre peu de jugement, & sans rougir, ou vous moquer de vous-mesme? Que ne prenez-vous conseil de vos Amis; quand vous voulez imprimer quelque chose? Il est vray que vous ne le suiuez point, parce qu'asseurément vous croyez estre plus habile & plus iudicieux que tous ceux qui vous parlent. *Et ne m'appelle que Medecin*, quelle sortise! Si vous estiez Roy d'Espagne, Dieu vous en garde, que de pauvres gens de vos sujets se trouveroient criminels de leze Majesté pour auoir obmis, ou mal enoncé quelques-uns de vos Titres! On vous fait tort de vous appeller Medecin: Enseignez-nous, je vous prie, comme il vous faut parler, pour vous rendre tout l'honneur qui vous est deu. Disons-nous bien, si en faisant une belle reuerence, nous vous parlons ainsi: *Monsieur le Docteur Medecin*, ou bien *en Medecine*: mais de quelle faculté, faut-il pas l'exprimer? Est-ce de Paris, ou de Montpellier? Je crois que non, car nous n'en

ferions pas en doute , tous vos liures le publieroient. Ce sera peut-estre d'Aix : hazard , de la Faculté d'Aix, fauf à nous corriger , si nous disons mal : De plus Monsieur , Tout beau , faudroit-il point dire Monseigneur ? MONSEIGNEUR le Professeur du Roy (& ie crois qu'il seroit bon d'adjouster, Tres-digne, à cause de l'Horoscope, ou de la Reuolution du voyage de Sauoye, qui vous l'a fait estre mal-gré vn Officier de la Reine Mere, ainsi que vous vous en vantez) Tres-digne, aux Mathematiques , & sur tout au College Royal de Paris. Y a-t'il point encore quelque chose de rongné ? O que vous n'estes pas au bout ! Il faut adjouster : depuis 22. ans : dont la reputation , graces à Dieu , est tousiours allée en augmentant , & sur tout, O ! & sur tout, depuis vostre Inuention des Longitudes. Estes-vous content ? Dites, Dites : en laquelle charge vous n'entraistes pas en ignorant, car d'abord vous eustes la reputation de VIEUX ROVTIER à enseigner ces sciences. Sommes-nous au bout ? Dites tousiours. Reformateur de l'Astronomie , & premier Inuenteur de la vraye science des Longitudes , qui a esté, qui est encor à present , & qui sera tousiours nostre Maistre en ICELLE science : Parlez haut, nommez-le : Et qui s'appelle : Chapeau bas, Crocheteurs : IEAN BAPTISTE MORIN. Nom fort bien connu dans toute l'Europe : Seulement ? Et plus loin pour toutes les sciences des Astres, dont ie rens graces à Dieu. Je crois que vous ne prenez plus le Titre de troisieme Espous de Madame la Terre, parce qu'estant vieux , il vous fâcheroit de marcher apres Colomb & Magellan, & puis Americ Vesputius vous le veut disputer ; pourtant vous estiez le fauory & le plus aimé, à ce qu'en dit vostre Poëte.

Que ie ris de grand cœur, Monsieur Morin, en escriuant cecy : Riez-en, ie vous prie, aussi-bien que moy, & puis qu'il faut rendre nos folies publiques , prenons

Response à
l'Apologie
du P. du
Lirio, P. 20.

P. 16. de la
mesme Ref-
ponse.

P. 88. de la
mesme Ref-
ponse.

Aux premie-
res feuilles de
Nouua Mun-
di subluna-
ris Anato-
mia.

part au diuertissement que nous donnons aux autres. Que si vous croyez estre trop vieux pour en rire, faites au moins, que vos pauvres Niepces, qui sont à marier, en rient, afin qu'elles vous en sçachent gré & à moy aussi.

E. 42. l. 21.

Monsieur de Montconys fort intelligent en l'Astrologie vulgaire, & des plus gentils esprits de Lyon; qui autrefois estant à Paris a fait tous ses efforts pour apprendre de moy la vraye Astrologie. Monsieur de Montconys ne vous est pas fort obligé des iolies Epithetes que vous luy donnez: Et vous auriez mieux fait de ne le point nommer, puis qu'il n'auoit que faire de vos badineries. Je m'estonne icy, pardonnez-moy s'il vous plaist, de vostre peu d'esprit. Est-il possible que depuis 30. ans ou enuiron que vous vous meslez d'escire, vous n'ayez pas pû apprendre la façon d'obliger de bonne grace vn Amy, & vn Amy de condition & de grand merite, en parlant de luy? *Monsieur de Montconys*, dites-vous, *est des plus gentils esprits de Lyon.* Le bel Eloge! C'est ainsi qu'on parleroit d'un Harlequin: C'est vn gentil esprit. Prendriez-vous en bonne part vn conseil que ie vous donneroie? Figurez-vous, Monsieur Morin, quand vous voudrez louer quelqu'un auantageusement, que vous parlez de vous; Je meure si vous ne sentirez aussi-tost vn flux de bouche, que vous aurez peine à faire tarir. Reuenons. Aduoüez-moy qu'il en falloit parler avec plus d'honneur & de respect, ou n'en dire mot. Et puis, vraiment vous le partagez bien de luy donner seulement l'Astrologie vulgaire, c'est à dire, de triquenique; car la vraye, à vostre conte, n'est pas pour luy, nonobstant tous les efforts qu'il ait pû faire pour en apprendre de vous quelque petit secret: Non, non, la vraye & fine Astrologie ne loge, & ne logera iamais ailleurs que dans la noble ceruelle du SEIGNEUR IEAN BAPTISTE MORIN.

Ne voilà pas bien des sottises en quatre mots : (Afin d'oster toute ambiguité, on ne parle point des quatre precedens, mais des suiuaus) Medecin, Professeur en Astrologie? Oüy certes, Monsieur: du moins il y en a beaucoup aux trois derniers. Je respecte trop Messieurs les Medecins pour croire que le mot de Medecin soit vne sottise ailleurs que chez vous.

Mon honneur depend de mes Ouurages. Grauité Espagnolle! Que n'adjoustez-vous, & de mes Victoires? Il me semble vous voir sur les rangs prononçant Magistralement & Thraasoniquement ces glorieuses paroles de la page 12. de vostre Responce à l'Apologie du Pere du Liris: Et apres tant de victoires par moy remportées sur mes Commissaires: sur Hume par deux fois: sur Herigone par deux fois; sur Longomontanus, sur Bulliaud, sur le sieur de Langres, & sur Frommius par deux fois (Adjoustez maintenant, sur le fameux Gassendus) tous gens versez & la plupart Professeurs en ces sciences, (car pour Neuré & Barancy, ce sont deux petits Lansquenets que ie foudroye du moindre de mes regards) lesquels combats & victoires se voyent dans mon Astronomia RESTITUTA, pour Histoire de ma vie. O la belle Histoire! O la pretieuse vie! O les terribles combats! O les sanglantes victoires! Ingrate Republique, qui ne luyas point decerné de triomphes! Mirabitur posteritas vniuersa.

Oserois-je icy, Grand Conquerant, vous dire vne de mes pensées? Ce sera à condition que vous n'entrerez point en colere; car vous me feriez trop grande peur. Je m'imagine suiuant la connoissance que vos Ouurages m'ont donné de vostre humeur, qu'il y a ie ne sçay quoy de bigearre, ie m'explique mal; ie veux dire de Martial & de glorieux dans vostre Esprit, qui se repaist souuent de combats & de victoires. Qu'ay-je dit, ie m'imagine? Il n'est pas mesme loisible d'en douter; car vous auez

En la Let-
tre à Mon-
sieur Gaultier, p. 17.
l. dern.

*In Authoris
ad Hungari-
cas, iudinas
Peregrina-
tione.*

Aries en vostre Ascendant, & Mars Seigneur d'ICELVY au Trine de tous les autres Planetes conjoints, ce qui vous fait trop genereux. Donc pour contenter cette genereuse enuie, & ce feu guerrier qui brille dans vostre sang, ie me figure que quelquefois dans le familier, en prenant vos esbas, vous mettez sur vostre teste vn bonnet rouge retroussé, pennaché d'une plume de coq; vostre Chaperon de Docteur sur l'espaule, afin de ioindre les Muses avec les Armes; à vostre costé la Dague que vous portiez en Hongrie dans cette expedition memorable, lors que vous alliez à la conqueste des trois Regions de la Terre descouuertes par vous dans les Mines de Cremnits, vne canne en la main; & qu'en cét equipage vous vous faites suiure grauelement dans vostre Sale par vos Niepces, à qui vous mettez la pique en main; & les faites crier: Victoire, Victoire, Viue Morin: Victoire, Victoire, Viue Morin! Car ie ne puis croire qu'un homme qui ne hante point la guerre, puisse bien concevoir & escrire tant de Rodomontades si grotesques, sans s'y estre exercé long-temps auparauant.

Mais voicy où i'admire vostre belle expression: *Et dit, qu'en mon liure intitulé, Alæ Telluris fractæ*, ie me suis escrié contre Monsieur Gassend, au perfide, au desloyal, au traître, & l'ay voulu faire passer pour Heretique, Pesez ce qui suit, qui sont pures mengeries, qui ne se trouueront point au texte de mon liure, mais bien en ma lettre escrete à Monsieur le Conseiller Gaultier, parlant de Neuré & Barancy. N'aduociez-vous pas icy clairement que ces pures mengeries, qui ne se trouuent pas au texte de vostre liure, se trouuent en vostre Lettre escrete à Monsieur Gaultier? Où est icy vostre sens? Et puis qu'appellez-vous le Texte de vostre liure? Le ne m'estois pas encor apperceu qu'il y eût Texte & Glose: Distinguez-les, s'il vous plaist, & expliquez-vous mieux là-dessus.

Je tiens ma promesse de n'y point respondre. C'est à l'Apologie de Monsieur Gassend. Je vous le conseille aussi; car quand vous sueriez à grosses gouttes, vous ne pouvez iamais faire rien autre qu'une Morinade. Faites le fanfaron tant qu'il vous plaira, vostre pauvre esprit est borné là. Vous sçavez peut-estre assez de Grec pour entendre que veut dire Μωρίς & Μωρίνω, d'où sont deriuez Morin & Morinade. Ce sera à vous de l'expliquer, si vous le trouuez bon à ceux qui ne l'entendront pass.

P. 43. l. 15.

Mais passant plus outre il dit, qu'il y a aussi peu de comparaison entre les productions de Monsieur Gassend, & les miennes; qu'entre les rayons du Soleil, & les exhalaisons d'un fumier. Il est vray; Mais pour ne vous point fascher, i'auoüe que cette comparaison est odieuse.

P. 43. l. 10.

Barancy parle comme intéressé. Iusques à cette heure ie n'auois dit mot; mais puisque vous me faites parler, souffrez que ie die, que vous tesmoignez icy vne furieuse ialousie contre Monsieur Gassend, taschant de decrediter ses riches Ouurages, qui viuront plus de siecles que vos barbouilleries ne dureront d'années.

Vous le blasmez de ce qu'il prouue qu'Epicure n'estoit pas tel que le vulgaire le croit, & qu'il le purge des vices, dont le peuple ignorant l'accuse. Estes-vous raisonnable de vous mettre en colere de ce qu'on veut descharger vn homme innocent des crimes que faussement on luy impose? Si Monsieur Gassend louoit vn Epicure, gourmand, sale, faineant, voluptueux, vous auriez raison d'y trouuer à redire: Mais s'il vous propose vn Epicure; sobre, modeste, austere, abstinent, & s'il produit des tesmoins irreprochables pour sa iustification, dequoy vous scandalisez vous? Qui le peut trouuer mauuais, sinon quelque esprit mal-fait, foible, bigot & superstitieux?

Et sçay personne (noble façon de parler) des plus capables qui S'APPRESTE DESIA à rendre ridicule la Physique d'Epicure. Dites la verité : N'est-ce point vous, ou quelque sot de Pedant de mesme farine? O que nous en rirons! Courage, Monsieur Morin, Apprestez-vous, Mettez la mesche sur le serpent, soufflez, Tirez. Helas! il est mort. Chantez : Victoire sur Gassendus par trois fois.

Car ie connois mieux le fond de Monsieur Gassend qu'il ne connoist le mien : & ne m'estime en rien son inferieur. Pauvre homme, que vous estes vain! Quelle horrible & insupportable Vanité Morinesque? Si ie me voulois servir de vos termes, ie vous dirois icy avec raison: Vous estes un bel homme, & un plaisant fallot, pour vous comparer avec Monsieur Gassend : N'avez-vous point de honte?

Infelix puer, atque impar congressus Achilli.

Mais ie veux estre plus moderé, & vous parler avec plus de retenuë, quoy qu'à vray dire, peu s'en faut que la patience ne m'eschappe. Monsieur Morin, N'avez-vous pas dit & escrit souuent, que Monsieur Gassend estoit des plus sçauans hommes de nostre siecle : & mesme en vostre libelle, *Alæ Telluris fractæ*, quoy que vous escriuiez contre luy, ne le nommez-vous pas, *D. Gassendus vir inter huiusce temporis doctos valde celebris*? C'est là le moindre Eloge que ses ennemis mesmes luy puissent donner. Et en vostre Response à l'Apologie du P. Du Liris, vous confessez que *sa probité & sa science sont reconnues de tout l'Europe*. Et vous avez cette bonne opinion là de vous-mesmes, que vous valez autant que luy? Du moins si vous le pensez, vous ne le deuriez pas dire, de peur d'estre mocqué, & moins encor l'imprimer. N'est-ce pas s'exposer publiquement à la risée d'un chacun? C'est aux autres à vous louer (& dire ironiquement, apres que vous les en aurez priez,

Morine,

Page 1.

Page 16.

Morine , nostri seculi magnum decus !

Et le reste de cette belle Ode, qui vous chatoüille fort, & que sans doute vous sçavez par cœur) mais à vous, c'est vne chose honteuse. Vous souuenez-vous point de cette Parabole del'Euangile : *Cum inuitatus fueris, &c.* Luc. 14. Escoutez vostre leçon : *Non discumbas in primo loco , ne fortè honoratior te sit inuitatus.* Et ne craignez-vous point que le Maistre de la Maison vous die ? Allez mal-appris, Ostez-vous de là : là-bas, là-bas. *Da huic locum. Et tunc incipias cum rubore nouissimum locum tenere.* Laissez faire aux autres les comparaisons qui vous regardent, & apprenez ce que les enfans sçauent :

Υπερ σκαυτς μὴ φερίσῃς ἐν γλώσσῃ.

J'ay veu toutes ses productions , & il n'a pas veu toutes les siennes. P. 44. l. 16. Ou vous parlez des productions imprimées : Et en ce cas auez-vous raison de dire que Monsieur Gassend n'a pas veu toutes les vostres ? Ou vous parlez de celles qui ne le sont pas : Et en ce cas auez-vous raison de dire que vous auez veu toutes les siennes ? Voyez-vous pas que vous ne sçavez ce que vous dites, & que vous ne vous entendez pas vous-mesmes.

Et n'est pas mesme capable de iuger de toutes , ignorant mon Astrologie. Ligne 17. Puerilité. Escoutons , voicy dequoy rire.

Mon ASTROLOGIE , qui n'est pas vn Habit de friperie , rapiecé de quantité de vieilles & différentes opinions , sans rien refondre à la mode Pyrrhonienne , qui ne se vante d'autre chose , sinon qu'elle ne sçait rien , la pauvrete ! Mais c'est vn HABIT NEUF , Ligne 18. *Remarquez bien ce que ie dis , C'est vn habit neuf , garny de belles & veritables resolutions , capables d'instruire & contenter les Esprits ; Et vn travail non desrobé. C'est le point. Nous en iugerons , s'il plaist à Dieu.*

On entend bien icy ce que vous voulez dire avec vostre Habit de friperie ; mais cela ne merite pas responce. Il suffit de dire que vous n'avez iamais eu assez d'esprit, ny de iugement pour connoistre les bonnes choses : Et il ne faut point d'autre preuue de ce que ie dis, que les 30. ans que vous asseurez auoir employez à la Iudiciaire, qui n'est (quand vous en deuriez sauter aux nuës) & ne fera iamais qu'une sottise, & vn amusement de fols. Mais nous en parlerons plus à loisir. Demeurons maintenant dans les termes de ce bel *Habit neuf*, si bien *garny*, qui n'est point rapiecé (car sans doute il est tout d'une piece, y comprenant mesme la garniture) nous l'admirerons quand il plaira à Dieu de nous le faire voir. *Et sçay personne qui s'appreste desjà* à en rabatre les coutures. Mais d'où vous est venuë cette comparaison que vous faites de vostre Astrologie à vn Habit ? Si vous la compariez à vn Palais magnifique ; à vn Arbre chargé de bons fruits ; à vne Fontaine d'ambrosie : Il y auroit là dequoy loger plusieurs personnes ; Plusieurs pourroient ruster de vos fruits ; plusieurs y courroient pour y boire : Mais vn Habit n'est que pour vn seul, encore faut-il qu'il soit de vostre taille : Si c'estoit encor vne casaque, on s'en accommoderoit mieux. Que dites-vous à cela ? Que ie suis vn Badin ? Donnez-moy la main, & allons de compagnie.

Enfin vous vous vantez qu'il n'y a rien de desrobé. Cela est beau. Donc asseurément on n'y parle plus des douze Maisons, aussi estoient-elles trop mal basties ; Vous en aurez fait d'autres toutes neuues : Plus de ces vieux Signes du Zodiaque, qui faisoient peur aux petits enfans : Plus de ces vilains aspects quadrats & opposez : Plus de Trines, ny de Sextiles ; Fy, ils sont tous moisiss de vieillesse : Plus de ces rectifications d'Animo-

dar, Plus de cette fantasque Trutine d'Hermes, Plus de ces resueries d'exaltations, depreffions, cheutes, de-trimens, &c. Plus de ces mal-heureufes directions, Plus de ces reuolutions, Autrement ce ne seroit pas vn Habit neuf, mais vieux & vsé comme la Cappe d'un Gabaonite. Y nommez-vous encor les Planetes? Cela sentiroit trop son antiquité. Vous n'oseriez plus parler de Partie de Fortune, d'Hylec, ny d'Alcocodem, si vous ne voulez estre sifflé, parce que nous vous reprocherions avec iustice, que contre vostre promesse vous ne nous donneriez que de vieilles pieces desrobées. Tenez donc vostre parole, & souuenez-vous bien, ie vous le repete, que vous nous promettez toutes choses nouuelles, rien de desrobé, point de pieces recou-fuës; en vn mot, *vn Habit neuf*, & quant à l'estoffe, & quant à la façon: & bien garny pour nous tenir chauds. Ie m'en resioüys déjà. L'aurons-nous point encor cét hyuer? Messieurs les Deputez *de tout le Corps des Doctes* p. 50 l. 5. *de l'Europe, qui vous le demandent*, dites-vous, *instam-ment depuis plus de 12. ans*, à deux genoux, & à jointes mains, & qui souspirent, & qui pleurent pour celà, sont-ils pas encor arriuez? Vous laisserez-vous point flescchir aux instantes prieres de tant d'honnestes gens; & serons-nous tousiours transis de froidure, faute de cét Habit tant demandé, tant promis, tant souhaité? Certes peu s'en faut qu'on ne maudisse, & *vostre âge, & vos pauvres Niepces à entretenir & à marier*, qui vont dissiper les *six mille liures*, & qui seront cause que vous nous ferez tant languir.

Mais sans doute ie vous ennuye: Remettons, s'il vous plaist, la partie à vne autre fois; Aussi-bien auons-nous trop de choses à dire sur la belle matiere qui suit, & que vous m'avez offerte sans vous l'auoir demandée, tant

vous estes bon & courtois. Toutefois vostre ciuilité ne s'estend pas iusques à me dire que vous soyez mon seruiteur : Ce qui m'embarasse fort, & me donne bien à penser, sçauoir, si ie vous dois dire que ie suis le vostre. Oüy, ie veux estre meilleur que vous, & vous dire avec sincérité que ie suis,

MONSIEVR,

De Lyon le 26. Oâobre 1649.

Vostre tres-humble seruiteur,

DE BARANCY.

F I N.

5646

γ

